

琴川志叙

知常熟州事淮南盧君嘗以古者郡國有圖風  
土有記所以備一方之紀載今之志書卽古之  
圖記也其可廢乎哉然常熟舊志自宋兵南渡  
版籍不存至慶元丙辰縣令孫應時始編次爲  
書其後縣升爲州歷年浸遠而是書之存焉者  
寡且丙辰以後續其所未備者後未有其人非  
缺典歟乃亟訪孫令所編而重正之合十有五  
卷仍其舊名而題之曰重修琴川志予得而讀



之然後知君之善爲政也夫士之善爲政者必先其所急以及其所緩爲之衣食以厚民之生爲之教化以淑民之德獄訟以戒其不率賦斂以正其不均此最其所急而不可緩者也至於攷某人物之愚智風俗之盛衰以及生產之同異山川之險夷凡此之類蓋差可緩而不可廢者也故用事於一州者得通敏有爲之士則將裁正乎緩急之間而不謬其序區別乎先後之際而不失其宜矣嗚呼若君之在常熟其殆庶

幾於此者乎常熟爲吳之支郡以言某人物則姬泰伯之所逃夫差項籍之所霸也以言某風俗則有言游公子札之文雅朱買臣陸機雲兄弟之馳驟范蠡希文張季鷹之慷慨高舉也以言某生產則陸海鹽絺鍛冶之饒聞於東南也以言某山川則有海隅鳥目之形勝大江東海之要害也若此數事蓋皆爲政者之不可以不考焉者也於具社之下車蓋逾年矣凡州政之所宜急者亦旣悉舉而先之而又不廢其所緩

歷攷前數事以成乎是書真所謂通敏有爲之士哉。魯周官職方氏掌天下之圖與其財用穀畜之數。要周知其利害則志書者蓋三代爲政之法而後世尤謹著之以爲政寔。今君之爲廼能先民之所急而後及乎是故曰善爲政也。書將鉉梓以行君命。士友陸景元來謂予曰：子執筆史館，其言爲足徵。幸爲我序之。予雖不識君，然聞君之爲政是州者，頗悉故直書所聞以授之。使後之人觀之，亦足以感發而興起矣。君名

鎮字安，以領兵元帥兼知州事云。  
至正乙巳正月望日金華戴良序

重修琴川志

姑蘇爲吳王之故都今爲畿輔之大郡若常熟則爲郡之大縣自春秋距今千六百餘年其壤地之間建置之沿革風物之變遷與夫事跡之涉於理亂善惡之繫於勸懲可書者宜若不可勝紀余家世東海南渡初曾叔大父光祿公仕于吳因寓于此余端平乙未方自淮來依宗黨始至嘗問客曰縣名常熟其義安在莫始何時客應之曰紹興縣宰題名云梁改南沙爲常熟



命名之義則不知也又問有圖經可以參考否  
曰所誌亦同有故老可以質問否曰無可與語  
者及觀陸澄吳地記有吳郡常熟縣之文則齊  
代已有常熟之名非改於梁也吁宰是邑生長  
是邑雖更易之歲月名稱之意義且不及知它  
復何望焉此前人失於紀述故後人無所稽據  
遂使名都大邑傳信失實良可歎已龍泉鮑君  
廉來綰縣章每以圖志未詳爲闕典於是與邑  
之秀民鍾君秀實胡君淳芴搜博采攷古訪舊  
裒輯會粹討論是正以增益其所未至迨再考  
後始能成編列爲十門條分類析固不敢謂盡  
無遺闕然視舊志則粗備也咎周官職方氏掌  
天下之圖與其財用穀畜之數要周知其利害  
蕭何收秦圖籍具知天下阨塞戶口多少彊弱  
自非郡國有志風土有記何因而然茲事於縣  
政若緩而實切蓋傳今貽後所關者大鮑君可  
謂知所先務矣寶祐甲寅中元日胸山丘岳叙

總叙

郡有志邑亦有志志非史也所以述史而備記也聖人之於史亦惟述而不作況邑志乎琴川舊志荒落丙辰慶元孫應時修飾之夏八政庚午嘉定葉凱始取而廣其傳時久人殊事多闕且軼覽者病焉於是叙縣以表之有邑此有長有長此有丞下於丞曰簿尉酒稅是爲縣官鎮有監寨有巡各庀乃職以贊其長故次之以叙官邑于虞山之陽鄉招真行山之南境則之秋



報而西迤興福行山之北境則之宣化而北山  
縣之鎮也故次之以叙山縣有海嶠南沙常熟  
之異名又別曰琴川其義蓋內取七港外取五  
浦要亦專指水爲言而溝洫之利以之江海之  
防以之故次之以叙水邑爲沮洳之區田疇衍  
沃而病于經界之久壞端平始釐正之畝步旣  
正賦役向平故次之以叙田中興重在江防禁  
旅舟師雲屯許水近又增福山新軍而縣之弓  
兵寨兵亦所不可廢故次之以叙兵山川蓋靈



秀所蓄也虞山瑰奇琴川清澈其鍾而生之者  
亦必有異矣故次之以叙人人固有之物亦宜  
然土地所出風氣所宜殆不一種故次之以叙  
物內之道宮梵宇槩見述縣之目其以靈異著  
于鄉都間古迹頗可覆而邑人奉西方教者尤  
夥故次之以叙祠若夫斷碑仆碣之僅存新珉  
近琬之方揭棲墨于垣塗粉于枿亦足爲千古  
之證也故以叙文終焉博學宏辭科迪功郎新  
浙西安撫司準備差遣褚中撰

琴川全圖

圖六頁從張海鵬所刊傳望樓蒙書內殘本琴川志補入 己巳仲秋蘇志











縣治之圖

東園




西園






虞山北境



鄉村之圖




楊天江

東

五

北



江陰縣界

界涇

無錫

陵政鄉

長洲縣

涇界

南

重修琴川志目錄

○卷第一

○叙縣

縣境

縣治

縣城

門

坊

巷

廟學

吳公祠附



社壇

公廨

館驛

亭樓

橋梁



倉庫

營寨

義阡

池

鎮

市

三岡

酒坊

卷第二

○叙縣

縣界

鄉都

卷第三

○叙官

縣令

縣丞

主簿

縣尉

監務

監鎮

巡檢

卷第四

○叙山

卷第五

○叙水

江防

海道



水利

涇

湖塘

卷第六

叙賦

据褚叙應作叙田。按新志郭南叙亦作叙田。

田

地

戶口

稅

苗

常平義倉

役錢

酒課

拍店

醋息

商稅

上供

錢庫

職田

縣役人

鄉役人 附義役省劄文

卷第七

叙兵

許浦水軍

顧逕水軍

寨兵

舖兵

卷第八

叙人



進士題名

人物

隱逸

卷第九

○叙產

卷第十

○叙祠

廟

寺觀

冢墓

卷第十一

○叙文

碑記

卷第十二

○叙文

碑記

卷第十三

○叙文

碑記

卷第十四



○題詠

卷第十五

○拾遺

按琴川志自宋南渡版籍不存其後慶元丙辰縣令孫應時嘗粗修集迨嘉定庚午縣令葉凱始廣其傳至淳祐辛丑縣令鮑廉又加飾之然後是書乃爲詳悉自是迄今且百餘年顧編續者未有其人而舊梓則已殘毀無遺矣靖惟是

州虞仲子游文化之地不可無紀爰屬耆老顧德昭等徧求舊本公暇集諸士叅攷異同重鋟諸梓其成書後凡所未載各附卷末總十有五卷仍曰重修琴川志其續志則始於有元焉至正癸卯秋七月初吉守禦常熟領兵副元帥兼平江路常熟州知州盧鎮謹識

重修琴川志卷一

叙縣

古制五鄙爲縣。此遂縣也。四甸爲縣。此州縣也。王畿千里分爲百縣。縣有四郡。此畿縣也。時縣大而郡小。至春秋楚莊王滅陳。遂縣陳。則縣爲尤大。戰國相侵。大國分置郡邑。縣鄙。秦分三十六郡。以監天下之縣。而縣始統于郡矣。是制一定。迄今行之。茲地之爲縣也。自晉始。而海虞南沙常熟。凡三易名。其夏革當紀。其沿襲當具。其



建置本末當攷其事目小大當詳俾考古以訂今者於此乎有稽焉故作叙縣

望常熟縣唐為緊縣宋朝祥符圖經及九域志則曰望漢會稽郡

吳縣有虞鄉乃縣地也吳孫權時嘗置虞農

都尉於此晉武帝太康四年始建為海虞縣

仍屬吳郡按晉招真治碑海虞縣者則虞農都尉太康置其宰成帝咸

康七年分海虞置南沙縣屬晉陵郡今縣北

有南齊以南南沙為常熟縣今崑山縣一百三

沙鄉也前志及紹興題名記皆謂梁改南沙為常熟然吳地記載仲雍冢在吳郡常熟縣海

虞山記乃齊永明間陸澄所作則梁因之及

在齊已有常熟之名曰梁改恐悞

置信義郡隋平陳郡廢縣屬吳州并所領海

隅前京信義海虞與國南沙入焉治南沙城

按梁書梁初分婁縣置信義郡大同初復分信義置崑山縣隋初廢信義入常熟時崑山

亦廢故信義為常熟地至開皇十八年復置崑山縣信義當歸崑山又按吳郡志崑山西

二十里有村曰信義土人或訛為鎮義據此

二說則信義非常熟地矣然前志縣有信義坊又舊琴川橋亦名信至唐高祖武德七年

移於海虞城至齊門即今治也若縣所以名之義則未有攷意者海虞以山南沙以地而

常熟則或以土壤膏沃歲無水旱而名歟

楊備

詩有歲歲多收常熟田之句意亦可見今縣境有常熟山在縣北三十餘里本名銅官山

唐天寶中改為常熟山又別名曰琴川此其

顛末也縣治前後橫港凡七皆西受山水東注運河如琴弦然今僅有一二通流

餘皆堙塞或云五浦注江亦若琴弦或又云取言游弦歌之意然弦歌乃武城事於此言

之則成附會矣

縣境

縣在郡東北百有五里東西九十里南北一百

里是為提封之境東五十里入崑山縣界西四

十里入江陰軍江陰縣界南五十里入長洲縣

界北五十里至楊子江以江為界是為四正之

境東南九十里入崑山縣界以花瀆口為界東

北一百一十里入崑山縣界以浪港浦為界西

南一百一十里入常州無錫縣界西北一百七

十里入江陰軍江陰縣界是為四隅之境至杭

州四百六十五里

縣城 諸城附

縣有城古制也張璠為福祿令治為百城最呂

又爲綿竹令政爲諸城首古今地里志縣以城  
名者不一常熟縣城其廢已久而墅落諸城名  
尚可攷前志云縣界相傳有城十二而舊所載  
者石城金鳳城尚墅城九里城凡四而已訪之  
近地有鵝城扈城朗城莫城餘未知其詳今縣  
東三十里有陶城閭城郭城利城皆有遺址而  
陶城尤大與莫城等合前志所載九城共十有  
二城縣接江陰東西相距僅百三十五里南北  
七十三里而城若何其多耶按唐廣明中盜賊  
羣起詔諸道州縣於墅落許立城堡集民兵自  
衛城多或恐以此

縣城 前志云縣城周迴二百四十步  
高一丈厚四尺今不存

石城 吳越春秋夫差興樂石城越絕  
書曰石城闔廬所置美人離城也吳地  
志云吳王離宮越王獻西施於此今縣  
北五里有石城里

金鳳城 在縣西北四十里

尚豎城

在縣北十八里

九里城

在縣北九里

鵝城

在縣東南

扈城

在縣北五里

朗城

在縣東南

莫城

在縣南十二里

前志云莫城俗傳是莫耶鑄劍之所亦謂之劍城今有小廟云莫耶大王是也或謂之鎔鄒城有塘曰莫門縣

東四十里又有莫城按寰宇記漢莫

寵所築以捍賊因名

陶城

在縣

郭城

在縣

利城

輿地志云晉元帝以海虞縣北境之土山立利城以處流民

門

建炎間令李闔之建

東曰行春

在縣東由三里橋虹橋梅

西曰秋報

在縣西由嶽廟虞山小山

葛墅河陽蔡舍慶安出江陰軍界門外即尚湖水曰西柵

南曰承流

在縣南由三里斜橋出吳塔至長洲縣界入府水曰南柵

北曰宣化

在縣北由虞山北出頂山至市橋雞籠墓出尚墅

東北曰介福

在縣東北由五里牌丁涇塘尚墅出福山至江水曰北柵

坊

市必有坊尚矣裴中令之集賢坊白太傅之履道坊昭君坊之繁盛處士坊之淒寂皆足以觀里仁驗民風也前志載常熟凡十二坊曰言偃文學德政和風惠政隱僊崇德化合信義開元清真常平今皆不存或謂管之坊今悉為巷如子游巷意即言偃坊歟而今之坊十有三則又各有其義

製錦坊

在縣治之右與飛鳥坊相對舊名太平坊

飛鳥坊

在縣治之左與製錦坊相對舊名仁壽坊

富民坊

在縣東

春風坊

在縣東以春風樓相對故名

興福坊

在縣東北以崇教興福寺故名



壽安坊

在縣西何家橋

叢桂坊

在縣西北以冷副端兄弟連登科故名

衍慶坊

在縣西北通慧日寺

聚星坊

在縣西北以錢丘富諸寓公皆居此故名

袞繡坊

在縣西北以曾丞相居此故名

紫微坊

在縣西北以崔紫微居此故名

虞山坊

在縣西北以登虞山故名

興賢坊

在縣南以縣學居其左故名  
本名學道坊前令王燾建後令別稱改今名

○巷

紀瞻之居烏衣巷顧雍之居黃鸝巷皆因圖乘而傳縣有子游巷故後世以子游為吳人者以巷而知也

吳國言公東巷

在縣西北舊名子游巷

吳國言公西巷

在縣西北

市心巷

在縣西

青果巷

在縣東商賈交易之地

新街巷

在縣東

金駝巷

在縣東南

廟巷

在縣東南

鎮橋北巷

在縣西

白家巷

在縣東南

朱師巷

在縣西北邵巷南

曾家巷

在縣西南養濟院南

邵巷

在縣西北

何家巷

在縣西以何家橋故名

冷家巷

在縣東北

捕盜巷

在縣東北

○廟學

黨有庠遂有序二十五家里門有塾古之鄉校

也郡縣分而鄉校廢宰百里而興學者載於歷

代之史不過數十人他無所見然大槩則亦鮮

矣宋均在辰陽禁絕淫祠修立學舍仇覽在蒲

戒大亭子弟羣居遣就齋舍劉梁在新城朝夕勸

馮伉在醴泉論發蒙書訓迪學子令遇在餘姚

首崇學校教勸生徒義安在吉安清歌弦管  
呼此世道之所以不古也常熟縣學在縣東南

二百步夫子廟居其中

大成殿額乃宣和中頒降

按祥符圖

經至聖文宣王廟在縣南五十步以今地勢攷

之不合然夫子廟其來舊矣而學宮之制未詳

慶元志略不及之獨堂宇舊棟題至和者二得

非慶曆有詔逮至和始創學歟淳熙十年令曾

祭加尊名講堂曰進學紹熙元年令葉知幾夏

曰明倫舊有齋九曰崇德時習好謀朋來利仁

隆禮育英守卓隆德後所存四齋曰尚志尚德

尚賢尚文端平初邑令王燾以其卑陋湫隘積

久滋弛日惟覆壓是懼且廟處于學併雜喧溷

尤非所以尊事先聖乃因故址闢而新之放郡

庠之制東為廟廟之前為殿門又前為櫺星門

兩廡繪從祀徒吳公祠于殿後東建六先生祠

堂

濂溪周先生 橫渠張先生 明道程先生 伊川程先生 晦菴朱先生 南軒張先生

西為學前為學門中橫經乃曰明倫東西兩

廡各列職事位序於其傍次為肄業之齋凡六

曰志道據德依仁游藝曰稽古

藏祭器祭服官書

曰尚

賢

即小學也專以教育言氏子孫別為廩給詳見四明袁尚書甫記

明倫堂後

爲直舍齋廬暨庖廩器具增造悉備總爲屋百二十楹加於舊者幾半而高闊壯麗則非舊所可髣髴也增置學糧至千斛訓導課程秩然有序學之庶事於是畢舉而講學修身所望於學者則甚切矣

詳見臨邛魏樞密了翁記

○吳公祠

吳公祠慶元三年令孫應時建爲屋三楹在明倫堂之東偏朱文公爲之記至寶慶間令惠疇以其卑狹乃更建于學之東門廡堂室幾三十楹識者復議其位序失宜且規模高廣殆過於殿尤爲非禮至是令王燾旣遷禮殿乃徙是祠于殿之後始爲宜稱故其上梁之文有曰自東自西兩嚴廟學之制在前在後兼妥師友之靈蓋叙其實云

○社壇

常熟社壇在縣西一里三十步莫攷其創築之始紹興甲戌令任古淳熙辛丑令陳映嘉定辛巳令葉凱皆嘗修治然規模粗備禮制終未盡

合加以地勢拘逼湫隘特甚嘉熙改元令王爚  
乃因故址闢而新之東西二十丈南北十七丈  
按政和祀式參以朱文公問答及武昌記所載  
爲五壇四壝東社西稷居前北向東風伯西雨  
雷師居後南向與社稷相背中隔以墻壇皆三  
成前二壇趾各方二丈五尺兩成三成各殺尺  
崇二尺後三壇址各方一丈六尺兩成三成各  
殺尺崇八寸壝四門社稷各壝方四丈五尺高  
三尺五寸瘞坎二居壝外之西北風師爲一壝

方二丈八尺高二尺五寸兩雷師同爲一壝高

如風伯而方倍之

甲居壇之南

南北各爲齋廬三間

西北爲大門扁以社壇

袁甫書

繚以周垣焚以堅

甃而植以松栗與土之所宜木於是始稱國家

欽崇命祀之意

知府事敷陽王尚書遂爲之記

○公廨

單父之堂言游之室廣昌縣之廳事山陰縣之  
門堦見棠思召千古如存長百里者求稱其居  
可也

縣廨 多治平間屋廳之東北有琴堂  
紹興中令孔瓚重修淳熙中令劉穎改  
爲學愛甲辰令曾蔡新作寢室舊有君  
子堂共賦堂歲久多圯廢慶元戊午令  
孫應時乃一新之又於廳之東創笑軒  
葺其後圃爲亭曰友山西爲夾牆繚垣  
寢室後以通西偏爲亭於西北曰是亭  
亭之南卽共賦堂堂後累石爲山竹木  
陰翳與君子堂通嘉泰壬戌令何究重

建縣廳頗雄壯開禧戊辰令葉凱於隔  
舍之南闢軒曰簾晝寶慶丙戌令惠疇  
於後圃創景言閣紹興辛卯令史彌厚  
治東圃建堂未名後令戴衍扁曰讀書  
堂嘉興丁酉令王爚因學愛堂之舊重  
行改創易曰道愛淳祐辛亥令別桷治  
西圃移讀書堂於其中有亭曰直節遂  
廢東圃云

丞廳 在縣治之東淳熙初元丞張孝

伯重建廳事其燕坐曰涉筆曰篤素  
簿廳 在縣治之西與丞廳相對淳熙  
間簿蕭遠重修廳事有燕坐曰愛蓮靜  
暉寄隱淳祐辛亥簿唐世忠復新其堂  
榜曰均政

尉廳 在縣治之北二里隣順民倉紹  
熙中尉趙笈夫所創廳事後小閣曰樂  
山向西諸峰屏列几案間改曰挹翠後  
爲隣居障蔽無復曩時之勝易曰斗室

北有小圃圃有二亭曰藏春曰野趣歲  
久堙蕪而尉解亦頽圯矣淳祐戊申尉  
周介夫葺而新之廳廡堂宇視簪加壯  
廳之西偏軒曰梅隱後圃臨流築亭曰  
濯纓

○館驛

市有候館周制也漢十里有亭唐三十里有驛  
皆所以爲往來次舍廬宿也竇兢爲鄆令增修  
郵舍張希顏爲萍鄉令完葺驛傳史類稱之驛

舍之修理是亦足以觀令之政云

縣東驛

在縣東南

琴川驛

在縣南承流門裏西向漕渠舊址曰南亭嘉熙初元令王煥增闢一新榜今名

甘棠館

在迎恩橋之東後更名八仙館紹熙五年令葉知幾更曰和旨堂

弦歌館

在縣西南二十步縣令葉凱更名百花堂今為賞心亭

○亭樓

于東陽嘯課於涵碧亭李虞城遊憩於蠡丘館

世率謂其游亭館而廢事然觀柳子厚論作邑者以為氣煩則慮亂視壅則志滯君子必有游息之物高明之具使之清寧平夷常若有餘然後理達而事虛則夫嘯詠游憩之地所以養其清明而為政之助也若夫楊炯為盈川令多治亭臺書榜美名則非為政之所急矣

宣風樓

在縣治西紹熙辛未令曾慎建紹熙四年令葉知幾更曰慶豐自此至賞心亭皆權

燕喜樓

在縣東



旨清樓

在縣西北

春風樓

在縣東迎恩橋

賞心亭

在縣西即舊弦歌館

極目亭

在虞山上乾元宮前前眺平疇一目無盡雙湖橫陳諸山

縣樓

歷歷可數最為登覽之勝舊曰望湖令徐次鐸更今名承平時所建頗壯麗紹興一十年太守徐琛篆額乾道間令趙善括易以林東篆刻石于廳事側慶元巳未春令孫應時修之左右各有亭左曰御章手詔右曰寬恤事件

○橋梁

嘗觀宋天聖三年蕪湖令董黃中浮橋政成仁宗嘉其有愛民之惠詔縣民愛護以圖永便則知縣有橋梁所以便民也為令者亦不可不於此究心焉

縣橋

在縣治前十五步步

沈家橋

在縣西俗呼染

市曹橋

在縣西

琴川橋

在縣治直南跨運河舊名信義淳熙十年令曾榮重建改今名有曹緯記俗呼跨塘橋

迎恩橋

在縣治直東

文學橋

在縣東北百五十步舊名言  
偃橋俗呼醋庫橋按舊圖經  
言偃橋在縣東一百五十步  
文學橋在縣東北一里而前  
志併二橋為一未知何故

通濟橋

在縣東北俗呼坊橋

瞿橋

在縣東北舊志有隱仙和風二  
橋其名不存以方隅步數度之  
則二橋疑是

廣惠橋

在縣東北舊名通泰紹興間  
錢氏新之少卿陳揆書其名  
曰廣惠俗呼通江橋前者老  
猶記海舶常至邑郭故邑市

有通江橋

慶僊橋

在縣西南

顯星橋

在縣東南二百五十步父老  
相傳昔有星墜地為石尚存  
今在橋之東大數十圍深不  
知其根故以名橋旁有涇曰  
落星港

善利橋

在縣西南

昇仙橋

在縣

孩兒橋

在縣西北

順民橋

在縣東北

何家橋

在縣直西舊名和嘉

東何家橋

在縣東北舊名和豐

望仙橋

在縣西南

八字橋

在縣西南

太平橋

在縣東南

鎮橋

在縣直南

焦家橋

在縣東南舊名通利

范公橋

在縣西南

草橋

在縣西南

龔家橋

在縣西南

王家橋

在縣西

中和橋

在縣西南

魚行橋

在縣

天心橋

在縣西北

金家橋

在縣西北

小虹橋

在縣東南俗呼洞橋

黃栢橋

在縣西北

包家橋

在縣西北



俞家橋

在縣西北

○倉庫

唐令籍帳傳驛倉庫河隄雖有專當皆縣令兼總之宋淳化三年嘗詔縣令之任風化所由宜躬撫字縣令不許監筦倉庫竊謂凡爲縣者固不當以貨財爲累然倉場庫務所合糾察管胡綱爲河內令每親詣縣倉人以善政歸之則以高雅自將而不屑屑於此者亦非縣令之所貴也

順民倉 在尉治之東東臨漕渠治平

二年令向宗旦建

郎淑爲之記

其屋南北西

爲列紹熙四年常平使者徐誼給錢修其西慶元三年丞傅良新其北四年令孫應時新其南嘉熙元年令王爚以比年倉米之餘散蓄塔院爲非便乃包東北舊址官廢解地入焉增創敖屋十間然後寬綽有餘矣

常平義倉 在順民倉之北廡

省庫 在縣廳之右

苗倉庫 在縣廳之左

國用庫 在縣中門之西廡

○務

酒稅務 在縣東北坊橋規模整備比  
年醞造爲數不及於前務止爲收稅地  
醞造乃移就縣之景言閣猥雜喧併甚  
失建立初意而縣務遂成虛設於是日  
漸傾仆悉不暇問凡舊屋之榷木換易  
竊取殆無復遺餘矣

外福山慶安梅李許浦四鎮各有稅  
務類供郡之版計前此郡惟責團解  
于縣鎮有逋欠悉置不問故鎮官恬  
弗加意月解久益不登縣之難支亦  
其一也嘉定間令葉凱歷陳其弊於  
郡乞勒各鎮徑自發納郡守林侍郎  
采慨然從之惟福山以兼酒故尚仍  
舊貫至淳熙初令趙師簡復有請乃

如三鎮例酒稅併自納於郡焉

市易務 在尉廨西南後廢為民居今

猶有市易務巷

軍糧庫 在縣治西南後廢

醋庫 今但存醋庫橋

○營寨

縣掌游徼兵古制也晉志縣令統賊曹掾史兵曹都亭皆主縣兵宋制縣有戍兵則兼都監次兼監押後復兼軍正之職而營寨則各有其地

焉

○營

開江營 錢氏有國時所創宋因之有

卒千人為兩指揮第一指揮在常熟第

二指揮在崑山按朱長文志錢氏置都

水營田使以主水事募卒為都號曰撩

淺當是時欲富境禦敵以是為先務宋

天禧天聖間吳中水災命發運使張綸

同郡守經度于崑山常熟各開眾浦以

導積水景祐中范文正公來治此州值歲歉深究利病以謂淞江不能盡洩震澤之水當疏導諸邑河渠東南入淞江東北入于楊子與海於是親至海浦開浚五河論者沮之公力破浮議疏滄積潦民受其賜云後大理寺丞周環言平江低田多爲水浸蓋諸浦中白茅浦最大今爲淤塞望令有司於農隙開決俾北派流通實無窮之利詔漕臣措置旣

而副使趙子瀟知平江府蔣璨言咎在于常熟之北開二十四浦疏而導之江後爲潮汐沙積而開江之卒亦廢乃詔察院任古覆視及古至常熟言五浦通江委是快便今乞止于常熟招寘百人益知五浦之利害者蓋五浦皆注于江東則白茅浦東北許浦正北福山浦西北黃泗浦奚浦五浦常浚則潦無漲溢之虞旱獲灌溉之利邑名常熟實本

諸此耆老猶記海舶常至邑郭故邑市有通江橋而許浦過梅里鎮潮汐迅急鎮橋之下往往壞舟至開月河以殺水怒至紹興丁卯康舉之作招貞庵記猶云邑去江不及程陂湖畎澮之積自南至者傾馳入于江江潮旣急則迅瀾倒流逆于市橋之下二水相制移時不能去意者開江之卒它無所役專以戛迭浚治五浦前人經畫之意深矣自朱勔

進花石綱盡奪諸營卒以往而二邑之開江營遂空紹興初猶有老弱居之後徙入州至今府之役隸往往有開江兵士之目而此邑之營地爲尉司教場久矣自丁卯至今五十年五浦淤塞已甚至或委曲如一線水旱之患歲臻識者嘆恨焉尉司舊教場在順民倉後又有捕盜院在通濟橋之東北今皆廢焉

○ 寨



許浦水軍寨 在縣東北七十五里乾道六年初自明之定海分屯于此是時也正值孝宗銳意中原而以海道爲虞故用馮湛計使度地形便以立此軍先是建炎紹興隆興用兵時水軍嘗戍江陰亦頗分守福山及許浦爲要害之地方湛分屯之初許浦極深濶實可藏戰艦東出海門料角之間勢與膠西相直然比十餘年來許浦淤塞戰艦非鑿塢不可容非潮盛不可浮浦外沙渾亦益隆起潮雖盛大艦裝重亦不能出海道有變其應接非便也議臣或請稍分屯顧逕識者謂今顧逕雖形便安知不復爲許浦之堙塞要之江沙往來開塞不常未如定海依山立寨正瞰深海爲天設之要地也水軍凡八千人平江府給其錢常熟崑山吳江輪給其糧中外諸官皆受于官庾此獨煩縣自載而輸

之軍彼得制其槩量大爲三邑之害前  
令何究有請于朝令軍中遣隊將受糧  
于官庾其害遂息軍人利其水脚之費  
亦所樂爲吳江崑山陰受其賜

許浦巡檢寨 土兵一百四十四名額

福山巡檢寨 土兵一百四十四名額

白茆巡檢寨 土兵一百四十四名額

捕盜院 元在通濟橋東今廢

尉司教場 在縣卽古開江營基也舊

在順民倉之北

○義阡

賑貧恤孤瘞骸掩骼仁政也宋元符崇寧詔旨  
具在固爲政者之所當先焉

養濟院 在縣一在東北  
一在西南

漏澤園 在縣北宣化門外

義阡 在宣化門外明府塘橋之北嘉

熙元年令王爚市民地爲之四繚以墻

前列楨門凡葬者占地廣□尺修□尺

屬其事報慈命僧主掌別創屋三間以居之又買田六十二畝米四十二石歲收爲給養費詳見勸諭文并規約

勸諭文云古人之法必犯大惡則焚其屍今風俗之弊子孫曾不以爲異只是習慣不以爲事今有狂夫醉人妄以其先人棺槨一彈則便爲深讎巨怨及親拽其遺骸納之火中則略不以爲怪可不哀哉右河南程氏先

生語世人有没于遠方者子孫火焚其柩收燼而歸葬夫孝子愛親之肌體故斂而葬之殘毀他人之屍在律猶有嚴禁況子孫乃悖謬如此其始蓋出于羌胡之俗浸染中華行之旣久習以爲常見者恬然曾莫之怪豈不哀哉右溫國司馬文正公語吾邑本先賢故里近幾樂郊宜其道義興行風俗醇厚養生送死不背禮經而

焚屍一事反視他邦爲甚

只如無錫江陰近在

隣境亦聞未嘗如此

因仍習倣安以爲常不孝

不仁莫大于此只緣善教不明佛法

滋熾日沾月染民胥從之佛本是胡

人火化乃是其國之俗凡有死者聽

命緇徒廣爲齋設雖重費而弗靳至

于謀葬則百端算較衆口沮難甚至

惑于陰陽之說以因葬致禍爲憂

大抵只欲一舉遺骸竟投烈焰以爲

省便之計不惟閭閻貧細爲此雖潤

屋儒冠亦鮮有墳墓之可守者豈不

痛哉夫生民與禽獸異中國與夷狄

異正以其人倫之親恩義無盡而先

王制爲喪禮因其天性以節文之衣

衾棺槨以謹其終事葬埋祭祀以久

其哀思一有不至則吾心爲之不安

此生民所以爲貴而中國所以爲尊

也彼胡羌之俗譬若禽獸浮屠氏之

立教固已背棄倫理絕滅種類則其  
死後以天生地長可貴之身取快于  
灰飛煙滅而甘心者不足怪也若乃  
吾民家家氣脉世世流通有子有孫  
慎終追遠此乃天經地義之常永無  
息歇何忍舍正道徇異教陷爲禮法  
之罪人而終不知懼耶且生而爲人  
身體髮膚孰不愛惜今旣幸免毀傷  
歿以正命而瞑目之後爲之子者反  
不與之保全衛護使飛走之羣終受  
炮灸之禍惟是父母亦置不卹有人  
心者一念及此寧不內自摧怛而亦  
何顏戴天履地乎是非順逆有不難  
見令爲吾邑之痛傷久矣詢之故老  
邑舊有義阡凡數處歲久堙廢無從  
修復雖見有叢冢又以囚死或客死  
者埋瘞其中故吾民恥列于此今謹  
倣周官墓大夫之制遵國朝漏澤園

之令別卜義阡一區專爲細民宅葬之所環以百堵限以重門又爲之建屋市田以贍守者凡可爲經久之計無不用其至是用諄切告戒開曉爾民使知正道之當由異教之不當徇而無以令之言爲迂焉晉程純公之宰晉城也俗尚焚屍純公教諭而禁止之民咸信從令雖德薄莫望前賢然拳拳愛民者實與純公愛晉城之

民同一心也爾民其尚聽之庶几下以成移風易俗之美上以廣昭天漏泉之澤若死若生兩無所憾所有司馬溫公程先生勸戒二條義明意切讀之感動備揭于右方云右今勸諭各宜知悉嘉熙元年八月日承議郎知平江府常熟縣主管勸農公事王燭

池

放生池 舊卽破山興福寺白蓮池爲之乾道間令趙善括改就東塔崇教興

福寺

洗馬池

在縣北六里父老云紹興初尹團練者屯兵防江洗馬於此故名

三角池

在縣北十二里

興賢池

在虞山乾元宮嘉定間鑿池得石有興賢池三字烏石鎮唐時有之鎮名其

**鎮**

青田鎮始於唐歟

福山鎮

在縣北四十里臨江

慶安鎮

在縣西北八十里臨江本石

闔市舊有石門今不存

許浦鎮

在縣東七十里臨江紹興間

於此置鎮

梅李鎮

在縣東三十六里慶元志云

吳越錢氏時遣二將梅世忠李開山戍

此以防江北南唐之兵居民依軍成市

因取二將之姓以名其地故云梅李市

元豐間始爲鎮舊智林寺佛殿拜石刻

作梅李乃至和中題則里當作李明矣  
後版曹易李爲里恐是一時之誤遂因  
之或引史記注吳地記秦伯所居之梅  
里及皇覽說秦伯所葬之梅里與今梅  
里竝列爲三者殆弗深攷  
常熟鎮 在縣東百二十步今廢縣猶  
有鎮橋在焉  
塗菘鎮 在縣東南一百五里元豐間  
去鎮爲市

○市

祥符圖經所載嘗熟縣舊有七市今存者四耳  
續增直塘楊尖二市

縣市 今廢

梅李市 今爲鎮

石闔市 今爲慶安鎮

練塘市 在縣西南去縣三十六里

支塘市 在縣東北去縣百里

甘草市 在縣東北去縣百五里舊志



云甘樹市

塗菘市 在縣東北去縣百五里舊爲  
鎮元豐間省爲市

楊尖市 在縣西南去縣四十五里

直塘市 在縣東南去縣九十里

○ 崗

按吳郡志常熟有三崗福山崗徘徊崗塗菘崗

○ 酒坊

縣有外坊十一輸課雖不繫于縣然私釀犯禁

縣得理焉故附見

戶部酒坊四名以贍軍吏部揭闕課入版  
曹而兩浙漕臣領其事月解詣漕司

塘頭

河陽

原塾

支塘

本府酒坊五許民間買撲或郡自遣吏給  
本措置課入輸郡

梅里

尚墅

徐鳳

塗菘

陸河

馬軍司酒坊二殿司馬軍出戍金陵軍中

自遣牙校莅酒政後亦許民戶買撲

莫城

五林

以上諸酒坊課額盈虧縣皆無與各  
分疆界彼此酒不越境境內或有私  
釀則訴諸縣縣為懲治而已



重修琴川志卷一  
終




重修琴川志卷二

叙縣

縣界

第一界 顯星橋至南柵過跨塘橋街  
 東北至縣前西入壽安坊塔東直止東  
 子游巷街南轉東南青果巷迎恩橋西  
 止丞廳南止縣學西

第二界 跨塘橋街西直上西何家橋  
 丁家茶坊入壽安坊街西止西子游巷



街南直上善利橋至錢通判宅止西柵  
第三界 顯星橋東直上文學橋東堍  
入巷街南止東塔寺後河南河北  
第四界 塔後西起坊前東止東柵北  
止北水柵

第五界 東子游巷街北起止瞿家橋  
西南止丘監丞宅街東一帶西北過橋  
直下至廣惠橋西堍街北向西轉北止  
尉司街西直上邵家巷東止北旱柵東

第六界 北旱柵西起一帶止東南包  
家橋西一路上葛莊基西南止陳茶監  
街北正教院後門北沿街

○ 鄉都

九鄉五十都

按郡圖經舊十有二鄉  
有太平欲行昇平三鄉  
元豐九域志併爲九鄉

感化鄉 在縣西北 管都七

第一都

管里四

虞山 武昌  
小山 新興

鄉村四

山前湖村  
寶嚴寺前

小山  
下祁

管民田一萬八千四百八十一畝

五十四步係中則

諸色官田八百九十七畝一角半

步

○ 第二都

管里三

小山

崇信

日安

鄉村六

塘頭  
野塘

顧莊  
湖莊

東水頭  
河伯市

管民田二萬四千二百九十二畝

一角三十一步係中則

諸色官田一千二百一十八畝二

角五十八步

○ 第三都

管里四

日安  
昭墟

崇信  
安仁

鄉村十二

鄒莊  
沙堰

周莊  
城綴

夾舍  
充陂

五林  
錢市

孫舍  
柴村

道林

東西花林

管民田二萬九千二十畝一角二

十四步係中則

諸色官田六百九十四畝三角五

十一步

○ 第四都

管里四

昭墟 崇信  
栢城 顧山

鄉村十一

杜朱堰 白塔堰  
宗母宅 西石請

石塘 陳塘 羊莊  
楊尖 黃屯 後莊  
馬市

管民田二萬五千二百二十一畝

三角三千步係下則

諸色官田二百五十五畝一十三

步

○ 第五都

管里三

小山 遺愛 日安

鄉村十二

麻鞋 鍾綴 大和  
晏莊 陳黃 支市  
毛巷 嶺村

錢市 晏村  
李甜市  
東石請

管民田三萬五千九百四畝三角

五十二步係下則

諸色官田七百六十六畝三角二

十步

○第六都

管里六

宣慈西陽

小山通道

國昌山陽

鄉村九

中市童莊

陸市富市

于塘潘塘

東于市

伍市

管民田三萬五千七百二十六畝

一角八步係下則

諸色官田八百八十八畝三角二

十二步

○第七都

管里三

翔鸞

通道

宣慈

鄉村七

錢莊 蔣舍 頂山

蔣祁 林莊

塘宅 顧莊

管民田二萬六千三百一畝三角

四步半係下則



諸色官田七十一畝一角二十一  
步

崇素鄉 在縣西 管都三

○第八都

管里三

山陽 元陽 河陽

鄉村二十

陸塘 朱村 徐岸  
東徐 西徐 西莊  
水北 張市 蔡舍  
袁市 怯村 英舍  
魏莊 黃村 虎忽  
祁村 至塘  
東邵市 河陽坊前  
西邵市

管民田四萬四千六百五十一畝

四十一步係中則

諸色官田三百一十一畝三角三

十六步

○第九都

管里三

元陽 新莊 歸仁

鄉村十

湖下 厚村 邵巷  
焦宅 中澳 下澳  
田莊 河陽橋  
河陽山前 陶蘆舍

管民田二萬六千六百五十二畝

二角二十六步係中則

諸色官田二百八十七畝三角

○第十都

管里三

南金

歸仁

修仁

鄉村七

北莊

蔡舍

孔涇

凌莊

蔡村

塘橋

管民田二萬一千九百四十五畝

三角五十二步係中則

諸色官田一千二百八十九畝一

角四十七步

南沙鄉 在縣西北 管都六

○第十一都

管里三

敬真

永定

修真

鄉村七

烏村

徐舍

塘下

金莊

閔莊

一作闕莊

慶安寺前

東邵舍

管民田二萬八千六百八畝三角

四十三步半下則

諸色官田二千八百四十七畝二

角五十四步

○第十二都

管里二

修仁 昌陽

鄉村七

沙港 新產 界涇 高市  
東檀祁 西檀祁

管民田二萬五千二百七十八畝

一角四步係下則

諸色官田二百三十四畝三角三

十三步

○第十三都

管里三

昌陽 陳致 修仁

鄉村五

陳陸園 新莊 楊澳  
黃泗浦 王十二店

管民田一萬五千五百六十一畝

二角三十三步係中則

諸色官田八百五十六畝一十八

步

○第十四都

管里三

修仁 陳致 伍相

鄉村八

蘆舍 毛巷 戴巷  
尹涇 姜村 榮莊  
草舍 一作長  
奚浦橋

管民田二萬二千八百二十四畝

二角九步半係中則

諸色官田六百二十四畝四十五

步

○第十五都

管里五

宮城 開元 永昌  
崔明 伍相  
孟市 尹市 邵塔  
新安 李埭 候村

鄉村八

盆社 西官城

管民田三萬二千八百四十二畝

五十四步係中則

諸色官田六百一十八畝一角三

十九步

○第十六都

管里三

江平 永昌 何墅

鄉村八

東屋 景市 李烏  
潘祁 下臯 桑舍  
西山 蒲林

管民田三萬六千七百三十六畝

一角五十八步係下則

諸色官田三百七十三畝三角三

十五步

端委鄉 在縣東北 管都六

○第十七都

管里四

一作伍相 靈芝

宮城 言偃

太平

慕善一本無上二里名

鄉村十

吳涇 陶舍

孫巷 稠巷

謝莊 西山

蘆浦 陶山

鰻魚浦 西楊橋

管民田一萬九千三百九十三畝

一角四步係下則

諸色官田七百一十一畝二十六

步

○第十八都

管里二

慕善

承化

鄉村五

河瀼 新漕

吳涇 安樂

崔浦橋

管民田三萬四百一十四畝三角

三十八步半係下則  
諸色官田一千四畝四步

○第十九都

管里三

承化

永安

崇德

鄉村五

黃鶯中沙

耿涇崔浦

野兒漕

管民田三萬三千四百二十四畝

二角一十二步係下則

諸色官田三百畝三角二十六步

○第二十都

管里三

永安

太平

崇德

鄉村七

千步涇太平寺徐六涇

馬暢瓦浦

鄔溝黃泥

管民田五萬四千四十九畝三角

一十七步係中則

諸色官田三千二百二十七畝三

角四十九步

○第二十一都

管里三

崇善

青山

承化

鄉村八

大空

新庄

高墓

青村

花莊

陶舍

管民田五萬六千八百二十五畝

一角七步半係中則

諸色官田一千六百一十七畝二

十四步

○第二十二都

管里二

承化

慕善

鄉村七

花莊

花社

檀林

陸莊

福山

管民田二萬七千七百二十五畝

二角五十二步係中則

諸色官田四百五十一畝三角四

步半

開元鄉 在縣東北 管都四

○第二十三都

管里五

和興

欽豐

孝慈

鄉村八

尚舍

河市

付子

高市橋  
西下市

管民田三萬四千九百九十一畝

二角四十四步係中則

諸色官田五百二十六畝二角一

十五步

○第二十四都

管里五

翔鸞 興國

孝慈 承化

懷遜

鄉村七

陶莊 周市 東下市

葉莊 辛莊

九折 下莊

管民田四萬六千二百九十七畝

二角一十三步係下則

諸色官田一千三百八十三畝二

角二步

○第二十五都

管里二

懷遜

懷仁

鄉村十五

陳莊 瞿舍

辛舍 西顧

黃莊 宮璉

九里 三村

辭莊 鄭莊

東顧

孝塘 沙盆段 孝一作哮



西曹莊  
雉浦橋

管民田一十一萬二千五百三十  
九畝四十一步係上則  
諸色官田七千七十六畝一角三  
十四步

○第二十六都

管里三

習善 德仁 太平

鄉村七

菰里 笋村 陶涇  
李村 馬及  
勝法寺前  
東漕莊

管民田七萬五百三十二畝三角  
三十二步係中則  
諸色官田六千九百一十七畝二  
角八步

思政鄉 在縣東南 管都五

○第二十七都

管里四

集賢 道義  
昭德 永安

鄉村八

楊塘 真門 長毫  
北舍 沈塔 施村  
均村 徐鳳坊前寺涇

管民田九萬二千七百二十二畝  
一角三步係下則  
諸色官田六千六百二十畝一角  
五十五步半

○第二十八都

管里一

昭德

鄉村四

南港  
北港

東西李墓  
李渭橋

管民田四萬七百八十八畝二角  
三十二步半係中則

諸色官田二千七百六十六畝三  
角四十四步

○第二十九都

管里二

昭德

習善

鄉村五

賀衫橋  
白蕩橋

羅濁  
逆上

包糜

管民田三萬二千一百五十九畝  
二角五十一步係中則  
諸色官田三千三百九十八畝三  
角三十步

第三十都

管里二

新安 昭德

鄉村八

朱堰 翰村 五浦  
黃泥 唐浦  
徐六涇 新莊 一作窪  
官竹園

管民田四萬四千六十七畝五十

七步係中則

諸色官田二千三百四十七畝三

角五十一步

第三十一都

管里五

昭德 楊王 高浦  
白艾 金涇

鄉村七

高浦 金涇 白艾  
海頭 宮莊 凌莊  
黃沙

管民田四萬八千七百八十二畝

三角五十四步半係下則

諸色官田五千一百一十六畝五

十八步半

雙鳳鄉 在縣東南 管都十二

第三十二都

管里二

集賢

昭德

鄉村五

西桑林  
高可甲

沙營  
包橋

海頭

管民田五萬四千一百九十八畝

三角二十三步係中則

諸色官田五千九百八畝三角一

十五步

○第三十三都

管里一

清化

鄉村四

東桑林  
西顧莊

六河  
下六河

管民田三萬一千六百六十七畝

一十八步係中則

諸色官田五十六畝一角七步

○第三十四都

管里三

集賢

清化

永寧

鄉村五

上錢涇  
下錢涇

東顧莊  
撐脚浦

黃涇

管民田四萬四百七十四畝二角

四步係中則

諸色官田四千六百九畝一角五

十六步

○第三十五都

管里四

清化 嚴舍

陌莊 錢涇

鄉村六

甘草 彭李

澧湖 堰頭

成村 陳穆

管民田三萬九千九百八十八畝

三角三十二步係下則

諸色官田五千五百三十四畝三

角五十八步半

○第三十六都

管里三

北浦

嚴舍

錢涇

鄉村四

高蘆 東嚴舍

大浦

泊莊

管民田五萬四百七十六畝三角

三十一步係下則

諸色官田一千六百七十五畝二

角五十四步半

○第三十七都

管里五

石堰 夫差

輪洞 保安

福順

鄉村三

穿山

石堰

塗菘

管民田四萬四千四百四畝一角

三十六步係下則

諸色官田四千一百八十五畝一

角二十九步

○第三十八都

管里三

無愁

集賢

石城

鄉村八

桂村  
盧荻  
北港

漕湖  
八赤  
東丫涇

徐鳳  
南港

管民田五萬三千五百六十九畝

一角四十一步半係下則

諸色官田五千七百七十九畝一

十二步

○第三十九都

管里六

石城  
楊波

進賢  
散坵

七浦  
陳莊

鄉村六

沙頭  
曹莊  
西丫涇  
眉涇橋

雙鳳  
六莊

管民田

管民田七萬一千七百八十六畝

二角四十九步半係下則  
一作中則

諸色官田一萬四千三百七十九  
畝二角三十五步半

○第四十都

吳塘 進賢

管里二

鄉村六

直塘 斗門

三橋 朱巷

瞿涇 任陽

管民田五萬九千九畝一角五十

二步係下則

諸色官田二萬一千三百二十六

畝二角五步

○第四十一都

集賢

管里一

鄉村四

支塘 河舍

坊前 赤沙

管民田三萬六千七百一十六畝

三角三十一步係中則

諸色官田二千一百九十八畝二

角一十七步半

○第四十二都

集賢

吳塘

管里二



鄉村十三

周莊 羅磨 周涇 張塘  
馬莊 畧舍 下廟 秋塔 馬涇 市宅

管民田一十二萬九千六百二十

二畝二角八步係中則

諸色官田三萬七千六百八十三

畝二角一十五步

○第四十三都

管里三

進賢 吳塘 莫耶

鄉村十

莫城 潭塘 洋澳 時澤 舍澤 黃涇 朗城 辟澤 畢澤 三家村

管民田七萬五千一百二十一畝

二角二十六步係上則

諸色官田二萬二千五百一十三

畝一角一十八步

積善鄉 負郭并縣南 管都二

○第四十四都

管里四

懷仁 東沼 郁澤 青村 一作墩



鄉村九

五瞿 過莊 祐村  
斜橋 青亭 呂舍  
張港 於沾 沼頭

管民田一十萬五千九百三十七

畝一步係中則

諸色官田九千八百一十五畝三

角五十六步

○第四十五都

管里二

扈城 石城

鄉村八

陳市 瞿市 茆市  
錢市 觀莊 大步

興福寺前塔下  
瞿家店

管民田二萬一千七百一十六畝

二角三十二步係上則

諸色官田八十九畝一十八步

歸政鄉 在縣西南 管都五

○第四十六都

管里五

青村 齊門 孝節  
安仁 儀鳳

鄉村十

時村 尚湖 南塘  
下莊 金市 藕蕩  
柴涇 斜橋下 塘  
戈市 惠洞涇

管民田五萬一千三百八十六畝

二角二十四步係上則

諸色官田二千八百二十三畝三

角四十六步半

○第四十七都

管里三

孝節

儀鳳

義遜

鄉村七

北下莊 秦塘橋

練塘市 鄒黃墓

胥塘一作磨 尚湖村西

諸岸

管民田二萬三千七百七畝五步

半係中則

諸色官田五百八十九畝三角一

十步

○第四十八都

管里二

義遜

懷仁

鄉村十三

陳埭 顧涇

朱巷 吳塔

錢舍 界程

蔣店 荻村

陶舍 平市

蔡姑

石灰渭 東顧莊

管民田六萬六千六百一十七畝

二角五十步係上則

諸色官田三千五百七十九畝二

角三十八步

○第四十九都

管里三

義遜

三遜

誠信

鄉村十

前周 東祁

李祁 惠舍

鶴窠 韓莊

鳥嘴 宛山

西蔡姑 西顧莊

管民田三萬五千三百四十二畝

三角三十二步係中則

諸色官田五十九畝四十步

○第五十都

管里四

承節 義遜

誠信 三遜

鄉村八

東舍 錢塘

馬贖 蒲陂

惠市 西舍

楊尖市 瞿里村

管民田一萬九千一百四十一畝

一角四十一步係中則

諸色官田二畝二十步

重修琴川志卷三

叙官

縣令古子男也齊晉曰大夫魯曰宰楚曰尹  
曰令漢大縣置令小縣置長晉洎隋皆然唐  
專名曰縣令其官屬漢則有丞尉名為長史置  
諸曹掾晉置主簿錄事記室功曹之官而無丞  
尉梁隋以來復置丞尉設曹佐唐有丞尉錄事  
主簿司功司倉等官皆分掌一縣之治此歷代  
沿革然也乃若治縣之本則學道愛人格言具



汲古閣  
毛氏

在而邑先賢言游之施于武城者尚可攷故作叙官

自虞農都尉廢乃由太康為縣置宰以來攷之傳記戴顓何子平李暎周思輯之外無開焉殆攷之未博歟宋朝太平興國三年錢氏納土令是邑者蔣文懌為之首至俞彥與六十四人前志僅存姓名階位而到罷歲月則不知也乃博求故實隨所得注其下嗣有見則補之若紹興二年施壩而來以迄于今則壁記班班矣故今編年具列且間附其所建置以詔永遠至于時事之或相關繫者亦併著之

縣令

前朝

戴顓

按南史戴顓求為海虞令出官吳下土人共為築室聚石

引泉植林後隱白鵠山

何子平

按史作海虞令□□史戴前有江康之何後有鮑照

唐

李 曠

元和中見新開常熟塘碑

周 思 輯

給事中守常熟縣令咸通中  
祀白龍于破山寺十三年見  
破山龍堂記

宋

宋用縣各置令縣大各有兵馬者以京  
朝官或三班知縣事咸平中詔令兼兵  
者陞朝為都監餘為監押慶歷以後始  
用文臣以知縣兼兵事崇寧二年行三  
舍法諸縣令佐簿尉並帶主管學事完  
和三年罷紹興十三年復帶淳熙三年  
不入銜紹興二十一年令曾慎題名記  
略云常熟舊毗陵郡南沙縣梁改為常  
熟自梁迄偽吳尹是邑者姓名莫紀宋  
朝太平興國中錢氏以圖籍歸始于縣

令蔣文懌至元豐初知縣劉拯求得其  
姓名凡四十二人列之板榜自此來者  
之則書

宋縣令題名

南沙望邑而縣令題名不載於史張旭  
一對之微妙于草聖猶傳於後而況子  
男之職烏可無聞哉宋自錢氏納土今  
是邑者蔣文懌為之首以至俞彥嶼凡  
六十有四人皆不著其到罷年月故無  
得而稽焉紹興二年施堦以來迄于今

歲月井井觀其題名則其賢否可得而知也

太平興國三年錢氏納土

蔣文懌

朝奉郎試大理司直行常熟縣令事兼監察御史太平興國四年止七年○遷白龍歸頂山寺見龍母墳堂記

崔彤

李璨

夏侯延祐

朝散大夫行上柱國淳化四年見仁王院帖

裴署

承奉郎守大理評事知縣事監酒稅茶鹽至道禪院記併

王世昌

二年見重修仁王禪院記并修延福院記作守光祿寺丞祕書省校書郎

盧永

李獻誠

太子中舍

張川和

衛尉寺丞

許駙

張士廉

康作

承奉郎守祕書省著作佐郎大中祥符三年見龍堂碑陰

文祖 懷州人左史攀五世伯

韓宗幹

張舜

韓常

吳繼宗

胡順之

李文順

胡晏

楊寵

張霖

李衡

何知至

楊文敏

陳漸

梁佐

張士程

晁宗恪

著作佐郎天禧中見寶嚴寺

一作盛

國子博士

太常博士知縣事兼兵馬監

押天聖三年見淨慧院帖朝

奉郎屯田員外郎知縣事兼

兵馬都監騎都尉天聖四年

見乾元宮紫微殿記又五年

見破山梁僧道戒碑

大理寺丞

太常博士

太子中舍

一作至能

屯田員外郎

太子中允 胡霜有送行詩

殿中丞

贊善大夫

殿中丞

贊善大夫○宗恪前有宗裕

晉案晁宗裕字孝先原州臨

涇人登進士第試祕書省校

書郎歷青州從事改著作佐



范琪

馬耿

江中孚

桑澥

張貴和

成偉

盍著

向宗旦

陳知白

饒珙

郎知常熟縣遷秘書丞又案  
宗恪字世恭以世父迥思補  
將作監簿知其利  
理溝防民賴其利  
朝散大夫行太常博士知縣  
事兼兵馬都監管縣界塘岸  
公事騎都尉慶曆六年見寶  
嚴院佛殿記  
國子博士

殿中丞

宣德郎守尚書都官員外郎  
知縣事兼兵馬都監管勾塘  
岸公事騎都尉至和初見乾  
元宮修造記又嘉祐三年見  
勝法寺新  
十方記

駕部員外郎

衛尉寺丞

殿中丞光祿寺丞知縣事  
兼兵馬監押嘉祐七年見渾  
慧寺

帖

宣奉郎守太常博士知縣事  
兼兵馬都監及管河塘溝洫  
公事治平二年見順民倉記  
又治平三年見瑞石庵記作

守祕

朝奉郎駕部員外郎  
琪送圓照歸瑞石詩碑  
見王

祕書丞

李執柔

大理寺丞

李佑賢

太子中舍

王子韶

太常寺丞

趙君章

寧海軍節度推官

崔貽孫

太子中舍

劉拯

將仕郎守祕書省著作佐郎  
元豐二年見頂山發路記作

宣德郎淨慧院元豐六年  
狀稱知縣宣德郎

宋順國

奉議郎

王植

通直郎元祐二年見明因院  
改禪寺記

林會

通直郎元祐五年見破山重

項瞻

刊二詩碑  
承議郎

吳勉

奉議郎

朱之劭

承議郎

徐齊

奉議郎

胡庶

宣德郎

柳恣

宣德郎

趙岷

承議郎崇寧丙戌至大觀改  
元見跋趙清獻公詩

傅裔

承議郎知縣兼管學事勸農  
公事兵馬都監及管縣界河

馮躬亮

塘溝洫事武騎尉大觀三年見頂山龍祠記承議郎

黃呂衡

衡前志作衍宣德郎政和四年見壽聖院及永慶一作樂寺結

朱彥求

奉議郎政和五年見新建宣

李光

宣教郎政和七年見東嶽行祠記又政和戊戌見勝法寺詩刻及智林寺題壁上虞人官至參知政事諡莊簡通直郎

宋晦

奉議郎

吳祖仁

朝奉郎

高大中

承議郎

石集

承議郎

建炎以後

淳熙八年令陳映續題名記略云映不佞來既年所始閱次中興以來為令者至映其名氏授受月而日之鑱石壁端以告來者

丁未建炎元年

高宗即位于南京每縣忝置武尉一

李闔之

右朝請郎建縣四門○前志止稱建炎間今姑列于此

二年

三年

車駕初幸杭州韓世忠自海道領兵從縣赴郡會張浚勤王之師

俞彥璵一作璵左朝奉郎歲月莫攷仍前志

四年 兀术犯吳李閻羅屯兵于縣

紹興元年

二年

施堦

右通直郎知縣主管勸農公事兼兵馬都監六月至四年四月

三年

罷武尉

四年

陳適

右通直郎七月至五年八月

五年

夏元亨

右奉議郎十月至六年六月

六年

祝邦翰

右奉議郎九月至七年十月

七年

八年

上官世靈

一作美右宣教郎四月至十一年四月

九年

十年

十一年

詔李椿年行經界

劉寬

右承議郎四月至十三年三月

十二年

諸縣令佐簿尉復帶主管學事

十三年

許聿

右宣教郎六月至十五年三月

十四年

十五年

孔瓚

右通直郎四月至十七年八月

十六年

十七年

王筠

右承議郎十一月至二十年十一月

十八年

十九年

二十年

曾慎

右通直郎十二月至二十二年八月  
建宣風樓

二十一年

二十二年

任古

左朝散郎十二月至二十五年十月  
晉案修社壇記作

陶任古又水利攷政和間詔  
監察御史任古

二十三年

修社壇

二十四年

二十五年

右奉議郎正月至二十七年  
正月

柴叔仁

二十六年

二十七年

右通直郎五月至三十年六  
月

王子渭

二十八年

二十九年

三十年

莊班

右通直郎六月至三十一年  
五月

三十一年

沈功永

左宣議郎七月至十二月

慎知柔

左通直郎十二月至三十二  
年九月

三十二年

未癸  
隆興元年

鮑格非

左從事郎三月至二年三月

二年

唐光謙

左奉議郎九月至乾道二年二月

乙酉 乾道元年

二年

孫份

左宣教郎五月至三年九月

三年

四年

趙善括

左奉議郎六月到任七年八月以賑濟有勞特轉一官十一月差通判平江府

五年

六年

始分定海水軍屯于許浦

七年

王宗已

奉議郎十二月至淳熙元年六月差監登聞鼓院

八年

九年

甲午 淳熙元年

劉頴

承議郎七月到任二年以水利有勞特轉一官至三年七月

二年

三年

令佐簿尉主管學事不入銜

陸瀛

通直郎七月至五年九月

四年

五年

何濛

奉議郎九月至七年五月

六年

七年

林京

一作宗

通直郎九月至十月

陳映

通直郎十二月至八年九月

八年

修社壇

九年

曾蔡

宣教郎五月至十一年十月

十年

修學

重建跨塘橋

十一年

重建縣衙寢室

十二年

晁子溫

通直郎四月至十四年四月

十三年



十四年

陸相

通直郎八月至十五年七月

十五年

十六年

周復

承直郎四月至紹熙元年正月

庚戌 紹熙元年

程準

宣教郎以文名四月至二年四月

二年

姚俱

宣教郎十月至三年四月

三年

四年

葉知幾

儒林郎辟差三月至慶元二年四月

五年

乙卯 慶元元年

二年

孫應時

通直郎以文行名創言子祠于學四月至五年六月有惠愛既滿太守挾私憾以倉粟累欠三千斛見問士民感德擔負願代輸不聽竟坐貶秩罷至今人思之○晉案公臨

行作詩謝邑人云牛車擔負  
愧高義豈知薄命非兒寬

三年

四年

五年

朱燾

通直郎六月至八月

邵公翰

通直郎十月至六年八月

六年

辛酉 嘉泰元年

何充

宣教郎八月至三年正月

二年

重建縣廳申請許浦軍糧就倉支給  
創望湖亭

三年

婁孝則

宣教郎五月至四年十月

四年

縣重建城隍廟

乙丑 開禧元年

王良臣

宣教郎正月至十月

二年

何叔忱

宣教郎二月至十二月

三年

葉凱

宣教郎辟差二月到任嘉定二年四月以平反冤獄得旨任滿與陞擢差遣在任轉通直郎三年三月滿替修學申請三鎮稅錢自行納郡刊琴川志

戊辰嘉定元年

修社壇

二年

三年

徐次鐸

宣教郎以文名二月到任五年三月離任

四年

五年

趙師耀

宣教郎八月到任七年十二月通判廬州

六年

七年

錢厚

宣教郎以文名十二月到任至八年三月避親離任

八年

趙崇志

奉議郎八月到任至十一年九月滿替

九年

十年

添置嘉定縣

十一年

張珽

九月以宣教郎到任十三年轉通直郎七月特差僉書寧海軍節度判官廳公事

十二年

十三年

十四年

沈璞

正月以承奉郎到任八月轉承事郎十五年轉宣義郎十六年十月離任

十五年

十六年

十七年

陳仲埴

三月以宣教郎到任七月准勅兩易知紹興府餘姚縣

惠疇

七月以奉議郎到任登極恩轉承議郎磨勘轉朝奉郎賞典轉朝散郎寶慶二年七月滿替

乙酉 寶慶元年

二年

三年

趙師雲

八月以通直郎到任紹定三年八月滿替

紹定元年

二年

三年

史彌厚

八月以奉議郎到任六年八月滿替

四年

五年

六年

章吳亨

八月以通直郎到任端平元年四月離任

甲午 端平元年

王燭

八月以奉議郎到任嘉熙元年以職事修舉轉一官當年

除提轄左藏庫制云扈農古  
官也句龍棄之任漢以後猶  
以大儒鄭康成輩為之又其  
後專用文俗吏古意微矣爾  
立身秉端靖之操歷官著挺  
直之名出總賦輿張弓之勢  
稍弛入贊廟謨改弦之化有  
助擢之卿列仍兼宰旅夫積  
貯天下之命出納有司之事  
爾方今耗蠹吾之財用者非  
兵與吏乎汰冗去濫是非有  
司之所得為汝其與吾大臣  
議所以變通之策以副朕用  
儒者治金穀之意可副朕用  
縣學教育言氏子孫復修  
經界結立義役修社壇  
創義阡建道愛堂建

琴川館

琴川卷一

二年

三年

丁酉 嘉熙元年

戴 衍

十月以奉議郎到任三年除提轄左藏庫

二年

三年

四年

趙師簡

三月以通直郎到任淳祐三年三月滿替

辛丑 淳祐元年

二年

三年

張從龍

三月以宣教郎到任四年八月離任

四年

劉 渠

十二月以宣教郎到任七年正月離任

五年

六年

七年

趙與翊

三月以奉議郎到任除提轄權貨務再畱任八年四月除

八年

別桷

六月以通直郎到任十年  
月差行在提領所幹辦

九年

十年

十一年

石森

九月以宣教郎到任至十二  
年正月離任

十二年

鮑廉

四月以宣教郎到任至寶祐  
元年四月轉通直郎至寶祐

癸丑 寶祐元年

二年四月辟差充沿江瀾置  
使司幹辦公事修飾琴川志

二年

三年

程在孫

二月以宣教郎到任  
通直郎至四年五月以憂去  
官講行鄉飲

四年

王文雍

五月以通直郎到任至六年  
六月十日準省割除提領  
戶部犒賞所主管文字重修  
縣樓置刻漏重修頌春手詔

興復縣務創兩務官廳重浚  
縣前河并浚福山塘砌承流  
門并慧日寺前街建寶祐新  
隄修承流門秋報門修明版  
籍

五年

六年

丞 一員

熙寧四年中書劄子諸縣主戶二萬以  
上難治乞置丞一員于是諸縣始有丞  
崇寧中或改主簿充丞大觀四年令兩  
浙相度不係繁難縣丞竝罷政和二年  
復置建炎元年詔如係嘉祐以前員闕  
及萬戶縣方許置丞餘並罷紹興初縣  
及萬戶竝置丞

宋

郭三益

元祐進士

王

朝散郎元豐二年見頂山贊  
路記

陸韶

文林郎主管學事大觀三年  
見頂山龍祠記

魯詹

文林郎主管學事政和五年  
見宣惠侯廟記

林友

文林郎

劉敦

修職郎

周冲



陳宗盤

紹興八年三月以通直郎至

陳份

紹興十年三月以朝奉郎賜  
緋至

朱旗

紹興十二年四月以承議郎  
賜緋至

王大隱

紹興十四年七月以承事郎  
至

胡履泰

紹興十六年八月以宣議郎  
至

李孝純

紹興十八年六月以宣議郎  
至

蘇楷

紹興二十年十一月以通直  
郎至

俞民康

紹興二十二年十二月以奉  
議郎至

黃伯達

紹興二十四年十二月以宣  
議郎至

江續之

紹興二十七年二月以承議  
郎至

黃綉

一作誘紹興二十九年四月以通直  
郎至

鄭穆

紹興三十一年四月以朝奉  
郎賜緋至

胡伯廉

隆興元年六月以承議郎賜  
緋至

宗嗣尹

乾道元年八月以通直郎賜  
緋至

趙伯儋

一作信 一作儋乾道三年十一月以奉議郎  
至

秦焯

乾道六年三月以承議郎賜  
緋至

黃夏

乾道八年四月以宣議郎至

張孝伯

淳熙元年七月以文林郎至

施遲

淳熙四年七月以宣議郎至

木師顯

淳熙七年十二月以宣議郎至

沈梓

淳熙十一年二月以宣議郎至

康丕祖

淳熙十三年六月以奉承郎至

蔡興文

淳熙十五年十月以從政郎至

傅巖

紹熙二年四月以承直郎至

趙公傅

紹熙四年十月以承事郎至

趙善勣

紹熙五年十一月以承議郎至

傅良

慶元元年三月以儒林郎至

姚汝龍

慶元三年四月以從事郎至

丘壽邁

慶元五年六月以宣議郎至

趙端

嘉泰元年八月以宣議郎至

張旣

開禧元年閏八月以承直郎至

趙善箴

嘉定元年十月以承奉郎至

詹彭祖

嘉定二年四月以宣議郎至

廖覲

嘉定四年四月以承務郎至

趙必愿

嘉定五年二月以承務郎至

蔡駿

嘉定七年八月以從政郎至

蕭好古

嘉定十年八月以承務郎至

趙時份

嘉定十二年十月以承奉郎至

劉南

嘉定十四年十月以承直郎至

趙希翺

嘉定十七年十二月以宣議郎至

陳昉

寶慶元年十一月以修職郎至

趙汝溥

紹定二年三月以承務郎至

孫沂

紹定四年三月以承直郎至

趙希魯

端平元年四月以承直郎至

傅亮

嘉熙元年十月以儒林郎至

賈喚

嘉熙四年閏十二月以承務郎至

錢宜之

淳祐二年三月以儒林郎至

孫由義

淳祐五年四月以承務郎至

錢學祖

淳祐七年六月以從事郎至

蘇速

寶祐元年七月以迪功郎至

郭端朝

主簿 一員

開寶元年詔諸縣千戶以上依舊置承簿尉三員紹興十二年臣寮奏勅業之初人物稀少乞將東南縣小而事簡者簿常闕員而尉兼之其後縣滿萬戶置

丞而簿猶闕朱異劄子萬戶以下縣分  
已不差丞却  
此去處竝特專置主簿一員從之

唐

蕭存

按蕭存字伯誠穎士之子亮  
直有父風能文辭浙西觀察  
使李棲筠表為常熟主簿見  
唐史蕭穎士傳  
會稽人常熟主簿見杜子美  
盧氏墓誌邑志俱失載新志  
又載顏頓字仁純魯公真卿  
兄弟常熟令顯之弟見顏氏  
祠堂碑

宋

李

大中祥符元年見淨慧院改

程冕

賜院額帖  
院主簿淳化四年見修仁王

劉元同

將士郎試祕書省校書郎至  
道二年見修仁王院併延福

錢振

登仕郎天聖三年見淨慧院

李居正

將仕郎天聖五年見乾元宮

夏侯詢

將仕郎慶曆六年見寶嚴寺

余卞

將仕郎嘉祐三年見勝法寺  
新十方記又七年見淨慧院

廖昇臣

登仕郎熙寧元年見順民倉記又治平丙午見瑞石庵記

兼河塘

許異

將仕郎守主簿兼管河塘溝洫元豐二年見頂山焚路記

徐布

元豐五年見破山八詠碑石

張叔達

兼河塘溝洫元祐二年見明因新改禪院記

鄭僖

將仕郎大觀三年見頂山龍祠記

陳廩

登仕郎政和五年見宣惠侯廟記

趙子淙

右迪功郎紹興三年見重修嶽廟記

趙憲

右從事郎紹興六年見嶽廟石座記

王

右從事郎紹興十五年見慧日寺度僧公據

趙彥清

隆興癸未見龍祠呂真文感應記

淳熙八年以後

蕭達

淳熙八年八月以迪功郎至

趙汝汲

淳熙十一年十月以修職郎至

施季熊

淳熙十四年十二月以修職郎至

黃直史

紹熙二年四月以修職郎至

張拭

紹熙五年九月以修職郎至

趙彥侯

慶元三年七月以迪功郎至

趙師夔

慶元六年八月以迪功郎至

鮑端亨

嘉泰四年正月以迪功郎至

盧子及

開禧二年十月以迪功郎至

曹仲珪

嘉定二年十二月以承直郎至

陳逢堯

嘉定六年正月以迪功郎至

張正巳

嘉定六年十二月以承直郎至

李昌祖

嘉定七年十一月以文林郎至

趙汝邲

嘉定八年十二月以修職郎至

王澤

嘉定十二年二月以修職郎至

臧忠輔

嘉定十五年七月以承直郎至

趙孟孫

嘉定十六年十月以從事郎至

李興宗

寶慶元年七月以修職郎至

趙希弘

紹定元年十月

洪坎

紹定四年十月

趙善從

端平元年十月

張必達

嘉熙二年二月

趙汝肫

嘉熙四年十一月

趙時喆

淳祐四年十一月以修職郎至

唐世忠

淳祐七年十二月以迪功郎至

游祀

淳祐九年十一月

舒斗祥

淳祐十二年七月

俞文炳

寶祐三年十月以迪功郎至

尉

一員

建隆三年十二月詔盜賊鬪訟頃因兵革遂委鎮都虞候只許管當鎮郭下煙火當其鎮每縣置尉一員因以縣戶口數盜賊事每縣置尉一員因以縣戶口數定弓手額有差建炎元年詔兩浙路依河北例招致弓手樞密院乞各添差武人縣尉一員本縣指使一員招致弓手以五百人為縣兼領仍置將領部將紹

兼興四年罷今尉銜內帶巡捉私茶鹽礬網

唐

張旭

初仕為常熟尉有老人陳牒求判宿昔又來怒其煩老人曰觀公筆妙欲以藏家耳因問所藏盡出其父書視之天下奇筆也自是盡其法見唐書李白傳見歐陽詹送之序

宋

許

趙善言

字從之初調常熟尉

李順之

文林郎至道二年見修延福禪院記及修仁王院記

胡賑

守縣尉天聖三年見淨慧院  
帖文林郎天聖四年見乾元

宋盛

殿記宮紫微  
登仕郎慶曆四年見寶嚴寺  
佛殿記

楊惟善

將仕郎嘉祐三年見勝法寺  
新十方記守縣尉嘉祐七

丁惟一

年見淨  
慧院帖  
將仕郎兼河塘溝洫治平丙

陳于

午見瑞石庵記  
文林郎試祕書省校書郎  
守縣尉兼管河塘溝洫元豐

葉之漸

二年見頂山焚路記  
元豐五年見破山八詠碑石

洪彥昇

兼河塘溝洫元祐二年見明  
因寺新改禪寺記

嚴挺民

將仕郎主管學事大觀三年  
見頂山白龍祠記

吳驤

將仕郎政和五年見宣惠侯  
廟記

強公邵

右迪功郎紹興三年見重修  
福山嶽廟記

王敏

修武郎添差紹興三年見重  
修福山嶽廟記

趙子溥

右迪功郎紹興六年見福山  
石座記

紹興二十九年以後

卓元龜

紹興二十九年十一月以修  
職郎至

李緘

隆興元年二月以從政郎至



劉永平

隆興元年五月以從政郎至

趙善熙

乾道二年十月以迪功郎至

李楠

乾道三年十一月以迪功郎至

葉嶷

乾道六年十二月以迪功郎至

章昭祖

淳熙元年二月以從政郎至

李閑

淳熙四年四月以迪功郎至

程逵

淳熙七年四月以迪功郎至

李擴

淳熙元年十月以迪功郎至

米巨源

淳熙十三年二月以迪功郎至

章賡

紹熙元年二月以修職郎至

趙笈夫

紹熙四年四月以迪功郎至

曾達

慶元六年六月以迪功郎至

劉祖邁

慶元六年六月以從事郎至

莫燾

嘉泰元年八月以迪功郎至

李相

嘉泰二年八月以迪功郎至

薛宦

開禧元年七月以迪功郎至

黃應酉

嘉定元年八月以迪功郎至

施居仁

嘉定三年四月以修職郎至

趙崇歡

嘉定三年十一月以從事郎至

鄒孟

嘉定四年九月以迪功郎至

趙希謹

一作謹

嘉定六年六月以從事郎至  
端平三年九月因酬賞改承

趙希燿

嘉定七年十一月以修職郎至  
任滿酬賞改承奉郎

陳照

嘉定十年十二月以迪功郎至

侯璘

嘉定十四年正月以迪功郎至

余紹祖

嘉定十四年九月以迪功郎至

趙崇璋

嘉定十七年正月以文林郎至

顧顯道

俞夢得

淳祐二年十二月以迪功郎至

○監務

二員

慶曆以來竝以茶鹽酒稅署 今但酒

稅近年求權職者因緣本府差為提督

○監官

二員

重修琴川志卷三

終



重修琴川志卷四

叙山

龜蒙巖巖魯邦所瞻地必有山以爲之鎮焉常  
熟潮汐之壖雖無層巒疊嶽可與岱嵩王屋等  
然虞山自虞仲而得稱標揭圖乘舊矣此外雖  
小大不倫亦皆爲一方之表識況夫名賢逸士  
選奇而遊憩高僧羽人擇地而棲托勝槩具存  
蓋不可以沒其實也故作叙山

山



虞山 在縣西北一里一名海隅山高一百六十丈周回四十六里六十步山海經注云吳之烏目山也陸澄吳地記云本吳之虞鄉孫權置虞農都尉於晉太康二年改爲海隅孫以其東臨滄海故也越絕書云虞山巫咸所居此舊志所記也山雖無峰巒而蜿蜒起伏略如卧龍隨處望之形勢各異山之巔堆垤磊塊纍纍然如蓬顆似皆人力爲之或疑古人葬處其中大抵壘

石爲槲巨石覆之自邑市入虞山門卽登山半里至半山亭躡山脊而上至乾元宮前有極目亭下瞰萬家平挹兩湖南望姑蘇諸山北見大江最爲絕勝又西北行山脊四望蓋空迴過普照寺廢址至維摩庵林木茂密可愛稍北下山腰有石屋可坐十許人相傳太公避紂于此其傍流水平布石上激激可愛有顯親禪院覺海庵傍有石洞天將雨輒出雲氣又西北行山脊

有拂水岩下臨山阿崖壁峭立水落兩石  
間微風激之濺灑霏霏故名山南北址皆  
臨大道南道出秋報門循山而西致道觀  
嶽祠皆瞰山之麓又過吳王廟五六里而  
有張氏光祿亭亭前有大杏一本花特茂  
異父老相傳幾二百年俗謂之杏花亭有  
宗丞富元衡篆額甚奇古張君桺嘗爲三  
衢守花時邑人遊賞不絕今杏已不存亭  
亦改爲佛舍矣又其西曰谷林參議虞似

平之圃有亭曰退耕曰翠微其名虞似良  
仲房所隸書叅議亦善隸且能詩今爲富  
民所有山巔有巨石石中分爲兩望之如  
劍痕俗傳吳王試劍石今馬帥周虎墓在  
其下墓前有亭臨流曰劍溪又西北至寶  
巖寺山之南境盡矣其北道出宣化門循  
山而北過寶慈寺六里西北入破山興福  
寺寺多古跡臨龍鬪澗山腰有光明庵再  
出西北行十二里入頂山寺登白龍祠跨

小嶺至上方院高崖曲澗林木蒼鬱俗謂  
之小靈隱轉而下有中峰瑞石庵又有水  
簾之勝在焉是爲山之北境此其大略也  
若夫山之爲名括地志則曰海禺吳郡志  
則曰海虞續志則曰海巫祥符圖經則曰  
海禺爲名不一至於虞山之得名見隋志慶  
元志引□□記謂本吳之虞鄉孫權置虞  
農都尉於是山因以爲名然吳越春秋載  
吳太子娶齊女病而死曰必葬我虞山之

巔以望齊國越絕書又曰虞山巫咸所居  
則虞山之名吳越時已有之矣竊詳此山  
恐因虞仲而得名按史記虞仲卽仲雍奔  
吳而葬此山之上或者因以名其山史有  
兩虞仲一字仲雍爲吳始祖一周章之弟  
仲始封於虞亦曰虞仲周章都安邑稱曰  
虞城則仲雍所居稱曰虞山理或有之更  
俟博議者訂焉晉按史記索隱云夏都安邑南故曰夏虛左傳曰太伯虞仲太王之昭則虞仲是太王之子必也論語稱虞仲

夷逸隱居放言是仲雍稱虞仲今周章之弟亦稱虞仲者蓋周章之弟字仲始封於虞故曰虞仲則仲雍本字仲而又爲虞之始祖故後代亦稱虞仲所以祖與孫同號也

按朱長文志海嵎山在常熟有二洞穴側有石壇周六十丈山東二里有石室吳仲雍周章闔閭長子竝葬此山山西北三里有越王勾踐廟梁昭明太子作招真治碑云虞山巫咸之所出也高岩鬱起帶青雲而作峰瀑水懸流雜天

河而俱會又云其峰有石城石門卽此山也石屋意卽所謂石室而二洞不見其一石壇及諸墓亦不知孰是

破山 亦虞山之別山因白龍鬪衡山而去故曰破山

頂山 去縣十八里乃虞山之別山未至山有齊女峰高二十丈周八十步亦頂山一峰相傳齊景公女葬於此

龍母峰 在縣西北十八里卽頂山之一峰



龍祠在焉

烏目山 慶元志引山海經曰虞山即烏目

山按吳地志海虞山北有烏目山今頂山

之南有烏目山界于山有烏目澗景祐間

陸果題烏目山詩是也元豐三年邑尉陳

陽是為隅山以瀕海之隅也又名虞山以

昔人虞治于此也山北行九里為破山以

鬪龍衝破山為澗又北行九里為頂山又

北行六七里為小山山之南北相距纔三

四十里而名已不一矣又

合而名之或曰烏目山也

小山 在縣西北二十里高十七丈周四里

一百步

福山 在縣北四十里高九十五丈周五里

本名覆釜山其形似也唐天寶六載改為

金鳳山梁乾化三年又改今名東嶽行祠

在山之麓

小竹山 在縣北四十一里高五十丈周三

百步

崇德山 在縣北三十八里高六十五丈周

七里三十步舊經云晉處士夏統宣城太

守邴臻所居

常熟山 在縣北三十七里高一百五丈周

七里本名銅官山唐天寶六載改今名

永安山 在縣北三十六里二百步高七十

四丈周圍二百四步舊經云梁范冀之昆弟同居此山又云即

下范山也

范山 在縣北三十六里二百步高七十四

丈周二里四步舊經云梁范冀之昆弟同

居此山因以為名

河陽山 一名鳳皇山一名小山在縣西北

四十五里高一百二十丈周七里舊志云

出山藥詳見鳳皇山永慶寺所載

志山 在縣西五十里高九十丈周四里一

百步與河陽山相對近歲村民鑿池得唐

時墓中斷碑上云葬於鷺山之下然則當

為鷺今碑在富民樊氏家

穿山 在縣東南一百四十五里高一十七

丈周二百五十步山有石洞前後通徹可

以往來故名

苑山 在縣西南五十里一百步高四十丈

周五里

山有墨池石色純黑土人采以作硯不亞端石

靈龜山 在縣西北五十里高一百七十丈

周二十一里東南屬常熟西南無錫界西

北江陰界俗呼為三界山亦曰顧山又曰

香山

塢丘山 在縣東南二十七里近昆城湖三

里

重修琴川志卷四 終

重修琴川志卷五

叙水

襟江帶湖管人以侈洪都之雄也常熟亦髣髴焉大江枕其北諸湖貫其中而東海渺瀰其後近環吾境之外則夫水利便宜江防條畫所當精講而預謀也故作叙水

江防

大江在縣之北與通州對境自福山之江口至縣三十六里福山居長江下流險莫甚



焉然自古國於東南者類置而不問吳孫  
權時西陵舉火達吳郡南沙晉趙石堪遣  
兵寇南沙海虞雖此備彼寇皆由江道然  
未嘗專以福山爲慮也吳志載庾闡揚都賦江曰孫權時合  
暮舉火西晉以爲縣晉書載記石勒傳晉  
將軍遂寇南沙海錢鏐有國始於福山置  
戍以防南唐之寇宋初混一戍皆省罷建  
炎初嘗分江陰水軍戍福山議者謂虜騎  
入通州勢如牛角尖退有腹背受敵之患

故其戍不常置紹興中呂祉乃請於福山  
置戰艦其言曰大江之險所當固守守江  
之策有三節焉大江之南則宜列戍兵多  
備舟楫以俟濟師錢鏐之備浙西則於福  
山江陰控扼尤緊今誠倣此令鎮江江陰  
福山沿流各具戰艦又於江之中嘗置重  
兵此備真楊通泰之渡江策也又請於福  
山嚴把隘其言曰水軍見屯興化縣所謂  
虜寇頗聞具舟甚久一旦爲官軍迫逐計

無所出必走通泰泰與江陰對岸通與平  
江昆山福山對岸兩處沿江各有岸步可  
渡人馬欲望詔御營使司量遣兵將前去  
江陰福山等處把隘委自兩州守臣措置  
候賊平卽抽兵歸行在未幾虜兵退竟不  
施行淳祐壬寅虜犯通州議臣復有福山  
把隘之請時遣御前軍八百戍福山閱月  
而撤戍淳祐庚戌朝旨乃置兵三百人號  
忠節建寨於福山亦甚當矣但今許浦旣  
宿重兵則控扼福山之議似不必講不若  
合忠節軍於許浦却從許浦分戍于此庶  
事權一爲可運掉也

### 海道

晉劉澄浮海入寇害南沙尉見京則志海道之  
防吾邑尤所急也許浦去海爲近東出海  
門倚角之間勢與膠西相直實今日要害  
之地紹興辛巳淮浙東西路通泰海州沿  
海制置使李寶嘗任招討之責領軍駐許

浦從大洋進山東遂奏膠西之捷乾道中  
用馮湛計始分定海水軍爲三浦置屯時  
許浦深闊可藏戰艦比年以來頗覺淤塞  
外沙潭隆起潮雖盛大艦裝雖重不能出  
海道有變接應非便於是乃有分屯寨兵  
更戍顧逕之議至寶慶間增爲二千五百  
人升爲左軍轄以統制易更戍爲就屯許  
浦旣宿重兵而又得顧逕爲之犄角兩屯  
相望雄于江濟所以爲禦備計者始益詳  
盡矣

○水利

常熟爲邑北枕大江諸湖交貫其中實澤國  
也有陂塘以蓄灌溉有洑瀝以泄漲溢故  
無旱乾水溢而得常熟之名然潮沙易積  
浦渚多壅每賴疏濬浚導之功錢氏有國  
時創開江營置都水使者以主水事募卒  
爲都號曰撩淺宋朝因之有卒千人爲兩  
指揮第一在常熟第二在昆山專職修濬

自郡民朱勛進花石綱盡奪營卒以往於  
是開江營遂空而修濬之事廢矣按紹興  
中大理寺丞環周言平江低田多爲水浸  
蓋諸浦淤塞望令有司於農隙開決俾北  
流通徹實無窮之利乃詔兩浙漕臣措置  
而轉運副使趙子瀟知平江府蔣粲言太  
湖者數州之巨浸而獨泄於松江之一川  
宜其勢有所不逮是以咎人於常熟之北  
開二十四浦疏而導之于楊子江又於崑

山之東開十二浦分而納之於海其浦後  
皆爲潮汐沙積而開江之卒亦廢於是民  
田有淹漫之憂天聖間漕臣張綸嘗至常

熟崑山各開衆浦天聖中吳中水災命發  
運使張綸同守臣於崑

山常熟各開衆浦以導水景祐間范文正公亦開浚五

河親至海浦文正公守鄉郡值歲歉謂松  
江不能盡泄震澤之水當疏

導諸邑河渠東南入吳松江東北入楊子  
江其時親至其地開浚五河疏導積潦皆

受其賜政和間提舉官趙霖又開三十餘浦

此皆見於已行者也政和間提舉趙霖言  
常熟二十四浦除許



浦白茆浦福山浦深澗不須開治外有黃  
泗浦奚浦東西二陳浦水門塘浦崔浦耿  
涇浦魚磧浦塢溝浦瓦浦塘浦高浦金涇  
浦石撞浦陸河浦北浦甘草浦千步涇浦  
司馬涇浦錢涇浦黃鶯浦也宣和元年正  
月霖修築常熟塘岸隨岸開塘又開修崔  
浦自陳家莊至雉浦塘口出海里塘長二  
十三里有畸黃泗浦連小山浦至湖口長  
七十里有畸又築常熟塘岸長六十里有  
畸界岸長四千七百三十一丈十月復應  
詔措置可爲田處修築錢涇口至藕蕩村  
大岸張墓塘北至小山浦山塘涇自小山  
浦口至本縣市河顏家涇徹入今諸浦堙  
小山浦至是年八月內畢工

塞又非前比總計用工三百三十餘萬錢  
三十三萬餘貫米一十萬餘石緣平江積  
水已兩月未退望速行之乃詔監察御史  
任古本路提刑徐康覆視古至言常熟五  
浦通江委是快便若依子瀟所請以五千  
人爲率來歲正月入役月餘可畢又言平  
江四縣舊有開江兵二千人今乞止於常  
熟崑山各招填百人得旨從之遂出御前  
激賞庫錢平江府上供米如其所請之數  
於是卽日興工焉竊攷任察院所奏最爲  
知利害者蓋此邑有五浦皆注于江東則

白茆浦東北則許浦正北則福山浦西北則黃泗浦及奚浦五浦常濬則潦無漲溢之虞旱獲灌溉之利所關不小耆老猶記海舶常至邑郭故邑有通江橋而許浦過梅里鎮潮汐迅急鎮橋之下往往壞舟至開月河以殺水怒而紹興丁卯康舉之作招真記云邑去江不及程陂湖畎澮之積自南壘者傾入於江江潮旣應則迅瀾倒流逆于市橋之二水相制移時不能去可想矣

自紹興丁卯至今九十七年涇浦淤塞至或委曲僅一線之水旣無復開導而陂湖又多包圍成田故水則下流不能遽泄遂決溢以成淹漫一或告旱而上流去水愈遠易成乾涸浙西提舉徐誼所謂昔之中田今爲上田昔之下田今爲中田昔之草蕩今爲下田是也極于寶慶之水嘉熙之旱無所措手大謂邑民之病然則任斯邑之寄者水利源委蓋不可不熟講也

按熙寧三年崑山郊亶獻水利策備述原委亦有可采者文多不盡錄其大略則見之吳郡志中

楊子大江在縣東迤而北與通州對岸自福山江口至縣三十六里

湖

尚湖 在西南去邑四里長十有五里廣九里舊經曰上湖

崑承湖 在東南去邑五里廣長各十八里舊傳有蜃舟人夜行或見之屹如巨岸目

光閃爍海潦□降呼吸雲霧騰駕風濤沿湖之田莽為巨漫田家患之一日有客舟適崑山遇白衣婦人附舟去抵岸忽不見自此湖中無患意即是物也舊經不載按朱長文志唯曰崑湖別有陽城湖與尚湖相對俗謂之八字湖

晉按越絕書云崑湖周七十六頃一畝去縣一百七十五里一名隱湖

馬涇湖 在崑承湖東南接崑山境去邑四十里廣長各五里父老相傳云舊有就水

草牧馬者一夕羣馬驚鳴逸入于水故名  
馬驚今字之訛耳

涇

小娘子涇 在縣治之前循縣治而西折而  
北又西過慧日寺又北沿虞山之趾貫絡  
邑中古以疏泄山水之暴自兵火後民居  
侵塞由慧日寺以西僅存一溝自其東過  
系行 塘亦皆爲浮棚不復通舟故  
法市而早燥無以備火邑民病之嘉

定元年三月令葉凱謂涇之循縣而西者  
皆居民覆屋其上湮塞歲久開浚必動衆  
未易輕議至若貫縣橋而東者一河橫亘  
闐闐疏而導之不獨舟得徑抵井邑且可  
備鬱攸之灾遂捐公嬴募役夫浚治不日  
通流東徹運渠西南水湊航船步公私便  
之或曰本小洋子涇訛爲娘字耳  
山塘涇 在虞山西南小山港在山西北政  
和間父老請于朝開此二涇以殺山水之

暴故田者得免冒沒

○塘

常熟塘 自齊門北至常熟百餘里朱長文志云唐元和中所開古碣僅存其郡守氏李不著名廉使氏韓元和三年韓臯為浙西觀察使疑即臯也緣塘皆有涇浦入于北江蓋醜其渠以洩水則有涇引其流以至江則有浦涇者如黃涇周涇丁涇哮塘黃泗浦奚浦陳浦許浦之類是也而湖之水皆賴以泄焉

鹽鐵塘 亦名內河其口始自黃窰繚繞數百里南接崑山西連江陰不知何代所開所以泄吳松江之水也今不詳其處郊賣稱縣西北六十里有塘唐文宗太和中再開疑此即是

梅里塘 東接許浦西接運河郊賣謂開之使水北入揚子江宣和間趙霖開見前水利注

福山塘 政和間趙霖奏自松江下北繞崑山常熟皆五里有縱浦在常熟塘則為福

山東橫塘福山西橫塘

重修琴川志卷五終

重修琴川志卷六

叙賦

縣令平賦課上郡國漢制也晉縣屬有金倉掾  
隋縣屬有金都曹皆主縣賦至唐以催科為上  
最而縣賦始重迄今大略如之然有土此有財  
土者財之所從出而田為本故禹貢叙九州之  
土之田之賦次第言之者以此常熟以富裕名  
蓋田多而賦衍也自經界不正賦入日狹而縣  
不可支經界正矣賦入無所虧矣而縣益不可



支何哉拘苗有令取無子遺其端則有自矣縣之月解於是一切倚辨於征酷以救目前而愈久愈極將至於無可爲計也可不詳論其故歟故作叙賦

自紹興李侍郎椿年行經界民無隱田田無詭戶而官民兩利焉旣閱百年龐亂紛如州縣之有志力者類欲釐而正之未能盡如所欲也端平間令王爚慨然以身任其事甫及暮年弓量竣訖於是版籍詳而賦役平矣然去今未久也而詭挾竄易類多有之大抵爲規避科役計違禁破約一切不暇恤答之告戒範防幾於蕩然而賦役之弊端寢如故也故今叙版賦之源委一以端平爲據庶幾欲救弊而反本者尙於此有攷焉

版籍

○田

元管田二百三十三萬一千五百六十三畝三角六步半

端平二年修復經界管田二百四十一萬九千八百九十二畝三角一十步  
民田共二百二十一萬九千九十二畝二角一十步

諸色官田共二十萬八百畝五十一步  
官田二萬四千三百一十五畝二角三十四步半

營田三萬七千三百八十三畝一十三步

沒官田三萬二千三百五十二畝三角三十四步半

圍田五萬四千一十六畝二角半步  
養士學田五千八百八畝三角二十

三步半

內府學田內  
本縣學田

荒田六千五百五畝二角三十步  
職田三萬一千六百八十畝三角四十五步

塘塗田三百六十二畝二十四步



許浦水軍都統司寨基田九十七畝  
二十步

河陽坊酒庫田一畝一角四十步

積水茭蕩田三千二百一十六畝一  
角五十步

沙田四千九百六十四畝一十五步  
半

撥賜萬壽寺田九十五畝三角五步

地

元管地計一十四萬八千六百六十畝三  
角三步半

端平二年修復經界管地計二十萬八千  
三十八畝二角五十五步

民地共一十九萬一千五百九十九畝  
三角一十九步

諸色官地共一萬六千四百三十八畝  
三角三十二步

常平地九百六十九畝二角一十五

步

營地共二千九百五十二畝一角四十九步

沒官地三千五百九十八畝三角五十六步

養士學地一百一十五畝一十一步  
荒地二千四百五十一畝三十步  
職地五百八十二畝三步半

塘塗地四百五十七畝二角二步

許浦水軍都統司寨基及鎮寨基地  
共三千七百四十二畝三角三十七步

坊場基地八十八畝二角二十八步半

沙柴場地一千二百六十二畝一角二十步

焚化院地二十畝二角五十步  
廟基地二百一畝一角一十四步

○ 戶口

建隆元年勅應天下縣據見管主戶重  
陞降地望取四千戶以上為望三千戶  
以上為緊二千戶以上一千戶以下為  
中下又開寶六年勅五百戶以下為下  
縣自今後三年一度取諸道州縣見管  
戶口陞降

主戶

客戶

主丁

客丁

僧

道

尼

○ 稅

國初盡削錢氏白配之目遣右補闕王永高  
象先各乘遞馬均定稅數只作中下兩等中  
田一畝夏稅錢四文四分秋米八升下田一  
畝錢三文三分米七升四合取於民者不過  
如此自熙豐更法崇觀多事靖炎軍興隨時  
增益不可勝算至今日而極矣亦合稍思所

以爲民計乎

元管夏稅絹和買絹紬綿折帛錢一千萬

二千三百三十一貫三百四十四文除紹興經

界重誤多椿事故七千四百實計稅錢九萬

四千八百四十九貫四十一文

端平二年修復經界管夏稅絹和買絹紬

綿折帛錢計一十萬四百七十三貫三百

三十七文二分比祖額增夏稅絹等錢五

十六文二分

○苗

元管秋苗七萬四千一百二十石八斗七

升除紹興經界重誤多椿事故三實計苗

米七萬二百五十六石六斗四升

端平二年修復經界管秋苗七萬二千五

百六十一石七斗九升五合比祖額增苗

五石一斗五升五合

此正賦也近年於正賦外以苗爲率復

科納和糴焉蓋吳中和糴自嘉定置百

萬倉始其初一惟坐倉招來而歲莫不以辦足告其後寔有科抑之令極於紹定又極於嘉熙而人戶緣此凋弊者十幾六七矣淳祐宸旨特免科抑於是吳民始復有生意未幾乃踵行之至于今則戶有定數價無甚虧措畫頗亦甚善然執爲成例按爲常行歲歲如之其間病弊固未易以歷數也常熟歲糴多至三十萬石少亦不下十四五萬石連年豐稔粗曰辨事有一水旱其數愈多其價不益一如嘉熙之時將若之何固切憂之然則上之人所宜爲培護本根計稍思所以變通之可也

○常平義倉

按康定二年王琪奏置義倉後罷復增損不常至紹興六年總制司申明大觀指揮每納正苗米一石帶納義倉米一斗零納不上斗者不收義倉此所以備凶荒也若夫常平之

制祖宗朝蓋取沒官田所入專以濟給老疾貧乏不能自存之人今本縣則以常平義倉合而爲一云

○役錢

版帳錢一年兩料共二萬九千八百三十四貫七百一十六文

弓手錢一年兩料共一萬三千七百六貫三百七十文

○酒課

本縣酒課古例郡給糯米二千四百石就縣倉糯米關支又有縣倉斛面可以裨助故醞釀寬剩縣計賴以仰給焉自嘉熙元年郡取糯米歸府輸納歲自府倉支出前項本色付縣盪造而歲計所人始頓狹矣淳祐四年郡併取杭苗歸府却準納糯米價錢付縣自行收糴淳祐七年令趙與翊請于郡乞指畱歲給糯米之數就縣送納而郡不能從續止蒙撥畱折苗一千二百六十三石一斗五升歸

之縣於是本縣却令人戶折納糯米以爲酒  
本謂之折改粳然亦僅及舊例三分之一外  
此則許於板帳內截畱合解錢九百九十五  
貫八百八文錢會中半以充糴麥造麴之用所謂  
酒本如斯而已而本府及倅廳月解板帳爲  
數則甚夥也往年解赴郡帑猶或可以申展  
自淳祐七年徑以合解之數撥充許浦水軍  
券錢就縣支給應副宣限分文不可拖欠頃  
刻不可稽遲而旬解倅廳水軍錢大率亦猶

是也自二月至七月謂之大月分八月至正  
月謂之小月分每月錢數雖有多寡之不同  
以成年計之總計七十五萬三千餘緡往往  
鑿空取辦然亦不過資於酒課耳歲計非得  
清煮酒七千餘石莫能應辦而官資俸給與  
夫支遣饋遺不與焉加以柴灰工食等費州  
家所給旣不足用不免興貸告糴於上戶以  
充醞造又借錢於州郡買酒於外方轉換變  
轉規取什一之贏以爲逐時支撐之計則亦

甚艱窘矣將來築底其憂實多最是水軍打請之時設或措辦不周禍患立見上之人所宜計慮久遠務從寬恤使爲縣者略得以展布可也

○拍店

常熟縣計今旣全仰於酒而酒課之盈虧往往在乎拍店之多寡訪之故老昔年官酒店凡四十餘所其間多儻大家富室房廊爲之續以官司負其儻金乃乘頽弊盡以折去今

所存者樓六亭店十皆官物也拍酒之所旣少則發酒之數甚微加以私酤交行憧憧難遏何望縣計之充盈耶鮑令君廉於是移撥官司空閑舊屋添創拍店七所庶以收拾遺利然類非衝要沽賣實稀而積累增收亦或可以少裨助焉但此邑之吏每視官錢猶已物凡所以肆其侵欺者無所不至後之人亦惟精加考覈焉可也

○醕息錢



舊有醕庫官造醕以取息比年以來撲賣於民每日納息不過十數千椿爲酒務僱夫之用外此又有醕錢責之寺觀庵宇輸納近年其籍散亾止據其見納者每月約千餘緡并歸版帳

○商稅錢

初無定額日據赤曆所收以爲版帳之助然大約日收不過三四十千蓋常熟旣非孔道近年又以淮路多梗商旅類出於他郡而縣稅益寥落無怪也

○上供

縣困於上供甚矣一歲版計至輸七十餘萬緡其間如許浦水軍券錢一項最爲關繫鮑令君廉日以乏興爲慮戴星勤瘁凡奉食燕遊一切痛節所得月俸圭租類置而不問故每僅僅能辦給良亦難矣昔陳待制謙奏疏謂郡縣征利椎斧相臨而縣爲之底驅士大夫作縣如赴湯蹈火是蓋真知爲縣之難者

使其視茲邑之煎熬又將如何哉然則有若  
鮑令君之政亦上之人所宜獎異也

全年版帳通計九十二萬八千八百八  
貫八百四文

內縣庫合發錢七十五萬三千四百  
九十七貫五百九十二文

內丞廳役錢一十七萬五千三百一  
十一貫二百一十二文

許浦水軍券錢四十六萬五千二  
百一十貫九十二文

轉運主管司錢二十五萬一千九  
百四十五貫一百文

常平庫府役錢二萬八千八百八  
十九貫文

五六分錢四千九百九十八貫九  
百文

通判西廳減省僱人錢二千二百  
九十二貫文

提刑司頭子錢一百六十二貫五  
百文

○錢庫

縣錢庫例置于廳事之兩旁此則請官收支  
之庫也若庫子交錢之所則有到廊庫焉本  
縣目今所收別無項目大都不過酒錢商稅  
錢而已舊來廊庫在鼓樓之側去廳差遠每  
日收到之錢漫不可稽續移就中門其相與  
爲欺則猶故也鮑令君廉任內不免將縣廳  
東庫就令交收耳目爲近或易攷察然書手  
與庫搯財賦司通同爲一亦難盡察於關防  
之外要須令書手不得干與錢物庫搯不得  
干與帳目猶庶幾焉又如本縣其他財賦之  
合解上司者吏輩循習舊例往往收于其家  
發於其手弊倖難窮要未易革而亦不容於  
不革也

○職田

提舉使廳九十石四升

茶鹽司提幹廳一百六石六斗六升  
茶鹽添差提幹廳三百四石六斗  
常平司提幹廳九十三石七斗二升  
常平添差提幹廳一百七十石  
轉運司宗室運幹廳四十石  
知府使廳一百八十石九斗五升  
僉判廳三十八石  
添差節推廳六十石  
察推廳七十一石五斗六升

司理廳五十石九斗一升  
司法廳九十三石八斗九升  
糧料廳三十石  
監稅廳九十三石四斗  
監比較務廳二十一石三斗一升  
總管廳二百二十石  
路鈐廳二百二十七石二斗六升  
添差路鈐廳二百二十七石二斗六  
升

路分廳九石三斗六升

都監廳七石八斗

添差都監廳四十八石四斗

監押廳八石七斗二升

添差監押廳一百四十三石二斗二

升

知縣六百八十五石九斗七升

縣丞四百五十五石八斗六升

主簿二百八十五石三斗七升

縣尉二百八十四石二斗二升

監酒一百七十九石八斗六升

監稅一百七十九石八斗六升

梅里監鎮一百二十石八斗

許浦監鎮一百二十石四升

福山監鎮八十五石三斗八升

慶安監鎮二十六石二斗九升

福山巡檢七十四石九斗四升

許浦巡檢一百二十三石八斗三升

白茆巡檢一百二十石

計五千二百八十九石三斗六升

職租并在府諸廳每年入納額管三千六百四十一石五斗三升往歲並支本色又以苗輸縣倉所入豐裕於合支數外每有增益焉自苗歸府縣計空乏既無增益而餘米復不足以供但干支遣且淮淝發運所將上項職租盡行回糴以充軍餉縣家仍有賠貼般運種種之費最是縣吏爲欺捩收入已臨時但以空身抵捱甚則竄逸每歲一易其籍蓋有藉無其田而吏有其租者今回糴一項固未能免而弊之在吏者苟精加考覈無墮其計庶乎租額有稽不至平白爲之失陷也

○縣役人

押錄

舊額二人今以縣事繁冗增差不定

手分

隨手所分差無定額

貼司

引事

廳子

書司

手力

即廳子引事名字請給於丞廳

鄉司

鄉憂

當直人

輪番散番等請給於縣庫茶酒帳設邀喝請給於稅務

雜職

舊額一百六十五名

弓手

弓手輪差每月輪差一名充獄具

牢子

市巡

弓手輪差

所由

斗級

斗子

欄頭

務司

酒匠

柵子

直司

在縣丞催苗稅而已

脚力

凡保正追會之事

僧直司

承受寺院事件

○鄉役人

國朝鄉役人自熙寧行保甲罷耆戶長壯丁而法始變自元祐復耆戶長壯丁猶以保甲而法大變自紹聖而後以耆戶長壯丁錢盡歸公上而法盡變民避役如避寇舉世盡然是邑獨甚端平既正經界乃汲汲茲事謂按籍選差終不能無弊於是因數都義役之舊

一以乾道詔書從事排年任役率田供費條畫列之規約宸旨丁寧一一具載之所以計慮久遠者亦悉矣曾未二十年更革幾無復遺而受害者大抵如故嗚呼累年成之而不足一日壞之而有餘豈不甚可惜哉然綱目具存爲政者儻攷求而舉行之則爲力亦甚易故今摭王令君申明之要著于編若其詳則有規約在

○義役省劄



平江府狀據常熟知縣王承議申竊惟賦役二事關於民生利害最大本縣向來戶版龐亂吏姦縱橫官督虛籍之賦民苦破家之役追惟往弊不忍復言當職職思其憂自初到官亟圖所以救之修復經界整比版籍民按實產受常賦貧富小大幸就明實儻不及時議結義役則作僞者詭寄以自利尚氣者紛糾以傷和役政不修賦籍隨壞非特前功盡廢抑恐後患滋多迺分委鄉官勸率役產參

合都分主客之勢斟酌地里寬窄之宜量役費之重輕準助田之多寡仍詳爲開陳使人樂趨第其先後以次充替經始於端平丙申四月竣事於嘉熙丁酉五月載念官民兩便備罄勤勞雖今者喜於有成尤藉後人守而勿失方爲永便除已採摭始行之大要條畫垂遠之定式繕寫成帙申府僉印發下外其間更有數條事體稍重關於義役修廢乞從本府備申朝省劄下本縣遵守併劄提舉常

平使司照會施行須至供申者

一據申本縣九鄉五十都今管義役田地  
共五萬五百二十二畝一角五十八步  
五尺五寸歲收租米麥共二萬四千九  
百九十八石六斗四升一合一勺已隨  
都分大小分撥與保正長聽其任便收  
支以助役費有餘不足官司更不復干  
預其田竝係常平物業不許公私典賣  
亦不許移易轉換違者按法坐罪業還  
義役莊錢沒官其助田之家將來富者  
不加增貧者不許取入仕而免役者不  
給還有家道倍進樂然添助者聽有驟  
富而素不助田者量助

一據申本縣諸都舊亦各有役田止緣役  
首欲擅其利故自破壞義役掩取田租  
又慮人告發則或獻納本縣板帳庫或  
獻納常平司旋即詭名請佃量納租錢  
官司苟目前之微利不暇爲赤子深謀

多墮其計夫庸錢不除差役仍舊民已  
不勝其勞矣今役費日重民至相率出  
田助役自以爲義彼其所以不憚其煩  
者蓋欲求一日之安上之人能反其初  
而觀之寧不爲之惻然動心乎今在版  
帳庫者二百餘畝已給還久矣在常平  
司者見議申乞所有今來見管義田日  
後蓋不許姦民獻納官司亦不當收受  
有獻納者則將其人根究重寘于法

一據申保正長向來充役之費最爲浩瀚  
保長旣爲產去稅存逃亾戶絕等戶代  
納稅租矣而爲保正者亦仰之催科例  
行陪納其他色目猶多如保正則有科  
供竹木科及穀果科買糟酒節序燈油  
接官器具檢屍定驗之費保長則有著  
役召保請給虛限出豁簿書七夕冬至  
二節供送吏胥之費加以上落牌頭開  
折司苗稅案誅求無藝已一切禁戢蠲

免供具申本府及諸司永與蠲除後如  
吏胥更有纖毫科擾卽仰役人與機察  
糾率衆戶經縣及經上司理訴痛與究  
治

一據申義役初行之時勸率助田則上戶  
非所便義役旣成之後不復差役則公  
吏非所便其至便者惟大小役戶而已  
竊恐日後上戶之已出田者或再欲佔  
據或強自抱租吏人或破例差役或生

事搔擾許役戶與機察合詞經官理訴  
或往上司陳乞必使侵擾之計不得容  
毫髮而後義役之利可以垂永久至如  
鄉戛不許干預役事遇造保長苗稅簿  
子仰明注欠戶住居地分如保長不知  
着落而鄉戛志在乞覓不以實告亦許  
保長陳論官司當與根究重仰施行務  
要保長分文無陪納之患

一據申本縣各都保正長雖已分撥田租

以充役費而其間窮窄都分或遇水旱則役戶必難支吾今將諸郡率到官民戶餘剩助役錢及拘到端平二年三年不差苗長舊義役米錢并本縣撥到官錢共二萬二千三百貫文官會約可買田八百餘畝可得租米六百餘石別項椿積於椿積米內斟酌均撥支付役戶以助其用申縣照會如寬都偶遇水旱特甚委是費力亦與量行給助如官司忽以借免爲由干預錢米不許提督容情應副其餘已別詳立規式

一據申役政之弊始於版籍之不明版籍之弊始於過割之不謹本縣今將各都新排經界田籍備錄一本印押交付機察謹密收藏每遇人戶典賣田產竝許具狀經縣陳乞送下機察仰置簿打號發下保正役主內係起催夏稅以後入狀者卽責付新苗保長內係起催秋苗

以後卽責付新稅保長令取責契照及  
兩家砧基點對保明類申機察機察類  
申本縣送鄉戛局參對官籍移割其詭  
名寄產者繳回元狀不許容情相與爲  
欺違者一例坐罪務要戶籍常清保長  
可無陪納之患本縣自十二月初一日  
以後受移割夏稅狀止正月十五日終  
自六月初一日以後受移割秋苗狀止  
六月終限滿更不受理

一據申保正義役事件至多已置籍申府  
僉印照證今不敢細碎煩瀆姑摘其要  
切者供申其餘條目凡酌之僉論而載  
于官籍者竝一體施行伏候指揮八月  
二日奉聖旨王淪修復經界義役職事  
終舉與轉一官竝下淞西提舉司平江  
府常熟縣永遠遵守勿致猾吏姦民輒  
行破壞


右劄付平江府常熟縣

嘉熙元年八月

重修琴川志卷七

叙兵

縣有弓兵有寨兵此定制也中興以來規相要害增置列戍則有大軍焉常熟瀕江近海地嚴控扼列峙舟師於是有所許浦之屯前衝後擊實相犄角於是復有顧選之屯兩屯相望雄據江汧而規模宏遠矣近年忠節軍之置又所以增備苴闕而弓兵寨兵等則縣之所依以立者皆非可以具文視也故作叙兵



許浦御前水軍

建炎紹興間水軍嘗戍江陰及許浦福山諸處無一定之所乾道六年初自明之定海分屯於此旣而御前水軍統制馮湛奏臣躬親相視海道控扼去處數內蘇州許浦鎮實控扼之要港汊深遠可以安泊舟船土地高廣可以安立寨柵比之江陰屯駐之地公議差勝且去淮甸不遠斥堠相連易於探報比之定海駐劄之地尤爲良便乞於許浦鎮屯駐大軍合用寨地委平江府差官與本軍同去許浦踏逐標撥并教場地步施行四月九日三省樞密院劄付平江守臣汪應辰遂差委常熟縣丞秦焯同水軍統制差來使臣踏逐寨地間今據所申遷定合立寨基其所指地段竝係人戶居止屋宇及埋葬墳塋包占田土七千餘畝竝係膏腴之地見種麻麥相次成熟種下秧苗亦皆廢壞小民失業號泣盈路兼許浦鎮止係邊江不當海道卽非緊切



控扼之地舊年曾經分撥些少防江人船時  
暫屯戍其海道自別有要害去處正合分軍  
屯戍今却全軍盡在許浦亦未爲便其許浦  
去海約百六十餘里既非緊切控扼之地而  
其要害去處又却無備徒使一方田廬墳墓  
復不能保伏望特降睿旨施行尋奉聖旨令  
依已降指揮疾速打畫圖本申三省樞密院  
只就許浦立寨時定寨基東接許浦太平西  
接梅里勝法上覽圖喜形天  
顏謂太平勝法皆  
佳名也故從其請初水軍元額一萬四千人

分爲四軍八將六十三隊於內外撥三百人  
江陰駐劄乾道七年十月奉聖旨許浦御前  
水軍以七千人爲額淳熙三年二月馮湛請  
再招收一千人奉聖旨增額五百人五年八  
月于友奏乞增額五百人不拘等仗刺充勝  
捷均撥使喚紹興元年四月奉聖旨發到福  
山寄招梢矧水手三百二十人併撥到水手  
一百八十人付司收刺支破吐渾請給嘉泰  
四年七月樞密院劄子招募販倭人支破全

分效用請給開禧二年馮供申海艦百隻水  
手分布不敷乞招收三色軍兵五百人又乞  
招收武藝精熟一百人刺充全效嘉定十五  
年都統吳英乞增收梢疇水手八百四十人  
刺充勝捷吐渾與元管兵總以萬人爲額寶  
慶元年吳英復申本司駐劄許浦分屯列戍  
管認江海地分額闊所管隘口惟顧逕最是  
緊切本司差撥官兵二千人着隘防捍比年  
以來虜寇侵擾兩淮州郡累蒙朝廷調遣本

司兵船前去建康直至江池鄂渚應援防護  
江面本司兵額雖曰萬人除分屯顧逕黃魚  
塚江陰寨及楚州管下淮海等處捍禦出江  
下海外許浦在寨人數無幾每遇調發不免  
逐急於顧逕二千人內抽差一千人湊用止  
有千人在戍除看守倉場庫務軍器支打錢  
糧外守禦委是寡少今欲措置增招二千人  
添置左軍內撥新舊軍人相半駐劄顧逕如  
或上流江面等處有警便可就許浦調發實

爲軍國經久利便從之

許浦顧逕左軍

許浦東百餘里曰顧逕與黃魚塢相望轉料角越沙窖拒山東海界淳熙間兵官王輅請畱五百人分屯後增五百人又增千人總以統轄然更戍不定至寶慶元年十一月許浦都統吳英始上建屯之議分許浦二千五百人置屯顧逕爲許浦左軍以張裕爲左軍統制領之

有載棚記

福山忠節水軍

淳祐九年浙西安撫使趙與憲奏乞於福山魏村江灣處各置戍兵三百人以防江面從之

本縣弓兵

祖額一百六十五名

本縣鋪兵

祖額

許浦巡檢寨

祖額一百四十四名

福山巡檢寨

祖額一百四十四名

白茆巡檢寨

祖額一百四十四名

重修琴川志卷七 終



重修琴川志卷八

叙人

十室之邑必有忠信况環百里之廣耶宰武城者進澹臺今許縣者奇陳寔蓋喜斯地之有斯人也常熟地本荆蠻前乎此蔑可紀矣自仲雍以禮遜爲化子游以文學名科而文物彬彬實表於他郡國然由是而後幾無得而稱焉如宋王敬則之僑處隋管崇之隱居紀載於史時一聞見抑何其寥寥耶不然殆有所遺歟姑哀



所見故作叙人

○進士題名

進士登科之有題名亦可謂榮矣近者有庠刊石總曰吳郡登科題名今取吾邑進士次而列之詳而紀之或父子聯芳或兄弟竝秀蓋繼此而未已後之覽者豈無羨焉

按吳郡志列進士題名一卷以端拱初元為識為首然未嘗彪分邑進士之目慶元志雖析而列之年序錯雜無攷焉今紀其次

陸景字伯通景祐元年張唐榜終於太

常博士

孫徽之

陸徽之字彥猷太學上舍生免殿試賜同進士出身終於開封府濮陽簿

陸綰字權叔寶元元年呂溱榜詳見人

物門

按吳郡志作陸絳

張僑字安道皇祐元年馮京榜詳見人

物門

子顏孫敏四世孫攀

陸元規字正翁嘉祐二年章衡榜終於

承議郎

兄元長

陸元長字規之嘉祐六年王俊民榜終

於朝奉大夫音案別本陸元長字規之兄茲本云字規之

謬矣無論兄弟名與字不得相襲于元長命名之意亦不相合

張敦字祖仁治正四年許安世榜終於

宣德郎贈左太中大夫子柎

張顏字正甫熙寧六年余中榜終於祕

書省校書郎贈中奉大夫

嚴君隣字□□元豐五年黃裳榜終於

選調姪煥

程元允字志行崇寧五年蔡薏榜終於

朝請大夫興國軍倅弟元徹

林閱字閱道政和二年莫儔榜終於太

常博士按吳郡志作林閱新志作字閱道

張敏功字守道政和五年何棗榜終於

朝請大夫

陳起宗字興祖政和五年何棗榜詳見

人物門

錢觀復字知原政和五年何棗榜詳見

人物門 子侯佃

張栢字材仲政和五年何桌榜終於朝  
議大夫詳見人物門

林友字德臣宣和三年何煥榜終於樞

密院編修官 弟友

程元微字夢良宣和三年何煥榜終於

朝散郎

富元衡字公權宣和六年沈晦榜詳見

人物門

鄭時字是翁宣和六年沈晦榜詳見人

物門

鄭楊字國明建炎二年李易榜終於

□□

王履字用和紹興八年黃公度榜終於

選調

王伯廣字師德紹興十二年陳誠之榜

詳見人物門

許光國字利賓紹興十二年陳誠之榜



終於選調

嚴煥字子文紹興十二年陳誠之榜詳

見人物門

吳旼字和卿紹興十五年劉章榜終於

承議郎

林友字表臣紹興十五年劉章榜終於

選調

晉案吳郡志無此姓字據愚見疑林友字表臣庶與兄林友字德臣相合如新志以表臣為名而缺其字恐未必然若茲本名友則兄弟同名其悞

無疑

錢佃字仲耕紹興十五年劉章榜詳見

人物門

冷世光字賓王紹興十八年王佐榜詳

見人物門

冷世修字良器紹興十八年王佐榜詳

見人物門

錢侯字惟大紹興二十一年趙逵榜詳

見人物門

鄒嶰字仲山紹興二十四年張孝祥榜

終於承議郎 弟企宗

趙公豫字仲謙紹興二十四年張孝祥

榜詳見人物門 按吳郡志不載

趙思字再可紹興二十四年張孝祥榜

詳見人物門

姚愈字次韓紹興二十七年王十朋榜

終於御史中丞

鄒企宗字及之隆興元年木待問榜終

於楚州教授

吳兢字子兢乾道八年黃定榜終於承

議郎

錢萬選字少張淳熙二年詹駉榜終於

選調 弟萬頃

錢萬頃字師元淳熙二年詹駉榜終於

無為軍教授

張攀字從龍淳熙十一年衛涇榜詳見

人物門

顧叔康字世符淳熙十一年衛涇榜終

於通直郎

趙彥适字周伯淳熙十四年王容榜終

於刑部郎中知徽州孫時言○按吳郡志不載

周虎字叔子慶元二年武舉第一人詳

見人物門

曹大昌字耆卿泰嘉二年傳行簡榜終

於□□□

陶永字永叔開禧元年毛自知榜終於

選調

趙濬夫字德追嘉定元年鄭自誠榜追

進作

趙崇驥字德甫嘉定十六年蔣重珍榜

陶虎字景召寶慶二年王會龍榜

趙時言字子然嘉熙二年周坦榜

○人物

常熟古壯縣詩書禮樂之地自言子游親聖門  
以來人才宜不乏而前志所載唐龔景才一人  
而已其軼遺既多今欲補記無由故推前朝至

今一鄉之望以示後來名而列之示不私云

前朝

巫咸

梁昭明太子昭真治碑云境有巫咸之所出也

言偃吳人

索隱曰家語云魯人按偃在魯為武城宰耳今吳郡有言

偃冢蓋吳郡人為是也

字子游少孔子四十五歲

子游既已受業聖門以文學名科為武

城宰孔子過聞弦歌之聲孔子莞爾而

笑曰割雞焉用牛刀子游曰管者偃也

聞諸夫子曰君子學道則愛人小人學

道則易使孔子曰二三子偃之言是也

前言戲之耳孔子以為子游習於文學

見史記列傳○禮記檀弓云汰哉叔氏

注叔氏子游別字也又云申詳之哭言

思也亦然說者云言思子游之子○蘇

州記云言偃宅在縣治西北吳地記云

宅傍有井井邊有洗衣石周回四尺皆

其故物朱長文志謂之洗衣石輿地志

云石為太守蕭正德持去莫知所在

唐

龔景才字敦禮慶元志曰唐龔景才縣

人也五世同居以孝義稱麟德九年旌

表門閭至宋其子孫多居小山景祐四年有龔沂者登進士第驗其告身乃用兄潭戶貫又考轉儒林郎告其中有云家屬見居蘇州乞授兩浙差遣遂調婺州金華縣主簿乃知龔沂實龔景才之裔也所以吳郡題名闕而不載嘗知瓊州瓊山縣終於奉議郎

宋朝

陸綰字權叔縣人登呂溱榜進士第綰

本名絳字伯厚見前史同姓名者不道故更今名綰讀書務道理以根聖人之心著書必本經以救宿儒之弊昆弟分推先疇而付之捐俸振族唯恐不給教孤姪猶其子以此各登科名臨吏則益嚴臨民則益恤奉已則甚薄奉賓親則甚厚嘗提舉江淮茶稅充淮南路制置發運司運鹽公事終朝奉郎尚書職方郎中贈中散大夫有春秋新解三十卷

工歌詩有聽琴歌等作皆膾炙人口提  
舉茶稅時蘇文安洵贈之以詩云君家  
本江湖南行卽鄰里稅茶雖冗繁漸喜  
官資美嗟君本篤學寤寐好文字往年  
在巴蜀憶見春秋始名家亂如髮紛錯  
費尋理今來未五歲新傳滿盈几又言  
欲治易雜說書萬紙君心不可測日夜  
湧如水何年重相逢祇益使余畏但恐  
茶事多亂子易中意茶易兩無妨知君

足才思見老泉集中龍圖閣學士祖無  
擇爲撰墓誌

陸徽之字彥猷縣人高才博學邑中推  
爲鄉先生建中靖國初有詔求直言徽  
之進對與雍孝開等力陳時政闕失唱  
第日皆駁放大觀末彗星見復收拾孝  
開等徽之已卒

見國史慶元志云太學  
上舍生免殿試賜同進

士出身終於開  
封府濮陽簿

張僑字安道縣人有聲場屋間嘗作月

中桂詩膾炙人口登皇祐元年進士第  
因言事謫衢州終於朝散郎尚書都官  
員外郎同年趙清獻抃遊從極厚詩筒  
往來覩其友足以知其人矣清獻嘗有  
贈僑赴闕詩云君數過予澌水邊從容  
不覺歲華遷同年契有二千石釐務官  
成三百篇兩縣子庭俱戲綵一州僚館  
競鋪筵到應禁闈新秋近亟對威顏咫尺  
天寫之金花牋墨色如新今藏於家

及僑召還復有詩餞行今有六篇二帖  
皆諸公遺墨摹刻于山陽郡庠子顏孫  
敏功四世孫攀皆登科

張攀字從龍由太學登淳熙十一年進  
士第初調四明之鄞縣尉楚州教授知  
建康府溧水縣嚴州倅監登聞鼓院慶  
元倅知興國軍除將作監丞大府寺丞  
祕書丞詮次中興館閣書目凡萬四千  
九百四十三卷上之兼權右曹郎官除

尚右郎官改尚左軍器監同日再命拜  
殿中侍御史兼侍講在憲府凡兩年除  
起居郎兼崇政殿說書卒年七十贈通  
議大夫集英殿修撰時嘉定十六年也  
攀寬厚易直遇事開心見誠無一毫矯  
飾幼年郡試卽不肯隨衆減年爲欺家  
世清白持之益堅仕州縣以循良稱在  
朝廷以靖共著類稱爲端人淑士云有  
齋集奏議漢唐論共若干卷

張柟字材仲縣人繇三舍法貢京師入  
太學治書有聲登政和五年進士第初  
調臨江軍司刑曹事知嚴州遂安縣方  
臘寇嚴領兵入邑丞簿尉皆遇害柟與  
力戰刃中脇擁入窠穴柟曉以禍福逆  
順賊聳聽得脫萬死中賊繼授首改秩  
知湖州歸安縣臨安府通判知秦潤衢  
三州皆以惠愛稱柟天性純孝知衢州  
日母年已九十九歲柟年七十矣執喪



甚哀人皆賢之初得郊恩舍子畀姪族  
有貧而喪不舉者哀而葬之年七十八  
官至朝議大夫贈正議大夫

陳起宗字興祖縣人少入上庠連冠多  
士諸公皆斂衽避之一日歸省囑同舍  
生投試卷起宗治書禮記同舍嫉之輒  
易以周禮迫試乃告之弗問卽以周禮  
試復第一登政和五年進士第年三十  
七以徽猷閣學士知并州卒起宗工詩

瀟灑有陶謝之風

錢觀復字知原縣人於吳越爲疏屬由  
太學登政和五年進士第邑人土著登  
科自觀復始初調越州諸暨縣主簿改  
溫州教授道過瑞安巨寇方臘正猖獗  
觀復贊邑令王公濟備禦時流民歸瑞  
安相屬于道或議驅出境觀復曰孰爲  
吾境驅之適資盜耳遂徙之海洲居焉  
調湖州戶曹同郡朱勔勢方盛以鄉人

故願妻以女力辭不就授楚州士曹衢  
州判官虜騎犯江淞衢當要衝觀復白  
郡守縱民老弱出戶畱一丁不畱與畱  
而疲弱不堪任者罪如軍法旣而諸兵  
欲乘時爲變顧城中子女無所獲乃止  
除國子監丞改諸王宮教授太常丞祕  
書郎戶部員外郎宮觀起知廣德軍歲  
上供民輸送回遠加斂水脚錢請于朝  
寄廩湖之四安至國門纔五日費減太  
半卒年六十五號正靜居士有文集十  
五卷論語解二十卷劉待制一止誌其  
墓子俛佃

錢俛字廷碩一字惟大弱冠舉於鄉考  
官徐良能見其文有本源意必老儒以  
爲選首及開卷大驚異之繼補太學生  
登紹興二十一年進士第授泰州教官  
除太學正從容學省斂以靜晦人莫窺  
其際除宗正寺簿太府寺丞宗正丞知

袁州除祕書丞著作佐郎遷將作少監  
除福建路提舉終朝請郎年六十侯平  
生少嗜好沉冥書史藏書數千卷朱墨  
精謹皆手自讎校於書無所不讀尤精  
於易有文集五卷諸經講解十卷易說  
三卷崔紫微敦詩誌其墓

錢佃字仲耕弱冠入太學登紹興十五  
年進士第嚴州分水尉池真二州教授  
改秩除諸王宮教授遷太宗正丞通判

太平州太子尹臨~~選~~擇寮采佃獨以外  
庸在選中擢吏部郎中對便殿言三事  
上稱善累遷左右司檢正兼催吏兵工  
三侍郎出爲江西路轉運副使時盜賴  
文正起武陵朝廷調兵討之佃餽餉不  
乏繼使福建再使江西奏蠲諸郡之逋  
婺州飢闕守上曰錢某可郡荐飢禱雨  
鬚髮爲白勸分移粟所活口七十餘萬  
政甲一路朱文公熹時爲倉使與陳亮

書云婺人得錢守比之他郡事體殊不同又記江西漕司養濟院謂其嘗奏免贛吉麻租二千四百五十九斛兩州之人尤歌舞之今知婺州救飢之政亦爲諸郡最所以稱譽者蓋若此佃忠信恭寬根於天性臨政不求赫赫聲以字民爲先務所至得民家不取盈損橐裝買田贍合族名曰義莊卒年六十二終於中奉大夫祕閣修撰有易解十卷詞科

類要二十卷文集二十卷誠齋楊文節  
萬里誌其墓

富元衡字公權文忠公裔孫寓居常熟曾祖嚴咸平詞科元衡幼入太學有聲場屋間登宣和六年進士第調隨州隨縣簿建炎初爲襄陽招撫司機宜都督張魏公浚以材薦改秩爲諸王宮教授大宗正丞知江陰軍嘗辨盜有不應死者全活數十人皆感泣知興國軍改袁

州遷湖南常平使者改利路提刑蜀舊  
例監司交餽不下數千緡元衡却而不  
受改湖北提刑一以平反爲心隆興中  
召還中塗遇盜行李一空帥李師顏餽  
以匣金不啓緘而絕之除工部郎中未  
幾歎曰吾清白傳家今不翅足矣上疏  
乞骸骨詔以內閣奉祠睿訓獎之有行  
止不殆之語爲堂榜以知止侈上賜也  
繼乞休致上嘉其志從之慶禮成賜金

紫卒年八十六終朝散大夫平生清節  
終始不變喜坡字尤精柳葉篆

丘礪字師說家海州之朐山建炎初仕  
于吳因寓居常熟少讀書刻苦有志事  
功登政和戊戌第歷濰蔡二州教官知  
吳江縣入爲國子監丞御史臺檢法大  
理寺丞權戶部郎官知筠泰建三州除  
福建提舉兼提刑改轉運判官在建凡  
十年惠政不可勝紀秦檜當國以礪同

年生每示意嚮且欲以孫締礪之女礪  
實不願欲遠之乃以兄姊未葬力請祠  
而歸屏跡杜門以詩酒自適奉祠凡十  
二年壽七十六官至朝請大夫累贈光  
祿大夫礪天稟純實自律甚嚴更迭中  
外三十年田僅數百畝不給則舉質以  
繼處之裕如有易說及超然類藁千餘  
篇杜詩集句百篇子璪應博學宏詞科  
璋寧國倅琛提舉福建市舶璠舒之太  
湖令諸孫耒將作監丞今四世孫名德  
相望簪紱蟬聯金紫輝映閭閻鼎盛爲  
邑望族

丘耒字少潛以蔭調臨安府於潛簿慶  
元錄參淮東餉幹所至有聲知嘉興府  
海鹽縣興起學宮築捍海堤二十里代  
民輸積欠租郡有疑獄率委平反守議  
賞輒辭民德其政爭先立碣薦者十有  
八人監三省樞密院門遷將作監丞知

台州惠州撫州皆不赴終朝奉大夫年五十六未生平尚義加厚族黨捐已田以畀姪尤人所難王忠惠萬狀其行謂天資素高才足以運慮足以謀明足以察得其實云

曾懷字欽道宣靖公曾孫世居泉州後居京師晚寓常熟宣和元年以父任調鎮江金壇簿南渡初授和州烏江令瀾西帥幹知嚴州淳安縣濠州太平州通

判提舉兩浙市舶知江州孝宗踐祚改真州浙西提舉以懷有應用才除度支員外郎別置拘催錢物所令專行以豐裕聞超除權戶部侍郎兼提領贍軍諸庫除戶部侍郎再歲除尚書在版曹凡五年未嘗以錢穀語人凡錢穀之數州郡所積與夫出納之多寡纖悉必記上以蕭何劉晏目之丐閑除龍圖閣學士知婺州甫三月趣召復爲戶部尚書乾

道八年二月賜同進士出身除叅知政事九年十月拜右丞相淳熙元年六月除觀文殿大學士宮觀甫及故里復拜右丞相力疾赴闕上以疾未全愈免赴朝叅惟令人堂治事遇大政則宣引特令製輕小金帶以賜復力上印綬仍除觀文殿大學士宮觀歸僅三月疾復作以淳熙元年薨于常熟私第年六十九贈少保懷由世家登宰輔以清約自持爲相侃侃得大臣體常言事之大者視之以小事之小者視之以無則天下無復事矣真名言云有文集三十卷

鄭時字是翁縣人樞密文肅公戩之後少魁江東漕登宣和六年進士第改秩知太平州當塗縣律身廉介而撫民以寬有訟在庭訓諭不悛而後加罰民多化之秩滿通判建康府畱守晁尚書謙之待以君子長者凡所贊畫言無不從



以疾奉祠而歸終於朝奉大夫公天性嗜書至老不倦自左氏史記東西漢三國志南北史以至韓柳杜樊川東坡諸文集皆手抄編錄下至稗官小說莫不經覽焉

王伯廣字師德縣梅李人登紹興十二年進士第調湖州德清尉既歸里家產遜諸弟一毫不取試教官授溫州教授再調常州教授未赴而卒年五十伯廣

少工於文從中書舍人楊邦弼學嘗道過臨安謁張倅材仲張曰試教官乎曰某素不習經張爲指蹊轍閱月以程文示張張大驚曰天材也卽魁教官精於詩四六亦爲人膾炙與張紫微孝祥遊詩筒往復有聽雨集藏于家

嚴煥字子文縣人嘗與同里錢南試聖人以人占天賦出場問破題押何字南曰押占字煥曰余奪魁君第二果以首

薦登紹興十二年進士第調徽州臨安  
教官通判建康府知江陰軍遷太常丞  
出爲福建市舶終於朝奉大夫煥長於  
書筆法尤精

冷世光字賓王縣人與弟世修世南同  
入太學時稱爲三冷與弟世修同登紹  
興十八年進士第調湖州歸安簿知和  
州歷陽縣寧國府寧國縣廣德軍教授  
改秩知衢州龍遊縣朱文公爲常平使

者旁邑令見訴于民文公命體實世光  
辭焉文公曰選委也往遂得其情兩省  
交薦幹辨行在諸軍審計司除監察御  
史遷殿中侍御史條奏忠切彈劾無所  
避旣而去國奉祠尋知嚴州丐辭得請  
旣又引年致仕作閒適堂晚歲優游里  
社泊如也年八十終朝奉大夫世光事  
親孝居喪哀與諸弟和於子孫盡其教  
自其父通奉力賑施邑里世光兄弟率

行之不替鄉人至今高仰之有奏議彈  
章二卷東堂類藁二十卷刀筆五卷  
冷世修字良器登進士第調秀州崇德  
縣簿太守張瑜異之移攝理掾獄屢空  
知泰州興化縣辟監行在北外門激賞  
庫改秩乞改次等官回一階封垂白之  
母阜陵特命詞以寵之遠近歆豔知建  
康府上元縣民有互訟者世修諭之曰  
骨肉爭鬪非美事也今以律繩汝汝終

身不可復聚委曲化以恩義民感泣願  
息爭通判和州守尚峻嚴世修濟以寬  
秩滿吏民相率走諸臺乞畱得知南康  
軍未上曰知足不辱卽丐祠作畱耕堂  
以示子孫卒年七十三終朝奉大夫有  
雜文三十卷詞科類要十卷

陳字字伯愛古靈先生諸孫自宜興徙  
常熟以父臺簿遺澤仕爲興化軍莆田  
尉得劇賊格當霑賞字愀然曰吾其可

藉人命爲自進之階卒辭之調紹興府  
司法隆興中改秩知臨安富陽縣分差  
鎮江府糧料院知潮州提轄行在權貨  
務知房州歸卒年六十一字孝友天性  
廉白無瑕玷居母喪鬚髮盡白撫愛諸  
弟每食必同席俸祿不入私室家無庚  
銀之器他可知矣嘗自謂先世以清白  
遺子孫豈惟富不可求亦所不願也陳  
紫微峴誌其墓謂內行外治純篤始終

允謂成德非諛言云

趙公豫字仲謙自父少師家嘗熟幼聰  
警記左氏傳不謬一字登紹興二十四  
年進士第調無爲軍無爲縣尉太平州  
錄參再調無爲軍錄參福建運司主管  
帳司改差行在激賞北酒庫知臨安府  
仁和縣兩易紹興府餘姚縣分差鎮江  
糧料院知高郵軍真州常州提舉浙東  
常平茶鹽除倉部郎官兼刪修勅令官

遷大理少卿差充接送伴金國賀正旦  
使遷太府卿除祕閣修撰知太平州江  
東轉運副使進集英殿修撰宮觀開禧  
元年年七十一抗章引年陞寶謨閣待  
制致仕嘉定五年卒年七十八公豫沉  
厚清苦平居以清坐爲適無毫髮干州  
縣居官廉正常言吾求爲循吏不求爲  
健吏晚歲懸車勇退識尚高遠故宸音  
褒獎有察辭避之真情全始終之大節  
可紀云

蓋誦其實也有奏藁一卷燕堂類藁五  
卷弟公升公頤仕皆至麾節類有政績  
趙思字再可本洛人寓常熟治春秋登  
紹興二十四年進士第調濠州鍾離簿  
時相虞雍公力薦之孝宗賜對便殿問  
恢復大計思對合上意除大府寺簿太  
常丞兼度支郎官台州闕守上問誰可  
任者僉以思對亟出親札以授不數月

治聲翕然上親書姓名於御屏除淮南  
路轉通判官兼憲過闕辭上曰知卿忠  
實故畀邊節除直祕閣因任陞副使除  
戶部郎官淮東總領遷起居舍人充金  
國賀生辰使不肯稱御名虜以爲慢來  
詰朝廷不得已罷之除廣西提刑奏事  
上曰朕每愛卿才不令卿遠出改湖州  
直龍圖閣再任除起居郎權吏部侍郎  
宮觀知靜江府廣西經略以職事修舉  
除祕閣修撰進集英殿修撰再奉興國  
祠累轉中大夫卒年七十內翰洪文敏  
邁誌其墓

崔敦詩字大雅世家靜海晚僑寓常熟  
登紹興三十年進士第主揚州高郵簿  
兩浙運幹除祕書省正字繼兼翰林權  
直早有文名所爲制詞溫潤詳雅兼崇  
政殿說書權給事中遭內外艱時翰林  
學士周必大乞補外壽皇中批問吏部

尚書韓元吉曰崔某今安在元吉乃具言之既召見除樞密院編修官復爲權直既拜命卽言翰林權直爲名未正卽更爲學士院權直遷著作郎兼權吏部郎官又兼崇政殿說書進國子司業改權直學士院拜中書舍人加侍講直學士院敦詩賦性端厚議論疏通知大體自直宿遞講遇引對所陳必剴切至造膝密啓有家人不得覘其藁者上深所

器許九年夏以疾卒年僅四十有四贈中大夫有文集三十卷內外制藁二十三卷奏議總要五卷通鑑要覽六十卷制海十編監韻五編南澗韓尚書元吉誌其墓

富嘉謀字君美文忠公裔居常熟以祖澤仕調湖州歸安尉無爲軍判官南安軍上猶縣令監行在省倉上界特旨朔處州慶元縣以才選知縣事再任臨安

府通判建康分司權轄改行在權轄知  
饒州改知泰州淮西選判兼憲倉兩節  
淮東運判知和州奉祠家居累年卒年  
七十七嘉謀才具素優臨政不苟居鄉  
尤急於義云

周虎字叔子世家臨淮靖康南徙寓于  
常熟虎倜儻輕財而尚氣節慶元二年  
擢武科第一授殿司步軍同正將除武  
學諭閣門舍人充金國賀生辰接伴副

使知光州楚州繼知和州實開禧二年  
也時虜會諸道兵加其大帥以平南盪  
江等號使長驅入寇十有一月至和州  
虎部分將士乘城以守且語父老曰吾  
國家守臣一朝去此則爲奔亾之人失  
節敗名生不如死効死弗去雖死猶生  
吾計決矣合戰凡三十有四殺虜驍將  
以十數最後射中其右帥石矧殪死虜  
氣沮甚大劄引去於是和議始堅決而



江淮奠枕矣特轉武功大夫正任文州  
刺史除主管侍衛馬軍行司公事特授  
成州團練使除侍衛馬軍都虞候帶御  
器械兼幹辦皇城司丐養提舉祐神觀  
尋謫徽州得旨自便復元官自是召命  
再頒除知和州者一特轉行一官者再  
遜牘上或至八九必得請乃已家居凡  
十有二載紹定二年轉和州防禦使致  
任卒年六十九諡忠惠虎功在江淮忠  
節鮮儷而文詞敏瞻作大字蓋獨步漫  
塘劉少監宰誌其墓母何氏以虎和州  
城守與有功進封永國太夫人母子俱  
廟祀于和云

王萬字處一世本婺人後爲濠州定遠  
人晚寓常熟少居濠梁學舍者九年慨  
然有求道之志熟讀論語忽覺有得登  
嘉定癸未甲科授和州教授吏部架閣  
國子錄添差鎮江府倅除樞密院編修

官兼屯田員外郎知台州除屯田員外郎兼編修改尚書右司仍兼編修崇政殿說書除監察御史時嘉熙三年也會時相有不協公論者於是上疏劾之且引歐陽修之論趙括謂天下皆知其不可獨其主不悟者最爲莫大之患疏入卽除大理少卿尋改太常少卿知寧國府令赴行在奏事除直寶章閣宮觀再令赴行在奏事依舊直寶章閣福建提

刑除直煥章閣四州宣諭使司叅謀官太常少卿竝累辭不受家居累年凝塵滿席淡如也淳祐三年卒年四十有八五年奉御筆前太常少卿王萬立朝蹇諤古之遺直爲郡廉平古之遺愛可特贈集英殿修撰十二年賜諡忠惠萬聞道甚早其學由於自得談經析理不涉支離與人交不爲崖異之行故其蘊蓄深厚人莫得其窺測每書事天二字以

自警盛年而逝不得盡其所到善類咸  
傷惜之號抑齋有文集時習編書志編  
共若干卷

○隱逸

胡嶧字仲連世爲婺之永康人因祖葬  
吳下遂家縣之塗菘嶧姿稟澹泊恬於  
世嗜步趨言動皆有尺度而賓嘉喪祭  
率遵古法退處于家與方子通林祖德  
放浪泉石之間居五柳園中松窗蓬戶

植竹疏沼兄弟雍如父子論學二小僮  
供薪水役客至談話終日罕親世故信  
其爲隱君子也建炎登極特命以官一  
至銓曹授迪功郎欽州安遠尉而終不  
仕曰吾老矣姑承朝廷之恩意可也其  
父稷言作五柳堂至嶧又取杜子美宅  
舍如荒村之句榜其堂曰如村因號如  
村老人紹興十四年十一月卒有詩集  
等子百能奉議郎諸王宮大小學教授

鍾璇字振遠一字叔齊縣人六歲而孤  
育于繼祖龍圖學士妙峰林先生適之  
家妙峰家多書因得縱觀焉與其孫璟  
瓌瑑同肄業課率先成後璟三兄弟並  
登甲辰第璇遂棄舉子業取所藏書盡  
閱之侍官天台一日游巖谷間遇異人  
僧服手列禦寇書揖而與語坐盤石指  
一泓定水曰此水滔滔乃皇極大中之  
道語久別去

有孫獨湖跋語  
獨湖一作應時

自是有所

省悟益不溺於名利放浪漁釣間築室  
梅里所居多時香草自號藥圃隱居閉  
戶者二十年家雖貧殊不戚戚然有求  
者解衣分粟無靳色如建康唐侍郎瑑  
自畱守歸寓梅里往見之遂爲忘年交  
浙西倉徐常丞誼吳門守沈侍郎揆皆  
造其廬以奇人目之范叅政成大等嘗  
薦之于朝不報卒年五十二有藥園藁  
山中錄續孔白帖秦漢以來鍾鼎奇字

藏於家

周甫字次山縣人幼穎悟五歲誦論語  
每舉一字輒引類言之淳熙癸卯秋試  
主文郭頤取爲解魁以失書塗注太守  
耿秉移嗣榜首遂棄舉子業窮經史百  
家之書識見超卓文筆凌厲操履益不  
苟號無礙老人宇文叅政紹節館之以  
邊功累官不就孫令君應時甚愛重之  
郡人周正字南時亦與訂所疑焉精於  
漢史所著韓生傳章華臺記石頭城歌  
等作皆膾炙人口卒年六十二遺文類  
散佚云

重修琴川志卷九

叙產

凡志必載其地產甚詳蓋有取乎九州所有皆聚此書之義非專逞博眩奇如茶經蟹志牡丹荔枝譜比也然管之志南海者以龍目益智二物爲一物類不免傳疑於後世則紀述之際又有不可苟者焉常熟有原野之平行有江湖之涵浸動植生孕厥類實繁卽禹貢曰惟職方氏曰宜之例比而載之宜矣故作叙產



穀之屬

吳地宜杭稻玉粒香甜為天下甲其種不一

穉稭

粒白無芒最熟最早

閃西風

八月熟

紅蓮

米之最佳者芒紅粒大有早晚二種陸龜蒙詩曰近炊香稻識紅蓮

箭子稻

此品最高晚熟朱樂圃吳門志稱之

香糯米

米粒甚香晚熟著數合餘飯皆香

鼠郎黃

野稻

赤芒早二種

鶴鶉斑

雪裏尋

有芒粒大晚熟

雪裏揀

粒軟有芒大

師姑秈

無芒晚熟

稻公揀

早晚二種

顧公揀

白稻

早晚二種

舜哥稻

兩重殼如蠅翅

稻裏揀

雪裏扮

揀出稻

九節稻

無名稻

麥爭場

六月熟

巴上竝秈稻

趕陳糯

矮糯

晚熟無芒皮黃

抄社糯

未交社先熟

師姑糯

無芒皮黃而元晚熟

秋風糯

或名白芒

白糯

青稗糯

晚熟

金釵糯

皮糠黃有芒粒匾

鐵梗糯

已上竝糯稻

節澳稻 早熟或稱時裏白或稱珠兒稻

六十日 次熟或八

金成 早晚二色赤者有人或蒸而食之

先禾 白為晚熟一日私禾乃早熟之稻

已上竝先稻

烏口稻 再蒔晚熟米之最下者

赤穀稻 立秋日看如東南風不撒種

已上名色甚多姑舉其槩耳

穞 有二種穞蘆 粟 殼九

麥 大麥 小麥 蕎麥 舜哥小麥

豆 黃豆 青豆 紫路豆 黑豆 赤豆 菜豆 白扁豆 可入藥 黑扁豆 江豆 豌豆 俗呼

為蠶豆 佛手豆 如指大 名長十六雁 來紅豆 粒大且紅 八月白 豁裏豆 未

當豆 熟時先熟 山韓

麻 油粒如蠶豆 牛腿烏 作乳酪其皮可緝

○帛之屬

布 有苧麻二種皆緝其皮而為之

黃草布 色黃有極細如紗者



藥之屬

天南星

半夏

何首烏

地骨皮

天花粉

蒲公英

麥門冬

枸杞子

山菰姑

兔絲子

雁鳴子

蒼耳子

細辛

苾蓐

落得打

紫蘇

荆芥

旱蓮草

薄荷二種

馬蘭

天羅

香附子叢生道傍一名藁草

黑牽牛花碧色蔓生籬落間

車前子俗乎為蝦蟆

羊蹄菜一名秃菜

飽麻紫莖子青褐色

菖蒲生波澤

決明子花黃

天僊藤八月取


金星鳳翼草四月取

虎杖三月取

金剛根三月取

夏枯草五月取

鐵腳草八月取



穀精草

八月取常熟山出

○果之屬

梅種多

香櫟

蓮

安石榴

有百葉者

枇杷

舊有無校者出頂上方院今無之

柚

大者如甌孟

蒲萄

種二

杏

桃

李

梨

柿

林檎

銀杏

棗

瓜種多

芋薺

茨菰

櫻桃

出虞山南有二種白蠟櫻色如蠟稍大味甘肉厚曰大櫻味略酸絕不逮蠟

櫻矣

方蒂柿

出虞山南蒂正方柿形亦方色如鞞紅味極甘皮有沙者在衆品之上

頂栗

出頂山香味絕勝微風乾之尤軟美又有一種曰塵香囊在寺南院

重臺碧蓮

出破山

柿種多

菱種多

藕



又有鴛鴦栗剖

韓梨

出縣河陽山之北十餘里曰韓村皮褐色肉如玉香甘無比削之經時不變雖腐壞不糜近年頗得真者慶元志以爲從木從豆以犯獻陵諱易曰韓村自櫻桃以下皆土產他處所罕有者

○蔬之屬

韭

薤

蒜

菘

芥

蓴

甜菜

生菜

波稜

萵苣

香菜

芸薹

同蒿

苦蕒

蕨

葱

虞山之北有之

冬瓜

生瓜

黃瓜

瓠

茄

蔓菁

甘露子

斜蒿

可煮鱈羹

胡荽

蘿蔔

有一種又胡蘿蔔

絲瓜

裙帶豆

莧

蕈

笋

○畜之屬

牛

羊

兔

彘

犬

獾

猫

雞

鶩

鴨有一種名  
鴨味佳

○禽之屬

烏

鵲

十二黃

鵲

鷹

十二紅

鳩一種青鳩  
秋風至

黃鶯

竹画舂

鳩

雉雞

子規

鷓鴣

鷓鴣

山鵲

鴿



噪天子

白頭翁

婆餅焦

雀

啄木

鈞舟

青采

鷺絲

百舌

山老鴉

山白頭翁

二月為小白頭  
八月為隨鷹子

鵓鵒

櫻桃鳥

紅嘴白頭黑身

魚虎子

翠羽可飾冠披

繡眼兒

最小而巧

偷倉兒

最小飛人倉能食米穀

黃頭兒

最小善鬪

竹雞

竹槽

布穀鳥

葛公

聲叫之葛公

刺毛鷹

食刺毛又名桑扈

黃雀

豹頭兒

燕子

鷓鴣

黃鶴

色黃托爪善食

雪姑兒

鵓鵒

野鴨

獐雞

江鷗

海燕

鶯



○獸之屬

豺

香狸

兔

刺蝟

獺

鼠狼

獐

鼠

獾

野猫

鹿

虎

有二種猪獾可食狗獾不可食

○魚之屬

鱖

鮑

鯽

鯉

鮎

鮪

鰱

鱸

黃鱔

黃頰

青魚

鰻

古首有鮓鮓

鰻鱺

鼈

鱧

鱧

鱮魚

鮓魚

針口

肉貯

小而肥



吹沙浪

爾俗亦謂推沙魚今吹沙是也時

蚬

生於泥中本草

蟹

蚌

蝦

水雞

螭

河魴

出楊子江中次曰班兒又曰河魴正

橫鯮

或出楊子江與其河魴同之時也楊初出河魴當此時以饋鄰里親舊

黃尾鯮

曝為乾俗呼曰螳蝦子出湖中

鱠殘魚

出楊子江清明時有之俗謂吳

鮳魚

美出楊子江肥

鮑魚

夏初有之坡翁所謂粉

脆鱸


出楊子江亦曰鱸是也

黃魚

出楊子江

鱖魚

出楊子江



鯊魚

出楊子江有沙用湯浸而食之

蛤蜊

出楊子江本草蛤蜊煮之醒酒毒止渴開胃性冷服舟人不可食

白蟹

出楊子江

車螯

出楊子江

蝸蟻

出江中

沙筍

箸魚

如箸之薄出江中

赤魚

形如釜匭俗謂之老鴉魚出江中

赤眼魚

蝨

橫魚

細鱗骨多肉厚

橘踰淮而北為枳地產各有宜也吳

中地沃而物繁原隰湖海之所出未

易枚數志曾不一載朱樂圃續吳門

志雖載物品然包舉全吳匪專吾邑

故為表而出之云



重修琴川志卷十

叙祠

古者有功德於民則祀之故無淫昏以惑世而誣民今列于祀典者未必皆有功德也而山巔水涯捧揭而奉之者尤衆焉乃者梵宇道宮金碧相望而不耕不蠶之民蟠據其間者類悠然自得可勝嘆哉常熟百里之地祠僅十一棲羽流者二三萃緇徒者五六不爲不多矣而要皆以保國安民爲名則不可得而廢也其建置之



由因革之故廢興存亾之異則當各紀歲月以備叅攷故作叙祠

○廟

城隍廟在縣治西十步古者諸侯既立社稷又爲五祀曰司命中霤國門國行公厲是也鄭氏謂國門爲城門今之城隍也然今州縣所祀如吳之春申及永嘉之周苛天台之屈坦興國之姚姪亦不一槩焉嘉泰四年因遭回祿是歲重

建

東嶽行祠在縣治西一里五十步虞山南麓依山高聳規模雄偉歲久摧圯屢經再新然創造之由無碑誌可攷東平忠靖王祠在其東偏按王淮陰人張有嚴之子唐開元元年八月十八日生十四年七月二十五日入滅爲神護國救民封成濟侯宋太祖親征太原川水泛溢上憂之水忽合師遂濟空中見

神來朝加征應護聖使者熙寧五年陞  
濟物侯宰相王荆公令有司勘會靈顯  
事跡再封忠懿文定武寧嘉應侯南渡  
以來神復響答於浙間而此方尤顯著  
累封東平忠靖王邑人尊事之殿基舊  
卑隘淳熙九年重建

正順忠祐靈濟聖烈王殿在乾元宮三  
清殿之西先是淳熙間邑人迎神像塑  
於乾元宮山門之東偏湫隘淺迫不足

以妥靈紹熙癸丑邑人靡金錢建殿宇

湖山相映翼神之休祈禱輒應

累朝勅封在廣

德祠山廟  
靈跡尤著

東殿聖王廟在縣治東北一里三十步  
莫詳建立歲月慶元志稱爲子游舊廟  
然無所考

白龍祠在縣西北頂山之上世傳梁天  
監元年有村姥姓蔣氏居山之東因有  
異感孕而生白龍失所往三日龍歸若

就乳姥怖而死卽所居葬之旣而大雷  
雨冢遷于山腹歲之五月龍率來省或  
見形山間始至必甚風雨旣畱則一境  
爲之寒邑人於此候之唐貞觀十年龍  
嘗鬪黑龍于海虞山之東邑人因像事  
龍母子于破山寺西澗旁水旱禱焉咸  
通十三年令周思輯就爲廟貌以祀之  
見皮日宋太平興國四年令蔣文懌復  
休記遷而歸諸頂山寺重建祠宇  
見蔣文懌及陸韶之

記政和二年賜廟號煥靈五年令朱彥  
求請於朝封宣惠侯遷其祠于山腰龍  
池之上紹興壬申加封通濟辛巳逆亮  
犯順御降祝文以禱時李寶奏海道之  
捷旣而獲裨將倪新殷簡二賊昌言於  
衆曰當戰之時有大龍舟旗幟皆白上  
植一認旗書海虞山龔皓俄風濤大起  
虜舟皆不能自制遂爲所勝衆因悟龔  
乃龍字皓者白色蓋龍助順云淳熙元

年加封靈澤紹熙甲寅歲令葉知幾以  
雨暘響答聞諸朝加封靈澤宣惠通濟  
孚應侯嘉定十一年令趙崇忘復以禱  
旱而應請於朝加封為靈澤宣惠通濟  
孚應廣利公母為靈順慈穆顯祐普應  
夫人且為亭軒以嚴禱賽之所見趙時  
自是邑人奉事愈加虔謹云紹熙甲寅  
于夏五月殿院冷公世光閔焉率同搢  
紳禱神于慧日以繼邑官之後越五日  
雨未降冷公夢白衣老人嘆曰諸公日  
以虔其誠我則夜以虔其身公問老人

為誰答曰我即龍也水涸甚將於何取  
之傍有枯澗澗底水一泓老人指曰可  
取矣公條然寤因作偈曰閔雨而禱非  
誠莫通龍感至誠盡力其中我獨何人  
應之以夢願言施澤風起水湧徐覺窗  
紙皆鳴甘雨驟至終日不止人情釋然  
公嘗記其事邑令孫應時下車未幾苦  
旱亦迎禱于慧日五月九日龍見空中  
當寺西尚湖之濱其上片雲正黑爪足  
時露而尾垂屬地可數十丈蜿蜒卷舒  
色如霜雪疎雨隨灑既隱復見可數食  
頃乃收舉邑父老以為生所未覩後二  
日大雨告足人謂孫令誠禱所致自是  
迄令終更苜請輒應然令常自詣頂山  
焚香默禱不用常儀云

東嶽行祠在縣北四十里福山至和七

年魏邦哲爲之記以爲福山離宮經始於至和之初每歲季春嶽靈誕日芻郡人不遠數百里結社火具舟車齋香信詣祠下致禮敬者吹簫擊鼓揭號華旗相屬於道又載父老之語肇祀之日有幅畫乘潮而至乃嶽神像居民欽祀而加信焉而李薰爲之記則謂創於至和增大於元符福山卽古之覆釜唐之金鳳山也二記所載大略可觀廟貌威嚴禍福顯應有胡子文者因醉侮慢善惡判官神怒譴之事見內翰洪景盧夷堅志

吳王夫差廟在縣西二里虞山

吳郡志云夫差

廟今村落間有之茲其一歟

越王勾踐廟在縣西北七里虞山二廟竝熙寧間道士李則正建議者以爲滅吳者勾踐也實爲吳之深讎不應廟祀于此當徹去之

春申君廟在縣西南三十六里練塘市  
要離廟在縣西南四十里歸政鄉  
徐偃王廟在縣西四十二里永春鄉名鄉  
未詳舊經以爲偃王失國而亾至膠山而  
終遂立廟于此按韓愈記徐子章禹旣  
執於吳徐之公族子弟散之徐揚二州  
今揚州之境多有廟豈亦因其公族子  
弟所至而然乎  
莫耶廟在縣西南二十里莫城

靈惠廟在縣治東南百步本縣土神周  
太尉之祠神姓周名容生而事母至孝  
歿而告母曰兒已爲神當輸忠朝廷盡  
力鄉里宋淳祐初邑人鄉貢進士陳權  
簿建祠祀之後報慈寺僧耀觀主增置  
寢室奉神父母像于廟淳祐十二年壬  
子進士趙必錡等奏神靈跡勅賜廟額  
牒文尚存

橫涇東嶽廟在縣東南一百二十里宋

咸淳十年里人國諭張士元建以爲一方祈福之所

○寺

慧日禪院在縣治西稍北九十步梁吳興僧慧嚮姓懷氏造大寺三在淮南曰慧照崑山曰慧聚常熟曰慧日今慧聚有碑存焉天監初爲十方禪林老宿相傳謂三錫勅額曰壽聖曰晏安大中祥符元年初賜今額舊經乃謂本常平禪院未詳其故常熟叢林之盛此居其首居闐闐中而有山林瀟灑之趣紹興十五年一夕煨燼自乾道淳熙歷慶元嘉泰以至嘉定增葺始備歲入亦增益僧徒常數百人遂爲一方名刹矣

崇教興福寺在縣治東稍北二百步建炎四年建寺基本沮洳地僧文用者善風水謂此邑客山高而主位低請立浮圖以鎮之令李闔之深然其說遂令建



塔功未及半而文用死俗呼爲塔院

壽聖東靈寺在縣治西北一里梁大同

中建

見鍾樓記

唐嗣聖二年爲中興寺元在

吳縣界神龍元年賜今額移於今所宋

熙寧六年重修

見陸徽之莊田記

有子院曰延

福教院梁天監中建宋端拱中重建

天寧寺在縣治西北二百五十步梁天

監二年建今爲尼寺寺有康僧大師極

靈驗相傳云有漁者夢一僧謂之曰我

卽康僧也可逆我於天寧漁父以告邑

中緇徒皆俟于海隅但見一木浮沉於

波濤之間不可近惟天寧得之因刻爲

僧像奉以香火今不知幾年矣邑人祈

求男女多驗

齊樂寺在縣治西二百步梁大同二年

建今爲尼寺

報慈教院在縣北五里崇寧二年建內

有十六觀堂久廢寶祐二年邑寓趙雲

安崇驥重修仍置田給之

破山興福寺去邑九里齊始興五年邑人郴州刺史倪德光捨宅爲大慈寺至梁大同三年改興福寺飛泉石橋修廊複閣氣象雄古多唐時屋也僧堂三柱各有神書數字相傳唐初雷震故然皆倒書奇怪不可識門外二老松如虬龍屈蟠異甚庭有瓔珞樹尤古左開花右結子池產重萼千葉白蓮芳色異常有

唐懿宗賜鍾文云唐咸通九年歲次戊子正月二十一日賜破山興福寺鍾一口重一千三百六斤破山之名舊傳正觀中有老宿在寺說法常有白髯老人每旦必先至一日師問爲誰曰某山中白龍也師願見其形老人云我見形時當念摩訶經號助我之威師怖誤誦揭諦神呪神以杵擊龍龍衝山而去遂成破澗又略高僧傳云白龍與黑龍交勇

衝迸成蹊朱長文志云正觀中山中嫗  
生白龍與一龍鬪於此而成澗則又與  
白龍祠事相涉三說未知孰是寺有四  
高僧祠唐之懷述字體如吳人常達字  
文舉邑人朱梁彥偁邑人宋悟恩邑人  
其彥偁者壽九十九歲戒行清苦一夜  
登閣有虎中箭咆吼于地師徐爲拔之  
虎偃伏瞑目舐血而往至曉獵師朱德  
者尋蹤至師示以矢鏃朱感悟爲罷獵

有碑存焉自唐以來名人才士畱詠百  
數寺有通幽軒空心亭蓋取常建詩中  
語也詩見題詠門朱長文志云有文舉  
塔體如塔皆高僧有宗教院雍熙中高  
僧悟恩修天台教於此今廢

文舉塔常  
達字文舉

隱此山雖王侯莫得見之  
體如塔僧懷述字體如也

光明庵興福寺之屬院也熙寧辛亥僧  
海素經始紹聖間僧建在山腰龍鬪澗  
之上最爲勝絕望之縹緲若仙居僧仲

殊爲之記陳徽猷起宗亦有宿光明庵  
詩

顯親資福禪院在虞山之北巔上本名  
石屋維摩庵中有石井名湧泉淳熙三  
年曾丞相懷家請爲功德院勅賜今額  
頂山廣福院在縣西北十八里虞山北  
嶺下梁大同十二年石史君回舍宅名  
頂山院至宋治平四年改賜頂山壽聖  
院後又改今名景祐間太常博士陸景

有頂山十詠曰烏目山桃花澗翠珉橋  
羽客臺萬歲石石門庵白雲泉碧薜園  
龍母池凌雲徑今所存一二耳白龍祠  
正與寺相對

上方院在頂山寺右小巔之外夾兩山  
之間其前積石坡陀松竹幽翳澗水湍  
激醒人心神寂爲虞山佳處范文正公  
嘗有詩遺僧至師刻石在焉院有觀音  
像嘗有光異劉御史拯爲邑令時記其

事邑人尊事之遇水旱必與龍母及龍像偕迎至邑寺禱祈嘗有應院有白龍泉清甘不竭舊有白鰻隱見其間今少見之矣

瑞石庵在頂山之巔上方院之右幽深峭絕竹栢蒼蔚宋明道元年邑民陳氏築庵延僧守常居之治平丙午縣令向公宗旦命僧慧安繼其後尚書祠部員外郎錢藻爲之記侍郎王琪主簿陳珏皆有詩今爲叅議虞公似平墳庵有令孫應時詩

中峰庵在頂山之南峰

寶嚴院在縣西十八里虞山之西麓所謂倚山面湖秀列屏障者也梁天監初建舊名延福禪院唐會昌中廢宋端拱中再行葺治天禧中邑令胡順之飛章上請改賜今額當錢氏霸國時有希辯禪師棲處此山以名聞及錢氏納土隨

詔詣闕賜號慧明大師歸隱舊刹錢氏  
復施金五百兩造七級浮圖淳化中太  
宗詔賜急就章逍遙詠祕藏詮太平聖  
惠方李堪修仁宗朝賜銅鑄天齊仁聖  
帝像爲伽藍而增葺始完備矣見邑人陸絳記  
有李堪嚴煥有子院曰泗州院  
淨慧禪院在縣西南三十六里練塘市  
舊名仁王見陳冕開寶中鄒知邈知造  
施地爲之大中祥符元年賜今額見夏文

記

觀音教院在縣西南五十里楊尖市政  
和五年建

妙清院在縣東南二十里莫城陳禎明  
二年建

吳塘接待院在縣南五十里建炎間建  
勝法寺在縣東三十六里梅里鎮唐元  
和中閻將軍舍宅爲之乾元元年置爲  
離火宅寺晉開運中改爲境寧宋大中

祥符元年勅賜今額至和初更為禪院  
初閻將軍舍宅為寺而不著其名今為  
寺之伽藍神極靈異士大夫有攜家以  
居者必有蛇虺見之箱篋牀蓆之間以  
是不敢久居寺之東有冢在焉歲時寺  
僧如家人禮設蒲饌以祭寺之西北隅  
有洗馬池池之側有小塚葬其劔甲云  
有參政李光尚書員外郎陸絳詩又有  
石林先生所作輪藏記皆刻兩龕之廡

下

延福禪院在縣西一十三里虞山嶺下

梁大同二年置

見祥符圖經

法解寺在縣東七十里許浦鎮舊名泗  
州塔院隆興元年浙東西泰海州江海  
制置李寶申請遂移端委鄉中沙村廢

寺額於此

法解寺元係唐會昌元年里人陸殊等舍地為寺賜額法

解

能仁寺在縣東一百四十里崇寧五年

建

萬壽寺在縣東一百四十里甘草市  
聖像寺在縣東一百一十里陸河市始  
吳僕射徐真捨宅爲寺晉建興二年得  
泛海二石佛像奏請今額宋嘉祐八年  
朱肱重建僧仲殊爲之記

褒親崇惠寺在縣東南七十二里係宋  
靖懿帝姬殯所政和七年賜額

明因禪院在縣東南七十二里支塘市

舊曰永昌乾元中廢咸通中始復遂爲  
再昌寺宋祥符元年改今額熙寧六年

遂爲禪院

見陳  
于記

廣安寺在縣東南一百里直塘市唐乾  
元初建爲寶林寺宋祥符元年賜今額  
紹興六年僧了悟舍房基建塔開鑿地  
宮獲塼銘有長安二年瞿像寶塔之字  
乃知唐武后時嘗建塔于此塔成因以  
瞿像名之以表其異乾元初有簡大師



者領二犬來游卓庵於此插竹林以布  
護籬落忽爾鬱茂後遂成林

靈寶寺華嚴禪院在縣東南一百二十  
里塗菘市唐乾元初建

法輪寺在縣東南一百十里晉咸和六  
年有雙龜化爲雙鳳騰飛號曰雙鳳宋  
大中祥符元年勅賜今額

智林寺在縣東北六十里李墓唐乾元  
元年建爲永安寺咸通二年改易幢塔

至周顯德中得州符鼎新之詳見元祐  
二年結界記宋大觀四年爲犯宣祖陵  
名改爲今額寺舊在峒身父老云所撞  
之鐘近或不聞而多應於李墓一方之  
地其鄉人議之曰此地豈有緣耶遂徙  
其寺於此至今舊寺傍有涇曰寺涇其  
址巍然尚存參政李公光爲令時嘗遊  
寺有詩寺有高僧曰了通嗜酒不檢衆  
所不足一日通州狼山寺火其衆見烈

焰中一僧以袖撲滅火自稱曰智林寺  
了通和尚明日衆詣智林爲謝適了通  
醉力辭無之旣而沐浴告逝問寺衆曰  
我去汝等欲無事耶欲有事耶衆曰願  
無事遂盡火其寺

壽聖晏安院在縣東北七十里許浦鎮  
陳禎明三年建本名晏安禪院宋治平  
四年勅賜今名

大慈寺在縣北四十里福山鎮梁大清  
元年建或謂天監中爲法水禪院宋大  
中祥符元年賜今額中遭回祿焚毀殆  
盡近始鼎新焉傳聞海中有巨木蕩漾  
其間他寺欲求而不可惟大慈一禱得  
之遂以爲僧堂巨棟標之曰泛海梁至  
今尚存

永慶寺在縣西北四十五里河陽鳳凰  
山梁大同二年置結界記云梁侍御史  
陸孝本捨宅爲寺至宋政和四年甲午

經五百八十七年始乞奏名大福寺至  
大中祥符元年九月內改賜今額有碑  
存焉故老相傳有僧肉身泛海而來狀  
貌奇古僧徒迎而置之寺固以膠漆奉  
以香火至今存焉遠近求男女者多驗  
其碑瘞之鍾樓下上塑鬼神之獰惡者  
以護之今不可得而見之山絕頂有天  
然石井一蓋泉穴也廣二尺泉清而甘  
雖大旱不竭鄉人目曰聖井樵牧者戲  
以土石窒之今所存無幾寺之庭有八  
檜皆數百年之物交締膠結如翔龍怒  
虬一夕雷震其西南一株撒其枝附著  
它幹旣與本體離絕爲二而其青青猶  
故是謂寺之三絕祕書丞李堪常有詩  
溫部中革字彥機來遊亦有詩  
法輪寺在縣西四十五里志山嶺下紹  
興九年移於今所  
淨居院在縣西北八十七里慶安鎮梁

大同二年建為尊勝宋大中祥符元年

賜今額

見知制誥錢易經藏記

法寧教寺在縣東北三十六里東花莊  
宋端平三年平江北禪寺住持僧如瑤  
建嘉熙四年僧居簡為之記

泗洲殿在縣東一百一十里下陸河要  
道中吳赤烏二年僧達法師建累遭兵  
燹宋嘉泰四年里人崔七朝奉捨宅遷  
建係聖像寺子院

妙相經堂在縣治東南二百步宋咸淳  
元年本邑道人李淨修買地躬建

宮觀

致道觀舊名乾元政和間改今名在縣  
西一里虞山南嶺下梁天監二年建舊  
志載漢天師十二代孫張裕在此山修  
道白日仙去而梁昭明太子碑則曰張  
道裕朱長文吳門志載張裕先生來此  
山棲遁十餘載夢神人告曰峰下之地

面勢閒寂可以卜居裕如教興葺號曰  
招真後改曰乾元梁簡文帝嘗賜玉案  
一面鍾一口今梁殿尚存規模壯麗材  
植雄偉紫微殿後尚有煉丹井舊傳治  
平中主觀道士李則正浚井得石函一  
中有綠合藏丹二粒卽化爲雙鴿飛去  
縣令陳照隣持其函以往而綠合爲則  
正所藏則正善醫至藥所不療者則以  
水煮合以飲之疾必愈自則正死而合

不知所在矣其丹或至夜陰晦若有二  
炬遊走湖市倏忽無常紹興初入猶每  
每見之照隣嘗有詩云鍊丹井存瓊鬢  
古驂鸞人去玉堂空觀西北嶺上有凌  
虛堂窈俯萬瓦下瞰平湖先名望湖不  
知創自何年亦邑大夫尋勝行樂之地  
今之名蓋取僧仲殊下壓凌虛萬象閑  
之句也

宋御筆下州軍宮觀三十間以  
上及圖經所記洞天福地未有

額者許監司保奏取旨賜額本府保奏  
此縣乾元宮有屋一百三十間著在圖

經宣和七年  
勅賜致道觀

乾元宮在虞山之巔始名竹林庵後改  
招真庵在致道觀之北嶺上宋元祐中  
海陵徐神翁之弟子申先生欲南遊請  
于師師曰逢虞卽止無雪卽開申遂渡  
江至是山徘徊瞻眺久之問於人曰虞  
山也卽築庵居焉然患無水一日大雪  
唯山坳不積浚之得美泉至今雖旱不  
竭庵成一日申公不知所往繼之者累

加增葺今堂宇煥麗林木茂鬱遂成壯  
觀紹興丁卯中道士喻抱元增築改名  
招真庵見康舉之記淳熙間邑人以致  
道舊額乾元宮之名請于郡改今名宮  
門之外有一亭名極目極雄偉邑令何  
袞所創面勢寬閑平野一望數十里姑  
蘇崑山無錫諸山屏列又有兩湖居其  
左右實爲一邑勝槩之冠初山路犖确  
躋攀艱險道者胡道堅募緣自教場西

山趾以甃甃砌直達宮門路始夷坦登陟便之遐望如白練界山善風水者顧謂弗宜嘉泰壬戌有邑民挾鬼神事走白集撰趙公豫於是度材鳩工卽山腰跨路立亭厭勝之自有碑記載始末清真觀在縣治西一百五十步梁普通四年建舊爲女冠之居今廢真武道院在許浦鎮乾道間都統馮湛建嘉定丁丑都統吳英徹而新之

崇真道院在許浦鎮紹熙三年都統劉震建未幾江潮漫齧嘉定十年丁丑都統制吳英卜基於舊址之南重新剏造嘉定十七年甲申陞爲洞晨觀至和道院在縣治西二百步宋咸淳辛未天台高士應梅所剏建

棲真道院在縣東北七十里許浦鎮宋嘉定五年壬申高士周智靜建延真道院在縣東南一百二十里塗菴

市宋嘉定十六年癸未前平江府檢察  
宗室尊長趙伯建

頤真館在梅里鎮南申道人煉丹之地  
有煉丹井與虞山招真福山潛真爲三  
真云

潛真館在福山鎮亦申道人煉丹之地

冢墓

吳仲雍墓史記索隱吳地記曰仲雍冢  
在吳鄉常熟縣西海虞山上與言偃冢

竝列太平寰宇記曰常熟虞山有仲雍  
齊女墓東是仲雍西是齊女梁昭明太  
子招真治碑云遠望仲雍而高墓蕭瑟  
傍臨齊女而衰壟蒼茫今碑刻尚存而  
墓不知孰是

齊女墓吳越春秋云吳太子娶齊女女  
思齊而病將死曰必葬我於虞山之巔  
以望齊國闔閭傷之如其言葬虞山之

巔

晉案越絕書云齊門闔廬伐齊大克  
取齊女爲質子爲造齊門置于水海



虛其臺在車道左水海右去縣七十里  
齊女思共國死葬於西山又案吳越春  
秋云吳王謀伐齊齊子使女為質于吳  
吳王因為太子波聘齊女女少思齊日  
夜號泣因乃為病闔閭乃起北門名曰  
望齊門令女往遊其上女思不止病日  
益甚乃至殂落女曰令死者有知必葬  
我于虞山之巔以望齊國闔閭傷之正  
如其言乃葬虞山之巔是時太子亦病  
而死○寰宇記常熟虞山有齊女冢

周章墓按郡圖經周章闔閭長子墓在  
海虞山上

言偃墓

黃香墓在梅里鎮黃香字文彊江夏安

陵人性至孝詳具東漢本傳乾道初梅

里有蘇忠翊直卜葬得古篆乃黃香墓

碑刻皆隸字首兩句八字中二字不可

識延陵慈父葬子博羸其碑陰乃會稽

東部都尉張紘誅又有辭綜修祠日月

題刻其可辨者八字子瓊孫琬蘇氏挈

歸于家夜有光怪昇棄昆承湖中

瞿矧先生墓慶元志曰在直塘市市有

寺曰廣文一日浚塘得古冢墓博稱瞿

劓先生字鵲子廣川人隱居不仕葬於東陵武丘寺重岡之原武安蓋廣安舊額今其地尚多瞿姓晉書隱逸傳瞿劓先生者不得姓名亦不知何許人也太和末常居宣城郡界文脊山中山有瞿劓因以爲名焉大司馬桓溫嘗往造之旣至見先生被鹿裘坐于石室神無忤色溫及僚佐數十人皆莫測之乃命伏滔爲之銘贊竟卒于山中此正猶孫叔敖史失其名得其碑乃知名饒叔敖之名由是以著瞿劓亦近此

蕭天子墓慶元志寶嚴寺之東丁家灣之西故老相傳云蕭天子墓墓上有古木樵牧不敢近不知何帝也按江陰志蕭天子在長信鄉有大土封號倉堆相傳爲蕭天子墓又按梁史梁敬華爲江陰王殂蕭季卿嗣陳大建二年除侍中淳于氏就季卿買梁陵中樹皆坐免卽

此觀之墓亦有自矣

或謂蕭天子墓不應在此按唐史蕭

存父穎一名播天下王常盧異等皆執

其父死或葬於此地不可知恐是蕭夫

子墓訛夫字作天字耳然史謂穎士客

死汝南又未知果葬於此

否也姑備所聞以俟博識

李墓在縣東南四十五里慶元志云父

老相傳吳越錢王遣將梅世忠李開山

屯梅里今開山卒葬於其旁十八里故

曰李墓今土人或謂之李王墓其土堅

緻如石斲之有聲

陸丞相墓在開元鄉岡下村墓左有涇

曰大墓浜昔村民浚涇嘗得朱漆板古

刁錢鍊牌未知丞相為誰也

重修琴川志卷十一

叙文

文以紀述詩以賦詠而實事賴以詔後垂遠者  
蓋於此有攷焉常熟為縣自梁碑揭於招真唐  
詩題於破山而鴻筆麗藻之士繼踵而作實昉  
於此殆不可以不錄也故作叙文

碑記

常熟縣志題名記

常熟為縣其來久矣舊為毗陵郡南沙至梁改



爲常熟自梁歷唐迄于僞吳幾數百年前尹是  
邑者姓名莫或紀錄故不得而考宋太平興國  
中錢氏以圖籍歸于京師始於縣令蔣文懌至  
元豐初知縣宣德郎劉拯求得其姓名凡四十  
二人列之板榜置於廳壁自此來尹者至則書  
之觀其間相繼登金門上玉堂羽儀臺閣正位  
樞極蓋翩翩焉未見其止余因承乏慮版榜不  
足以久於是命工鐫之于石立於廳之左闕者  
補之庶爲不朽之傳宜觀名列以勸方來俾尹  
是邑者知夫儒之效愷悌及民延福百里庶幾  
乎刊石而無愧也紹興二十一年九月魯國公  
曾慎記

續題名記

上方駐蹕臨安於時吳門視周畿內漢三輔唐  
同華我舊京之陳鄭也衣冠之所鱗集甲兵之  
所雲萃一都之會五方之聚上腴沃壤占籍者  
衆雖前代與全盛時猶不可同年語府邑之事  
宜其倍稱况府庫之出納獄市之浩穰蓋不待

較而知者環府之邑五而常熟居其望焉時主  
客以戶計者八千九百七十有二今五萬一千  
三十八夏賦金錢爲緡二千八百其幣帛疋合  
萬二千六百而奇弗詳秋租穀粟七萬六千餘  
斛乃今折帛爲緡者十萬二千三百而斛財損  
其舊二千邑之事其倍稱何如哉今其邑從事  
於民者如是而邑復瀕海道直故彊沂密登萊  
全齊在望刺利規恢舟師所宿則實居今日之  
要害風檣連林夜嚴震海資糧鉅萬以日饋給  
營繕百頃以時調度苟有不至責且乏興若民  
兵之事又如是重以府所倚集版籍輸委風雨  
寒暑不踰比爲令者材或不濟負罪投劾而去  
者頂背相望也則壁記之不列何以自警朝夕  
庸少惰乎映不佞爰來亦旣年所事定得閒始  
閱次中興以來爲令者至映之名氏授受月而  
日之鑿石壁端以告來者噫令秩比京寺月奉  
逾二萬廩逾四斛歲入圭田直過六百石其顧  
一已之利害去就而不思其責之塞將不特能

禍其身千室之邑亦必有受其弊者而映其敢  
墮哉今吾邑之人或知映不敢墮也率以淳厚  
簡孚交相爲治倘如是惕日庶乎列名下方其  
無辱若夫邑之望則有巫咸所止之山秦伯所  
葬之墟言偃所居之里龔景材所表之閭其風  
俗之美猶可槩見而邑之升置凡附於府者有  
職方氏在故不記記其今昔之同異云淳熙元  
年邑令陳映記龔頤正代

縣丞題名記

琴川吳郡之劇邑也民賦之庶戶口之繁非他  
邑比以累政大夫數更易而貳令者類不得少  
休漑再轉而丞茲邑又適多事之秋攝事幾年  
所謂松竹佳趣乃變爲鞭笞之地庭槐無存廳  
宇壞漏俱未暇過而問焉茲幸令尹葉君來此  
年餘百廢具舉政平事簡僚佐得以少安遂可  
畱心悉與葺理皆成綸緒獨不見有題名記心  
竊疑焉因埽灑書齋得二斷板於塵埃間拂拭  
視之乃其記也歲久字泯漫不可覽殊失所以

重前賢之意易以琬琰而刊前後賢者之芳字予亦得以託不朽顧不幸與嘉定改元歲在戊辰首夏望日錫山張漑記

主簿題名記

邑令丞而次有簿古職員令也掌凡邑之簿籍勾稽之事糾正縣內之治外此無責職若其簡然豈知戶籍有升降產稅有去畱悉關筆削一或不謹則墮吏奸民且受病矧琴川繁劇甲於中吳去臺府纔三舍遠財賦分督牒訴委洪檄命驅馳靡日不殷職亦未爲簡也汝邨冒承茲乏汲汲捄過自惟無足以傳後惡有所謂光於前者試求前人之名氏稽其行事以質其窮通而壁記闕然漫不可尋究訪之故老僅得今尚書蕭公而下十有三人焉前乎此者莫知也將立石以紀之或乃謂人材短長政事臧否民言士論足可以印惡用是爲哉余應之曰公議誠足信然閱歲滋久名且不著實將安口故知今之所訪已若此余恐後之訪今蓋不如今之訪



昔也奚以詔方來僉曰然迺鑿諸石嘉定戊寅  
十一月初三日雲間趙汝邨記

縣尉題名記

縣有尉居丞簿下然號劇曹而縣令埒歷代選  
用常艱其人彊者作聰明苛察操切以擾善民  
弱者不勝任縱奸長惡以害吾民其當官以威  
惠稱職聞者異時以之宰邑刺史司察一道皆  
可判然迎刃而解常熟爲浙右壯縣地鉅事叢  
吏猾民奸竝江濱海而東界爲盜藪古有三尉  
分治長老傳聞廢置歲月無攷爰自合并以來  
舊矣雖仕于此者材名文士往往間見然未聞  
有卓然超越爲當世聞人者用是奔走巡徼日  
不暇給率弗遑問其遠者大者此壁記所以不  
立而前事之師後事之鑑來者泯無觀焉今尉  
黃君應酉建安奇士也繇始莅職洎茲垂滿寬  
而栗威而不猛加惠黔庶芟鉏豪強黠吏束手  
受制所隸弓兵不寒而慄部內賊發輒搜捕得  
其主名遠鄉隣境藉其威聲巨奸大盜漸以屏

息今茲盜賞踰格將換京秩行且飛黃騰蹋脫  
迹泥蟠而強弩之末猶賈餘勇植志夔邈去如  
始至大懼題名未創無以傳後自我作古勒茲  
堅珉余見其材謂之華政事之美嘉其替之迫  
而請之堅也於是乎書奉議郎知嘗熟縣事徐  
次鐸嘉定元年記

社壇壁記

有民人焉有社稷焉民爲貴社稷次之臨民所  
重莫先於社稷也常熟之爲邑亦古子男之國  
於邑之西所寄以奉社稷之祀皆頽垣敗屋壇  
壝墮圯任古之官之初會春祀莫遑展俎豆之  
事以薦此誠念何以報神休而答陰貺越歲方  
鳩工而治之其所費不謀於公帑不假之民力  
亦取其有罪膏而不麗于法者命贖之壯者獻  
其力富者助其資卒無異詞始於今年之孟秋  
報成於冬初其壇壝垣屋爲之一新雖無華麗  
亦使邑人知社稷之重察邑官之所存焉紹興  
甲戌冬十月縣令陶任古記

修社壇記

昔人語爲宰以謂有民人焉有社稷焉先人民後社稷以見二者俱重而其序不可易爲宰者先民後神固有次第而治民事神又自吾身始蓋繇身以及民由民以及神本末相貫初無二理故身正而民治民治而神立于以修祠壇嚴祀典迺其所也淳熙庚子冬陳君來宰常熟其始至也胥吏眊然案牘紛然民情茶然色色頽弊待我糾剔窮日之力猶恐不遑何暇及他事

然而陳君不然區處數月皆有條理民且就蘇陳君曰事無不可爲在人耳次年夏淫雨不止農畝告病以謂開闔之權神寶司之顧典祀之重莫若社稷今其壇壝不葺門宇不全神且皇顧民將焉福於是輟經費僦工徒督治之不旬日間圯壞者以固欹折者以整汚墁堙闕者以飾旋旋然一還舊觀人心忻快以爲不圖復見此以是知嚮薦衍有所寓祈報有所歸其厚于神乃所以庇于民也然而陳君繇身以及民繇

民以及神誠得設施之本知先後之叙者也予  
稔聞盛舉嘉陳君之政表裏兼濟自有次第未  
易以淺淺窺測用紀其實以詔將來俾得稽考  
云是歲秋九月二日朝奉大夫尚書吏部郎中  
詹儀之記

修社稷壇記

開禧三年春嘗熟縣令闕雲川葉侯凱奉辟命  
來宰是邑始至有事于社稷侯往與祭顧壇壝  
之隳圯屋宇之荒蕪慨然語諸僚曰昔言爲宰  
有民人焉有社稷焉二者俱不可無也今祈報  
之祀廢而弗舉神將焉依民不受福坐視其廢  
而弗葺可乎前人不相與相是役者何僚曰侯  
未之知耳常熟爲吳會劇邑前乎綰縣章未幾  
而去者踵相接也或以財賦不辦去或以獄訟  
不理去或智及之力不能勝之又以廢事去惴  
惴逭責猶不能免奚暇他及侯以爲不然天下  
事未嘗無興廢人實爲之夫有邑則有民有民  
則有社豈有宰堂堂之邑先畏其難不爲之計

乎於是莅事以勤行已以潔聽訟以公待人以  
恕利民者興害民者除始若悶悶不快人意侯  
守之不惑居數月果以政報上下晏安百廢具  
興社稷之事似可以次第舉而侯猶以爲未也  
先是縣有學歲久繕治不時傾闕欲壓乃命諸  
執事者諭以民爲貴社稷次之之意予欲先修  
學以訓民諸君盍相率以董成焉蠲吉鳩工不  
戒而具踰月而殿廡增麗丹陽公之舊室湫隘  
無容膝地又從而廣其居學校爲之一新又明  
年始議所以修社稷嗟夫社稷之剏立其來遠  
矣記載不存歲月無所尋攷修於紹興二十四  
年之冬十月至淳熙八年又修之以迄于今者  
三十載而侯又修之凡物之有興替固不偶然  
獨侯所謂人實爲之信不誣矣侯以儒術飾吏  
事尤通於世務是役也斷斷規模亶惟素定不  
陋不奢悠久是圖不亟不遲恬安是務舊趾築  
土爲壇旁土皆甄也雪霜風雨之餘易以動拔  
於是更以石寸竹之椽若將壓焉悉命以木易

之垣分中外低者高之墁者飾之靡罅弗補靡  
隙弗周煥乎偉哉觀者駭目經始於嘉定二年  
秋八月告成於冬十月既落囑應酉爲記應酉  
何人哉弗敢謝不能君子謂是舉也有可書者  
三方其始至講明農祀不忘本也一宜書及其  
欲修首及鄉校不先神也二宜書迄于已成費  
捐公贏不及民也三宜書春秋之法有一善必  
書一舉而三善備焉得不書於是乎書十月二  
十五日乙卯廸功郎平江府常熟縣尉巡捉私

茶鹽礬兼催綱黃應酉記

社壇記

端平更化之歲山陰王君燭來宰常熟始至召  
邑之故老而問政焉曰久矣此邦之不獲乎上  
下也故老則曰前宰孫應時後皆有以自取也  
君愀然作色曰是吾邑化未始更也乃新學宮  
飾教令詔子游邑人也別爲宇爲像祀之收言  
氏諸孫於農圃而教焉招四方之士若邑之秀  
子弟而學焉士風以變民聽以聳而以爲猶未

也昔太伯之有國於此也禮遜之俗推重天下  
今渡江百年授田無法制賦無藝民無常產則  
無常心宜也乃通邑而經界之以倡吾邑而猶  
以爲未也有田必有役而役莫便於義合公私  
高下爲之十餘年不止仁聲義氣充塞一同大  
綱小紀具在方冊比及三年教化興而賦役簡  
士歌於學民舞於塗今日之事有大於是者乎  
設壇以祀社稷而風雷雨附焉皆本於朱文公  
鄂州社稷記侔來以圖請於郡太守曰予至之  
三日檢視壇壝之不如法者命有司修飾畢具  
又去淫巫之幻以惑衆者朞年之間人用安業  
歲以大熟餘非不樂此而不爲也祀典之不恭  
而老佛是徇民義之不務而巫覡是虔余甚不  
便於此乃掃地而更新之以莫春庀具季夏乃  
畢將以八月中辛集吏行事俾民與觀焉子其  
誌之遂雖以不文爲解然心許之會聖上不以  
爲不治易郡甬東還家未幾則令已被命升帑  
轄而進諸朝徵余文益力余惟文公所託一本

政和新儀而類禮有書始自通典終於嘉定新  
禮往往祥於裸獻陟降而略於壇壝面嚮有所  
謂社東稷西風雨少却皆北嚮者有所謂同壇  
而其牲者於圖疑未合而未有以證也抑聞之  
禮曰郊社所以事上帝也又曰社者所以神地  
之道也意者吾先聖王郊所以祀天人君用之  
社以祭地諸侯用之惟天子爲能祀郊故得望  
祭百神若諸侯則止於社稷故勾龍棄以功配  
風雷雨師以其陰陽晦明及百物者因類而致  
之上不敢擬於太社王社之制下不與羣姓立  
社齒其樽鬯有數牲幣有式至於車服之微因  
其尊卑小大咸有科級報本反始禮之至也而  
別嫌明微於禮之中又有禮焉誠能積精致感  
於盱鬻之間則於天乎不僭何憂乎釋老盡心  
竭力於襁褓之務則於神乎無諂何憂乎巫覡  
自是以往風俗成而氣習厚有以他道惑民者  
鮮矣子曰明乎郊社之禮禘嘗之義治國其如  
示諸掌乎令之爲此庶乎其善治國矣故特書



之以示更化善治之本恤民祀神之務而於祀  
典禮經因有攷云是歲十月朝散大夫煥章閣  
待制前知平江府王遂記

重修琴川志卷十一 終

重修琴川志卷十二

學

丹陽公祠堂記

平江府嘗熟縣學丹陽公祠者孔門高第弟子  
言偃子游之祀也按太史公記孔門諸子多東  
州之士獨公爲吳人而此縣有巷名子游橋名  
文學相傳至今圖經又言公之故宅在縣西北  
而舊井存焉今則雖不復可見而公爲此縣之  
人蓋不誣矣然自孔子之沒以至于今千有六

百餘年郡縣之學通祀先聖公雖以列侍從膾  
食而其鄉邑乃未有能表其事而出之者慶元  
三年七月知縣事通直郎會稽孫應時乃始卽  
其學宮講堂之東偏作爲此堂以奉祀事是歲  
中冬長日之至躬率邑人學士大夫及其子弟  
奠爵釋菜以妥其靈而以書來曰願有記也熹  
惟三代之前帝王之興率在中土以故德行道  
藝之教其行於近者著而人之觀感服習以入  
焉者深若夫句吳之墟則其虞夏五服是爲要  
荒之外爰自泰伯采藥荆蠻始得其民而端委  
以臨之然亦僅沒其身而虞仲之後相傳累世  
乃能有以自通於上國其俗蓋亦朴鄙而不文  
矣公生其間乃能獨悅周公仲尼之道而北學  
於中國身通受業遂因文學以得聖人之一體  
豈不可謂豪傑之士哉今人論語攷其話言類  
皆簡易疎通高暢宏達其曰本之則無者雖若  
見詘於子夏然要爲知有本也則其所爲文學  
固宜有以異乎今世之文學矣旣又攷其行事

則武城之政不小其邑而必以詩書禮樂爲先  
務其視有勇足民之效益有不足爲者至使聖  
師爲之莞爾而笑則其與之之意豈淺哉及其  
取人則又以二事之細而得滅明之賢亦其意  
氣之感默有以相契者以故近世論者意其爲  
人必當敏於聞道而不滯於形器豈所謂南方  
之學得其精華者乃自古而已然也耶矧今全  
吳通爲畿輔文物之盛絕異曩時孫君於此又  
能舉千載之闕遺稽古崇德以勵其學者則武  
城弦歌之意於是在故熹喜聞其事而樂爲之  
書至於孔門設科之法與公之言所謂本所謂  
道及其所以取人者願諸生相與勉焉以進其  
實使此邑之人百世之下復有如公者出而又  
有以一洒夫媮懦憚事無廉恥而嗜飲食之譏  
焉是則孫君之志而亦熹之願也公之追爵自  
唐開元始封吳侯我朝政和禮書已號丹陽公  
而紹興御贊猶有唐封至淳熙間所頒位次又  
改稱吳公云五年六月甲申朝奉大夫致仕婺

源縣開國男食邑三百戶賜紫金魚袋朱熹記

常熟縣重建學宮記

常熟縣學之始圖乘放失僅有屋梁書至和紀年餘無所攷慶元三年縣令孫應時以言游里人也始祠于學新安朱子旣爲證其事寶慶元年祠遷于學之左而孔堂闕壞弗不加治今令會稽王爚始至大懼無以崇化善俗約縮浮蠹踰年更而正之屬邑士胡洽胡淳董其役以孔廟居左廟之南爲大門北爲言游之祠又東北爲本朝周子張子二程子朱文公張宣公之祠以明倫居右東西爲齋廬四以館士爲塾二東以儲書凡祭器祭服藏焉西以居言氏之裔通爲屋一百有二十楹而爲垣以宮之且增田四百畝有奇歲助公養之費凡言氏之裔官爲衣食而延師以教之別爲田五百畝以給其費白于郡于部使者爲廩以貯之經始于端平之二年之冬竣事於明年之秋迺八月丁亥釋奠于新宮屬郡人葉輔之叙其役以求記於了翁竊

惟朱子嘗記子游之祠矣如魯論所載二三事  
皆發揮無餘藐茲孤陋安敢復措一辭然嘗讀  
禮書而竊有見焉因記廟學之成併附其說夫  
檀弓不知何人所作而一篇之書獨於子游極  
其稱譽雖於孔門諸子率多譏評又以言曾並  
列其是言而非曾者非一幾若偏於抑揚然卽  
其書以攷之大抵當典禮訛闕無所考訂之時  
人之有疑弗決者以質諸子游故前後典禮所  
關者十有四皆以游一言爲可否亦足以見其  
爲時人之耳目雖汰哉叔氏一語若譏之而實  
尊之然則游以習禮列于文學茲其爲文爲學  
蓋三代典章之遺賴游以有存者嗚呼信其爲  
豪傑之士矣昔柳宗元謂論語所載弟子必以  
字惟曾子有子不字遂謂是書出於曾門蓋字  
與子皆得兼稱如門人之於孔子進而稱子不  
敢氏退而稱仲尼不言子其次亦有旣子且字  
如閔子之等不一二人或子或字者又數人然  
淵弓至游夏最號高弟字而不能子也有子曾

子子而不能字也就二者而論則字爲尊蓋子雖有師道之稱係于氏者不過男子之美稱耳故孝經字仲尼而子曾子禮運字仲尼而名言偃至於子思字其祖孟子字其師之祖相傳至今人之字仲尼者無敢以爲疑仲尼作春秋三百四十二年間字而不名者僅十有二人而游夏諸子之門人亦各字其師相承至於漢初猶未敢輕以是許之卽是而觀則子游以句吳孤遠之士遂得字而不子以列于高第之目此又

豈易易然者今吳門密邇行都而常熟爲壯縣有如游之北學洙泗遂以習禮輩行顏閔寥寥千載間豈終無其人耶或者狃於習俗未有以自振我朱子旣嘗表其事以風厲之子又何言獨惟山川風氣古今猶夫人也誦先聖之書服先賢之訓嗚呼其必有聞風興起以無負建學尊賢之意者士其勉之端平三年十月戊戌資政殿學士通議大夫提舉臨安府洞霄宮臨邛郡開國侯食邑一千五百戶實封三百戶魏了

翁記

教育言氏子孫記

按琴川圖志言偃字子游舊宅在縣治之西唐開元追爵吳侯本朝升爲公慶元間令孫應時卽學宮建祠于明倫堂東偏後令遷其祠祀事弗飭有識嗟惋今邑大夫王爚移書諭余曰聖道綦蕪心甚愧之今且一新矣東廟西學前殿後祠奠荐攸序旣順且嚴嘗訪公裔孫則降在編氓罕修儒業由是卽新學西齋扁曰象賢聚言族子弟其中縣給贍養之資買書延師朝夕訓道擇齒長者主公祠宇又慮歲月寢遠美意難繼則爲之節冗費得緡錢六千三百買田以畝計者四百有五十歲入米以斛計者三百有八十庶貽永久願有記焉余歎息曰是舉也可謂知禮矣禮天之經地之義人道之所由立而國家所以恃爲元氣也昔者夫子與於蜡賓實有感於魯喟然發嘆子游遂問禮而夫子歷舉上古與後世之變而斷以禮之廢興子游凡三

問而夫子三答皆所以極言禮也。異時燕居從容，子游子張，子貢侍從，言至於禮，而子游又發領惡全好之問。夫子然之，攷諸檀弓所載，以曾子之任道尚推子游爲習禮。其裼襲一節，則曾子慊然自知其過，與他所論禮皆精入毫髮。得聖人之傳，至於論子游之門人，則謂僅可當灑掃應對進退之末，而本之則無。然則知本斯可謂知禮。此正夫子所以大林放之問而未可以子夏之論小之也。且子游吳人也，太伯端委以治周禮，其源流有自來矣。而況講習於洙泗之間，巍然在四科之列，武城弦歌之風，回視斷髮文身羸以爲飾者，其氣象果何如？故子游之言曰：直情徑行者，戎狄之道也。禮道則不然。品節斯須之謂禮。嗚呼！一日無禮，則淪入于夷狄，甚可懼也。故始之創祠知禮也，後之遷祠廢禮也。今王君大修學宮，祠先賢而教養其後裔，於是乎能復禮而言氏子孫藏修其間者，又能夙夜服習，則禮之興也，其庶矣乎。傳曰：禮不明則上



下昏何以長世然則斯舉也於國祚亦有關焉  
是不可以無述迺爲之書嘉熙改元四月癸未  
朝散大夫試中書舍人賜紫金魚袋袁甫記

○役

歸政鄉義役記

役以義名美意也古者百里有宰比衆寡治政  
令實惟下士不爲居之榮人仰之且尊厥後井  
牧廢官爲限田之豐嗇而別貴賤定賦之登降  
而等貧富量役之久近而均勞佚法猶去古未  
遠自豪民挾詐猾吏舞文寄名竄籍竝緣爲奸  
一經代更百計規免事力雄者以役近告歲月  
遠者以產薄辭謀訴紛然五角已勝甚而閭門  
不相愛宗族不遑恤況鄰里鄉黨乎且役非不  
義而民至不樂爲如避讎怨吁可嘆已雖然其  
來有繇也里有水火盜賊之變上於正縣有供  
億科配之煩下於正正一身尸數責力且不逮  
其費可知視昔豈不憂乎難哉吾里正久闕人  
往往坐此將領葛君號鄉望族慨焉倡爲義役

甚盛舉也於是載盟凡一十七人得田四百三十有八畝歲計所收三百斛捐產者計其貲受輸者董其事以歲之入贍歲之費使里無闕政家無失業人無競心行之當時而公施之後日而便益一舉而二美具抑義矣夫迺移書於攀爲我誌之攀聞而喜曰舍傍有此義事是烏可亾紀竊惟天下之事難於成而易於毀興於暫而隳於久勢使然也矧在令甲助役雖聽民便一有詞焉法卽沮格葛君行及瓜茲役成義達

于鄉伊經始之力若夫期之悠久可行又在乎同盟相與維持勿替初意葛君名觀字利用云嘉定三年二月初二日朝奉郎監登聞鼓院張攀記

### 義役記

孟子曰仁政必自經界始斯言也爲分田制祿言之也後世經界不正利害所關抑有出於井地不均穀祿不平之外者非役法云乎哉古者地有上中下之分而可任也者以是爲差又家

毋過一人歲不過三日是故力役公而民不憚  
司徒之職廢大東之詩作役之病民也久矣蓋  
自經界紊而兼并興於是乎產有貧富力有強  
弱長民者惟知役民之力以奉乎已不知計民  
之產以均其役富者彊者往往幸免而貧且弱  
者莫或遑息仁政吾不得而見之矣若義役之  
利力公於衆而不弊於偏事定於豫而不失之  
驟行之以不忍人之心其庶乎然非接乎經界  
之後則貧富之不失其平而彊弱之莫究其實  
雖欲行之不可得已平江爲東南會府常熟爲  
平江壯邑物衆地大吏黠賦殷政以是厖山陰  
君始至會郡太守右文殿修撰張公嗣古取嘉  
定經界成例頒諸邑君以未施信于民難之  
越明年乃始奉命釐其舊而新是圖旣巨室無  
詭寄之欺小民無抑納之患貧富弱彊瞭然在  
目乃遠稽乾道之詔近述寶慶之旨都爲義役  
奉達尊以倡其始諭比屋而和其衷傭閒民之  
無職事者以服其役役之大者曰保正以式法

受政令而賦于下。役之小者曰苗長稅。長視歲時之宜。督租稅以奉其上。保正則歲一人。及除而代。苗稅長則歲各二人。或一人。其都之甚大者。什之率。義田以供役之費。建義莊以儲田之入。田有砧基莊有規約。選屬都之賢者能者曰措置。以提其綱。曰機察。以糾其弊。稽凡費之入于邑者。幾何而使吏不得縱。給凡田之係于版帳者。幾何而使官不得逞。貴戚之家。毋以聲勢免。佛老之役。毋以香火辭。產業所隸。毋得以室廬而占。諉經始於端平。丙申之四月。竣事於嘉熙。丁酉之仲夏。合縣之都。凡五十田。以畝計。凡四萬九千五百九十有奇。地以畝計。凡九百二十有奇。歲入米麥。以石計。凡二萬四千九百九十有奇。又羸田八百餘畝。歲入米六百餘石。積之慧日寺。屬之寓公。以補歉歲之不足。而猶以爲未也。斟酌歇役之久。近權衡物力之低昂。斷自丁酉年。次第其役之先後。十載上于臺。若府又轉而聞于朝。勅書尋下。以君修復經界義役。

職事修舉特贈秩示旌異仍下臺府及縣永遠  
遵守且申嚴黠吏奸民破壞之禁於是君成規  
可以永保而惠斯邑者固漸被於無窮矣君旣  
繇縣最進轄帑事以書訪余漫塘上曰願有述  
余自杜門經紀一二義役於先墓所多歷年而  
始潰乎成閱君所示二編蓋事集於春月之間  
利周於百里之廣然後知余智之不逮也又張  
公與余同年繼張公者煥章閣待制王公遂與  
令同里皆重所許可而第屬令以君稱首余故  
喜爲之書抑余聞之經界之與義役可以相因  
而行亦易以相因而廢異時經界不正而驟正  
之君固懼其難經界之正未幾而義役之事繼  
舉有不爲一爲而二利以興王君殆知所先後  
者歟其自于今思義役之成之難而敗之易蓋  
亦反其本矣否則吏奸或售牒訴紛如經界壞  
而義役隨之是田在官者不可復而役之病民  
者且如故吾爲此懼於十年乎何居雖然其或  
繼王君者百世可知也君名燭字伯晦登庚辰

進士第今官承議郎提轄行在左藏東西庫云  
嘉熙二年正月旣望朝散郎直顯謨閣主管成  
都府玉局觀劉宰記

常熟縣端平經界記

淞右多大縣常熟田賦殆與他小郡等紹興經  
界迨今未百年田額僅存籍之在官者漫不可  
攷胥吏飫口腹養妻子其間朝竄暮易蠹弊百  
出田而不賦者有之賦而無田者有之重以濱  
江水嚙與夫抵罪而沒于官司者日侵月廣故  
昔之田以畝計者二百三十一萬爲苗七萬二  
百石爲稅若折買錢九萬四千緡今督于官者  
僅三之二而又多取之白納取之斛面取之點  
合利擅豪貴細戶禁抑莫訴下困上迫令率以  
不善去來者睨不敢前端平初元秋八月王君  
燭實領是邑問民疾苦皆愀然蹙額以賦役不  
均告會府檄修復經界王君深念之曰籍壞滋  
久新之實宜矧上有命何敢不力顧余始至民  
志未孚懼弗從也弗從而強之則舛矣乃搜剔

宿蠹蠲弛苛斂孜孜凭按日與父老相唯阿于  
庭居數月信浹意親民相與語令字我非厲我  
者王君聞之喜曰可以就茲役矣於是攷舊額  
選衆役按紹興成法參以朱文公漳州所著條  
目隨土俗損益之浸式以徇禮鄉都之受役者  
詳爲開說俾之通曉無疑然後出令爲期衆皆  
歡然率田若地標氏名畝步于膝間驗其實者  
因而書之否則量而會之準紹興成數一無求  
贏者闢地爲田以田爲地者書實業昔之逋賦

匿契與詭挾之弊釋勿問而申禁其不悛者常  
平田安邊田學田圭田與沒官之田別爲籍文  
書之費悉從官給士民之赴期會以僕隸者聽  
鄉井間吏一跡不到也由是官民一家小大競  
勸如順子弟之與父兄不待督而從縣五十都  
都千保其履畝而書也保次其號爲覈田簿號  
模其形爲魚鱗圖而又秤官民產業于保爲類  
姓簿類都保鄉于縣爲物力簿經始於端平二  
年之夏訖事於是年之冬圖籍既定則又均其

折色之偏重者。蠲其征繇之加斂者。裁定其田。與賦高下之不稱者。通一縣之田。計二百四十萬畝。有奇。除二十萬爲官田。賦入隸諸司。餘民田得苗六萬六千二百石。有奇。稅折錢九萬三千三百緡。有奇。載諸戶版。坦然明白。民以實產受常賦。爲砧基簿。印于縣。而藏之家。有出入。則執詣有司。書之。強無幸免。弱無重困。雖惇嫠。幼孤。皆知其自有之業。與當輸之賦。污吏猾胥。不得加尺寸。升合以擾之。其視前之紛錯。厖亂。若改邑而粲殊之也。於是常熟始以佳地。稱於浙右。他大郡莫儷焉。向之睨不敢前者。將競趨之。惟恐後矣。王君以書來求誌。曰。爚不韞。冒領巖邑。而又舉此重繁之務。幸邑人不我貳。相與出力。以躋于成。授代有期。皆邑人之賜也。扶植之俾。勿壞爲邑人。他日賜於無窮者。不賴後之人。猶之水也。澄而清之。雖難撓而濁之。易耳。吾懼其弗求于清。將復爲民病也。願子與我誌之。以告來者。余曩嘗督斯役于烏傷矣。畝量步會。閱



三歲而後成。旁視他邑，猶有窘步。其後者，今君成百年之曠于數月之間，上下帖然相安。若未嘗有所興作者，余固不足以語其能也。鄭子產非能者耶？其始執政也，民怨其伍我田疇，謗讟竝興。遲以三年而復頌歌之。君乃致速，若是方且切切焉。引慮却顧，爲經久之圖，以利斯邑。然則君其可謂能而仁矣。余何敢不爲邑人志之。繼自今，令之來斯邑也，按斯籍也，按斯圖也，毋玩其成而易之也。毋恥于隨而焚之也。毋付之

吏手而蠹毀決壞之也。則官無虧賦，民無橫輸。上佚下熙，俾常熟永爲淞右佳地。而焜耀言游，舊里于千載之下，顧不休哉。君少登儒科，有志當世。施于邑政，寬猛有則，不震不悚。載籍頓清，迺創義役以息訟，修廟學以明教。一邑之內，百廢具興。耳目煥新，蓋疾病旣去，精神必復。衣冠儼然可整也。然吾聞賦役之不均者，十邑而九。今有意于民，求君之所以易于成者，倣行之則。是役不患其難，百姓庶乎有瘳矣。然則予之誌

也豈徒爲常熟邑人而已哉嘉熙二年秋八月  
朝奉郎右文殿修撰新知寧國府杜範記

宣風樓記

樓以宣風名紀政也易以巽其象爲風其位爲  
東南其時爲長養萬物有虞氏得之以阜民財  
于是有薰兮之歌尹吉甫得之以美大臣于是  
有穆如之誦罪無輕重功無大小使言偃弦歌  
之化當太平有道之國雍雍乎和可知矣常熟  
古南沙也今爲姑蘇望邑土博賦衍民繁事劇

縮銅章者每難其人紹興之二十年政五六易  
規矩準繩莫一所守冬十有二月乙卯今曾大  
夫以王命來智足以知勇足以行御史如西門  
之治鄴愛民如子產之治鄭指顧之間政以善  
聞邑人宜之凡廢未舉祈一新焉先是直縣治  
之坤隅民居有架崇庀于上其左蓋闕如也相  
其陰陽厥有低昂非有對治之勢爲未寧士庶  
雅有劓樓議矣至是以請大夫曰止止吾至未  
幾遑急爾耶衆曰我食我力我木我石無費于

公以慰我私大夫奚以辭爲乃命卜筮乃經乃理乃徹其庫乃圻其址巧者環斧壯者攢杵無煩戒約其來不可禦也蓋度材於二十一年之夏四月至五月已巳工以畢告近遠少長奔走瞻望惟時歎暑泠泠之風自橋而下咸用忻快迺有皤皤然被黃髮者歌而過曰風之仁兮物之春兮風之德兮物之殖兮誰其布宣大夫賢兮繫大夫賢樂堯天兮衆鼓舞和之因撫其辭以名斯樓且告鄉人王伯廣請文于石以係他

日甘棠之思者大夫名構字叔重清源人大丞相宣靖魯國公曾孫其爲政益有家法云

大唐蘇州新開常熟塘碑銘并序

吳之藪曰具區郡之大惟蘇州商爲貨居農實邦本錫貢多品厥田上中土宜在民地利乎水常熟塘按圖經云南北之路自城而遙百有餘里旁引湖水下通江湖支達脉分近委遐輸左右惟強家大族疇接壤制動涉千頃年登萬箱豈伊泂泝之功實由灌溉之利故縣取常熟歲

無肯焉洎貞元以來時屬大旱繇是填淤荐爲塗泥而論胥怨咨殖物痛矣郡守隴西李素居中字人原始覩弊則曰在穿導之遂聞於本道廉使吏部尚書韓公公秉文惟謹施德惠人發令爲適觀風悅隨人無間言言我得從政攝令吳縣主簿李仲芳稟其成規請事䟽鑿於是參井邑之役則經費其力而長洲當三之一焉縣宰李暎復善供命乃計功量日侯隙庀徒爲利涉之宜蔽反壤之害詢蓄洩之勢增遠近之防

人不告勞事爲永逸先期而望表繩直末日而終朝子來塘開地中工畢泉出山澤作氣江湖發源積爲長流實自新淞舟楫鱗集農商景從春秋有施水旱斯備嗟乎塘之堙鬱也久矣何壅之無慮而啓之有時非體仁弘多應用高朗曷以越前所未暇逮今而行其志哉則史之決渠書之滌源以流其惡潤彼稻田況山川襟帶之廣林鹽沃饒之資規同九州殷列七縣其提封底績固良二千石之能惟李敏敏於直方精

在損益爲信安未半歲而吳郡餘一年焉政猶  
風行惠與時至文學備令清慎寡欲通貨豐財  
五行因之順下致理之實不其偉歟去歲朱方  
構患而郡邑連陷公毆白徒以捍狂寇挺拔凶  
黨修復城池皇帝聞而嘉之俾金章與紫綬給  
誥垂美必將大闡王度紹休朝廷豈惟與民分  
憂是塘之爲政也彼人士以允文在公之宇備  
詳其事請刻于石庶祠之可復銘曰 瞻彼塘  
矣昔之所闢物利乘舟王膏其澤歲有湮塞時

罔疏滌誰爲澄流變爲廣瀉降是良牧倚歟隴  
西揆日爰鑿經旬洞開湖水南迤江源北來旁  
分溝洫潛畜風雷政可施利役無勞止力均二  
邑功逾百里舟楫攸往田疇所視義實通方智  
侔經始濬自高岸豈云隨山人歡在路魚樂于  
泉伊此化遠矧夫事宣立石川上維無窮焉元  
和四年二月十八日將仕郎前左威衛錄事叅  
軍劉允大撰

常熟重開支川記

天地間物之利于人者水爲大濬畎距川治遂  
達澮等級繩繩聖人爲利民計其詳如此後代  
因之河渠有書溝洫有志咸以利舟楫沃膏腴  
有不可一日廢者浙居東南隘水踰于地引以  
爲田厥土衍沃姑蘇產甲兩淞枝邑嘗熟復甲  
姑蘇卽名可知已有湖昆承江浦發源也分爲  
支川橫貫于中挾以東鶩周涇團塘白茆浦李  
王涇咸匯焉南渡前居甯占冒脈絡弗宣乾弗  
克豬溢弗克洩爲眈眈大棘百數十年間鄉耆

豪右咸思開治竟誅異議淳祐癸卯陶唐侯升  
班過里憫然嘆曰是川與諸涇交會爲湖海喉  
衿田里命脉湮闕硤絕乃爾詎可因循顧忌憚  
於疏鑿俾穡夫束手無計乎爰咨于衆髦倪貴  
賤聞言曲踴謂非侯不可於是揆延袤眡窳隆  
準事物經始于甲辰中春之七日弗抑弗彊羣  
農至因地順勢塹高隄下一指顧頃荷鋪雲  
如鼓袂風動侯表衆勞來飲饁腆嘉咸勇于力  
甫一月竣事長四千尋廣一丈深倍廣之數凡

用工六千糜泉粟若干侯以爲已任而營綜之  
曩据川之址靳弗退聽者侯一不校割已產迂  
道代之繇是醜引泉流灌輸千頃堰岸雄固遠  
邇混融遂爲海邦永利自非侯材幹公敏襟  
宇恢拓疇克有成矧此川西北有鳳凰涇者侯  
之高祖名節朝請府君故廬也二子曰擴曰振  
聯危科躋膺仕蟬媯弗絕淳熙間其孫天台史  
君之嫌以祖母言宜人丘壠在焉念河道壅淤  
銳于疏導不果逮公凡三世始克成其志先是

學竺乾氏者將浚長涇有老者力止曰時法未  
可三十年後自有地位中人來辦君子謂茲舉  
嗣先志侈後基孚衆願三者備矣是役也樂於  
欣助者三蘭若明因褒親永福是皆可書曰詔  
于後庶千載間弗至陵塞侯名案字任道府君  
五代孫也今爲通直郎舒城邑大夫淳祐己酉  
孟春滄洲程公許記

常熟新建順民倉記

治平二年河內向侯作新倉成嘗語予其始終

曰吾至之初見太守潁川陳侯席未煖陳侯曰  
常熟大縣也攷其民版之數至四萬戶歲輸之  
粟至八萬石有倉汙庫迫窄纔容四分之一濱  
江之民遠者百里水浮陸走捆載而至倉或既  
盈則累數夕□□而不能輸輸于州又病其遠  
此一不便職是歲常散蓄于浮屠之居廊廡皆  
滿蓋藏弗謹塗墍弗完得無有以誨盜哉此二  
不便蓋遲君之來也久矣君其圖之吾退而自  
惟倉廩蓋今天下郡縣之先務京師兵儲祿廩

之出入一皆仰給于東南蘇又爲東南之劇歲  
入之粟佗郡莫加厚焉吾邑雖不腆其敢後其  
所先務耶矧其弊又如此宜陳侯有以告吾也  
及吾視事之日見吏民間其故尤爲不便者凡  
幾然而獻計者又不出陳侯之議也於是訪縣  
之北得隙地數十畝以營築焉始召民而諭其  
所以作之之意民旣病此而已久莫不奔走以  
聽命咸願治材于家請期日合而成之旣而至  
期倉遂以成予謂二侯皆能以材名于世所至



莫不著見風迹至興利去害便民皆其所素蓄沛然而有餘夫以沛然有餘之材相與叶謀治其因民願欲之役故其成也宜不勞而功多其榜曰順民蓋得之矣若夫世之從政者利害較然居前畏謗忌讒認認然不肯一日出其力則又諉曰愛民斯不遠哉夫愛民莫如古人古之人有爲豈天作地生斯亦出于民而已耳估視利害如之何豈顧可爲而不爲迺曰愛民哉此大不然昔者子產嘗以乘輿濟人溱洧孟子謂

之惠而不知爲政凡以此也而侯亦以予言爲然因刻之于石俾來者有攷云時熙寧元年三月十一日將仕郎前守沂州臨沂令郎淑記

顧逕左軍記

姑蘇之東枕江而戍者曰許浦許浦之東百有餘里港與浦應而險阨逾之者曰顧逕寶慶元年十一月陞顧逕爲許浦左軍從都統吳公英之請也國家駐驛吳會與六朝都壤不同其備禦亦異隨勢緩急非豪傑稔于世故者不足以

知之議者沮曰守江主于許浦則無復遺策也  
不知藩墻門屏迭護堂與愈切愈密故由秣陵  
而視則淮爲急而大江次之由錢塘而觀則江  
爲急而長淮次之矧江會于海而海道所通者  
其經涉最廣今日之事備江所以備海也詎宜  
略哉公之言曰顧逕與黃魚塚相望轉料角越  
沙窖迤邐抵山東海界此實咽喉之地今但差  
兵探望動息而已卒有警急何以制之遂上建  
屯之策請條陳利害指述便宜皆灼然實意夫

許浦置樓船之師自節使馮公湛移部定海距  
今七十年矣而顧逕止爲斥候之地聚尖底艍  
畱甲士五百則淳熙間陳緒擒王駱所肇建也  
其後增五百人以正將涖之又增千人以統領  
轄之雖續有建明然率半歲而更倏去忽來僑  
處而戍散居露止卒非服習器非便利雖得地  
形而人無固志甚失漢人兵體三章之要公請  
始募諳海道之人視舊戍倍增其數使二千人  
爲正五百人爲奇正者皆閩浙猛毅舟用巨艦

蔽日屯雲屹若喬嶽縱有衝突蟠踞不動奇者  
皆東廣驍銳舟用多槳厲波遡濤疾若飄風平  
視渺茫出沒疑神又翼之以引強蹶張之技濟  
之以火攻水戰之具朝訓夕練嚴若對壘而器  
與人既精矣創新寨二千屋裨校有解毬射有  
塲易更戍以就屯人得安處損道頓之勞忘室  
家之念而人與地始相得焉是宜朝旨賜俞璽  
寶加獎而卒底厥績也初公爲蘄黃之役帥舟  
師西邁虜聞風霄遁餘黨勦平統制張禧亦與

有勞至是舉裕爲左軍統制委以經理未幾擢  
改中軍士志悅附戎政修整兩屯相望精卒逾  
萬熊踞虎視雄于江滸焉余嘗竊觀國史謂長  
江之險雖敵我共之而一善用其險者勢固在  
我而不在敵也方逆兇渝盟襲劉豫故計大治  
戰艘欲睥睨海澗高廟赫然震怒召李寶授以  
北討之略由許浦進發卒奏膠西之捷然則備  
禦之與進取固非二途也今許浦旣宿重兵而  
得顧逕爲之掎角以公之忠亮沉鷲奮其勇略

直搗犬羊之穴迅掃鯨鯢之根奇勲偉績將有  
出于竹帛所不能載者昔郗超知謝元於履屐  
之材各得其任因料淮淝之功必成余頃簿領  
定海公適主定海軍見其度策揆謀動中機要  
余固心服之矣令將吏以置軍本末來諭予方  
期公異日而欲自附於知言者故樂爲之書紹  
定三年七月旣望奉議郎新通判信州兼管內  
勸農營田事戴栩記

重修琴川志卷十二

終

重修琴川志卷十三

○道

虞山招真治碑

梁昭明太子製



夫東瀛淥水三變成田西嶽靈桃千年未子尚以星起牽牛部首迢遞律生甲子氣數杳冥況復上遊玉清損之又損高排金闕玄之又玄豈言象之能詮非時節之所辯海虞縣者則虞農都尉太康置其宰境有虞山越絕書云巫咸之所出也高崑鬱起帶青雲而作峰瀑水懸流雜



天河而俱會吳門採藥之地楚望槐椒之歌湯  
反流沙之魂錦飾汾陰之鼎無以踰焉其峰則  
有石城石門虛峴自然不度句吳之馬神功挺  
起豈似岡陵之畫魏后冰城夜陣權息長安慈  
石浴鐵暫流較跡比期優劣斯遠道士沛郡張  
君諱道裕字弘真卽漢朝天師陵十二代孫天  
監二年來至此岫棲遁十有餘載夜忽夢見聖  
祖云峰下之地面勢閑寂宜立館宇可以卜居  
裕師潘琪隱始寧四明山無何有人耳長髮短

云從虞山招真治來言訖忽然不見潘馳信報  
君君因辭山舊居而以夢中所指峰下之地卽  
以爲治故號招真高臺迥立有類玉臺之山長  
廊宛轉還如步廊之岫柱削芳桂豈俟開陽木  
飛材選海檀無勞豫章神拔黃庭司命之府有  
類玲瓏朱陵赤后之觀同符弘敞遠望仲雍則  
高墳蕭瑟旁臨齊女則哀壠蒼茫鱗尋千仞之  
木氣叶星晷華飛五香之草形圖宮室帷葉綬  
花卷舒蹊逕陽桃侯棗榮落崑崖樹息金烏簷

依銀鳥鳳將九子應吹能歌鶴生七歲逐節成  
舞旭日晨臨同迎若華之色夕陽斜影俱承拂  
鏡之暉玉礎微潤應山雲於高牖天籟徐響引  
和風於空谷方當專氣致柔入無爲之境周行  
不殆窮混成之致茅子算歸輟轡無已魏姬宴  
罷畱駕不還何止持節變淮南之金傅符蔣北  
鍾之稻明月蛟龍之騎驅之使鬪四銖七子之  
鏡引以成刀散季齊之羽起雄鳴之霧而已哉  
乃爲銘曰

玉龜二始金書八會道浹地心功浮天外故常  
可小惟真能大德起同塵善生塞兌物寶自然  
人符交泰掩映綠蘿穹崇紫蓋仙治之美此焉  
爲最雄柱十步陽臺百丈水均下屬山逾高掌  
野寂雲興琴繁山響斗虹夕西豐雷朝上元陽  
作石竹龍成杖書藏玉匣藥蘊銀銅燒鉛雜鯉  
折桂和葱羽衣可服雲駢易通斧柯雖朽碑石  
無窮

乾元宮新建紫微殿記

粵夫璿霄肇覆神明於是位焉生齒賦形禍福  
由茲職矣雖無方而可驗豁爾杳冥暨有感以  
咸伸幾乎影響所以吉凶可見陰隲下民俾列  
像以惟嚴庶舒衷而有自必也敞之珍館儼彼  
粹儀貴覩相以善萌必應期而福介者也嘗熟  
縣乾元宮者卽梁天監二年之所建也誌石詳  
焉星籥遷縣基址髣髴頽墉腐桷鼠鏤蠹耕春  
草秋蓬蟲營蛇據唯三清前殿巋然僅存丁遼  
東之始歸尚嗟如故秦武陵之再訪堪嘆無規

宮之執事者目茲圯壞若灸于心歎檀信之門  
莫有不移之諾顧寂寥之跡彌堅如在之恭徒  
懷必葺之勤豈逮布新之力有日卽今縣尹田  
外郎胡公晏因得鳴弦之暇來訪祈靈之場憩  
繁樾以釋煩陟層臺而瞰迥叢峰笋拔碧藏日  
暮之雲暗溜枝分雅雜風中之弄俯視熬波之  
海旁窺曳練之門清音一來俗態俱去而乃環  
顧隳址爰發善因謂其道衆曰前之尊殿雖繪  
塑靡完而瞻仰不怠宮之所闕者惟北極殿焉



今則欲議隆興須求幹集乃召監宮崇虛大師  
李維簡令以常住田園歲之入者摧其所羨聚  
而營之所以以上贊瑤圖下福珉隸者也於是材  
積梗柟匠求鄢郢界址砥直面勢箕張暨涓吉  
以上梁忽中程而授夢絳衣峩弁依稀對仙介  
之容辨色遲明煒燁獲靈芝之瑞雖成邃宇尚  
闕靈儀忽本邑南沙有編戶張及者夙植善緣  
早承儒訓謂月規之寶相既久藏家仰雲屋之  
重桴猶虛正座願心彌確喜捨不回然勝事之

欲彰仰冥契之所會是以具威儀而交錯抵鄉  
墅以前迎屬以盾日燁威箕風瘁物芳疇雨絕  
徒勞御史之巡軒積派塵生更擁宓神之渡鞮  
衆心猶豫以方切一夕滂沱而不期玉女電鮮  
方對東皇之笑阿香雷響豈必南山之聲翌日  
涸澤皆涵方舟倏濟暨迎奉既旋于震邑而宵  
晨連霈於畢霖年瑞有期食天無爽得不謂羣  
誠仰屬而冥貺昭格者也故使邑人目一勝事  
遞口成響家率戶辨猶恐居後及縣尹司田首

塑本命星官一尊逮殿主潘惟信勸化衆戶各  
塑星神侍從一尊以實其殿也衣冠濟濟金碧  
煌煌真從翼分宛同於星拱檀龕寶錯若狀于  
帝車復有本邑歸政鄉陸杲捨錢五萬爲砌階  
之資刻玉鏤瓊鄙陶侃之運甕峻基宏址得給  
孤之布金且觀夫使人爲善司田之始謀也潔  
已集事殿主之化緣也今也民易化緣易成政  
在其中矣豈不由善教所被而道心自然耶忽  
日殿主自常熟來蕪城訪予閒居語其建殿之  
始末懇以鄙文見須旣不獲遜乃直書其事以  
誌歲時爾皇宋天聖四年五月二十一日朝奉  
郎檢校尚書考功員外郎充潁州團練副使上  
柱國馬莊記

乾元宮興造記

姑蘇之北有大邑焉曰常熟山長而水遠泉甘  
而土肥民富物庶人樂其業予嘗縱遊觀覽勝  
地遂登虞山之巔臨尚湖之濱得乾岡之勢重  
山複嶺松竹交映隆然祠宇金碧相照躊躇四

顧恍若洞府適有人焉黃冠而羽衣紅顏而鶴  
髮杖藜倚梧謂予曰昔漢之天師張君道陵之  
孫凡十有二代曰道裕修真之地也鍊丹于此  
積功飛昇靈跡宛然至梁天監中始建是宮遂  
號乾元歲月綿遠棟宇欹側榛蕪湮沒荒廢寢  
久吾嘉禾人也生七歲出家學道于崇福宮年  
十二試經業預選爲道士後三年習醫術將以  
救人之疾苦二十有五乃遊名山尋勝境慶曆  
中過姑蘇至邑下慨然有卜居之志至和之初

都官員外郎桑君澥出宰是邑因命住持然宮  
之廊廡皆圯獨三清殿僅存梁棟顛危不可支  
持吾方以醫術濟衆人皆以金帛施之裒然醮  
設之羨餘田園之所積增修大殿及遊巡二十  
有四間軒廡十有六楹嘉祐郡人試將作監主  
簿曹君仲言施錢二百萬塑三清聖像及真人  
十有五軀吾復建北極殿于北列道院于東治  
平元年起三門及東西廡各五間二年造三門  
之東軒凡三間三年造三門之西軒凡三間次

第創立艱難僅成豈一日之力哉自是宮宇復全壯麗輪奐邑人得以歲時祈福焉吾嘗于熙寧間建崇道宮於秀州修太和宮于蘇州興造常熟僧尼寺三所大橋四所立夫差廟于縣之西立句踐廟于縣之北至於一邑之橋梁街道以便人之往來者莫不興修焉時或施予以濟貧民蓋不可盡記吾今老矣得以優游山林以盡其天年何其幸耶予壯其言乃知興造之本末因問其姓氏曰姓李氏名則正蒙恩賜紫衣

今年八十三歲矣是宮也李君之功爲多自非有志于道經營剏制不憚其勞安能若是哉因以書之告諸後人崇寧五年歲次丙戌正月望日吳郡沈垌記

### 乾元宮半山亭記

公豫嘗聞怪力亂神先聖所不語然天下之事涉於幽怪恍惚之間若不可信苟利於人者又惡得不信而錄之歲在壬戌公豫假守當塗秋八月閱訟牒次有吉明起不書一字若今所謂

投白紙就而詰之乃琴川北門劉莊備奔走之  
隸附口以書其大略今年四月七日因賭博輸  
敗羞見妻子遂往虞山乾元宮後自經于叢木  
繩斷墜地昏迷之際若覩神人衣朱衣美鬚髯  
叱云宮路衡縣治將不利于寓公汝可往太平  
州白郡守趙大卿于山路中間築基剏亭仍書  
官銜以鎮之明起旣甦甚惑焉且素不識大卿  
顏面其何敢前至七月因家人染疾復覩神人  
責問曰汝何爲不行明起遽應曰諾妻子親戚

皆不知之密訪道里遠近稱貸裹糧遂至庭下  
可否唯命公豫竊謂神者人之依也安敢少有  
侵心且常熟士夫林藪俱不以告而不遠千里  
獨以見囑者是豈無意歟詳觀吉生一愚夫爾  
似非有覬覦乃厚遣而歸仍諭幹者度材鳩工  
涓日建造深惟山路填壘基址費力適諸姪在  
家爲董其事吉生已絕跡不至閱三月計所費  
約千緡公豫次年冬丐祠得歸甲子之春嘗一  
登陟規撫適中左右顧瞻心目開豁攜杖山間

者亦得以少憩意其必可悠久已囑宮中時加  
檢括損卽隨葺知宮王冲一又植松萬餘株前  
後掩映共爲不朽然向之所見朱衣而多髯者  
竟不知其爲何神也姑爲書其本末云開禧元  
年歲次乙丑四月吉日中大夫充集英殿修撰  
提舉建寧府武夷山冲佑觀祥符縣開國男食  
邑三百戶賜紫金魚袋趙公豫記

招真庵記

自姑蘇出齊門泐西北望山形如巨鰲橫亘原  
野蓋常熟縣之海虞山也山之東瞰萬戶治劇  
邑邑去江不及程陂湖畎澮之積自南至者傾  
馳會于江江河旣應則迅瀾倒流逆于市橋之  
下二水相制移時而不能去山無奇谷惟荒墟  
白草醜石散亂坡陀迤邐而西有修林橫抹隱  
見于兩峰之間其中爲招真庵元祐中道人姓  
申氏泰陵徐處士高弟也基營于此嘗語人曰  
吾求爲後人計庵成亟去不知所終松竹森茂  
庭宇簡寂如隱君子之居通州道士喻抱元增

治之而介特有守勵其徒嚴闡其業供施不求  
而至庵去平地無五百弓而步虛鍾磬之音時  
從雲霄間來凡聞之者知其爲練形學仙之徒  
且旦勤而算勉也舊名竹林抱元更以招真其  
有意乎抱元請記于僕乃歌招真之辭以系之  
庶幾異時屢滿戶外僕亦有緣其間也其辭曰  
白鶴巢兮丹井空蓬山杳兮煙靄濛濛陵谷變兮  
今古木葉下兮秋風飛仙去兮朝太微黃冠野  
服兮以遨以嬉餐霞卧月兮世不我違與世滌

殃兮天門可馳蒼龍嗥兮雲幔扉石泉冽兮山  
芋肥俯仰宇宙兮日月蔽虧靈秀回薄兮野芳  
呈姿山中之樂兮萬化莫移仙人不來兮隱者  
曷歸紹興丁卯歲仲春前二日中嶽康舉之記

釋

寶嚴院新建佛殿記

近代儒家流以韓退之擠釋老賢與不賢皆欲  
隨而去之未熟思之甚矣夫受天命者莫大于  
君中國其間哲后辟玉治亂興亾之運接迹而

不可勝數至于治而興者則諸儒必曰非人事也天之曆數輔治世而興者也亂而亾者則諸儒亦曰非人事也天之曆數厭亂德而亾者也夫如是則治亂興亾之運莫不推之於天韓退之有唐之鉅儒也以堯舜禹湯文武周孔之道不行於當世而釋氏之教獨盛于中國故力排而擠之若原道篇佛骨表皆著辭深切痛疾時君奉之太過者也其所以然者誠欲抑之揅其寢盛未始不爲釋氏福殆弗納而黜之彼得益其惑遂有會昌之旤豈非道隆則汙物盛則衰之效歟天意若曰蠹中國害生民則使大中履會昌之迹如韓文公之比者佐而輔之固當拔本塞源矣豈會昌廢之未數年而大中復之易如走丸疾如反掌得非天之未厭其教哉噫大道喪而有仁義仁義喪而尚權詐故堯舜禹湯文武周孔之道塞于時雜于霸金仙氏之說其有不興乎由是源於漢流於魏波於晉宋齊梁間與吾儒老子之教鼎峙于中國若夫本空寂



破迷妄以出生入死之說爲興善滅惡之鑿虫  
虫之氓從而遠罪則如來真意深于救世者也  
而時君奉之或多立寺宇以徼福或廣度僧尼  
以崇教上焉者佞之下焉者化之如之何不爲  
後世弊哉蓋崇之者失于其道耳文中子曰齋  
戒修而梁國亾非釋迦之罪此誠得之我國家  
四聖御寓燭知化源寺觀泐舊而存率禁其狃  
置僧道限年而入必試以行能故天下名山勝  
槩或有所旌異者非道存乎人孰能與於此哉

姑蘇北走有邑曰常熟邑之西偏有佛宇曰寶  
嚴殿卽梁天監中所建也倚山面湖繡若屏障  
嘗有希辯禪師者心悟大乘是焉棲處錢氏霸  
國時以名聞召歸餘杭普門寺目爲慧智禪師  
及錢氏獻土隨召請見賜紫方袍號曰慧明大  
師繼時厭居京國歸隱舊刹錢氏以師人境俱  
勝復施金五百兩建七級浮圖一所淳化中太  
宗皇帝召賜急就章道遙詠祕藏詮太平聖惠  
方凡一百四十三卷獎高風旌善地也院舊名

延福天喜中邑尹胡公順之飛章上請帝可其  
奏改賜今額焉院有佛殿者積其歲月了無尺  
椽明道中武陵龔顯始發信心崇修妙果次有  
東京禪慧院僧清鑒浮杯至止苦行自修謀茲  
勝緣有若符合復有邑人諸葛頤李仁壽樊福  
僉悅所聞贊成其事且曰仁祠之興爲我福地  
今紺宇不立粹容無覩則吾儕何所起信哉由  
是捐厚施買良材庀徒僱工審曲面勢卽其舊  
址隆以新創經始于景祐之丙子落成于慶曆

之乙酉凡數年而能事畢矣觀其壯而不華嚴  
而不陋巍乎中者其宇一所以納高廣之座而  
宅乎毫相也翼乎旁者其舍二所以容儀衛之  
位而列乎寶供也遠而望之若太微之凝帝宇  
聳在雲端迫而察之猶列漢之立仙宮來從方  
外其爲功德殊勝可思議哉武陵公帑無多藏  
屋無餘潤獨以興弊補廢皇皇於佛事人所難  
能矣若夫辯師興之前鑒公繼之後事有冥契  
豈誣也哉絳里人也因熟于茲山之遊目擊諸

公之善以文見託得以直書時聖宋慶曆六年  
歲在闍茂王正月一日將仕郎守真州楊子縣  
令陸絳記

勝法禪寺新十方記

天以一氣生萬物故散而爲四時儒以二道成  
萬民故散而爲五教釋氏以一法通萬行故散  
而爲禪律要其歸去邪以從正避惡而趨善此  
其大約也若夫道根乎心理源乎性則在此不  
在彼吾知其禪耶律耶是亦名焉而已矣勝法

寺唐元和中閩將軍捐已宅而爲之處邑境之  
隅直闔闐之北山岡環然林木秀出凡居人信  
施之歸目之福地先是其徒星居謂之律寺至  
和初有寺僧以稔惡刃人於其間敗焉致之于  
理邑宰中都桑公病其他習以爲常始議十方  
之名請更于郡郡守大卿呂公然其爲卽符于  
邑從民欲也會今長老深公脫屣潤之甘露棲  
止于蘇二公協心命以交疏一之日重門洞然  
二之日羣居巋然法堂中嚴繚垣外固雲集方

來之侶日熏香積之供里人聚而瞻之曰昔狡  
穴而今道場昔濁流而今淨土茲可尚矣異日  
燈燈相繼源源不絕則以深公爲之首也非夫  
道韻之優業履之峻上以贊廟社延鴻之慶次  
以資郡邑順成之福均是法雨露吾義鄉則後  
之視今亦猶今之視昔云爾時嘉祐三年九月  
十九日承奉郎守尚書屯田員外郎知開封府  
雍丘縣同簽署兵馬司公事騎都尉借緋陸綰  
記

東靈寺天台教院莊田記

壽聖東靈寺天台教院者肇修於熙寧六年涉  
二紀而告備焉基自講師光瑞而成於今闍黎  
梵崇佛舍中嚴講室後邃齋宿之房庖溷之宇  
布列兩序代有名人四遠學徒聞風而至者無  
慮百數歲比不登邑民艱食崇師患無以瞻學  
徒則與推施利之應已有者悉歸之衆猶不能  
給也然而人皆知崇師之能導矣於是僧道賢  
率諸檀信等買田二百一十畝求爲常住供崇

師感檀越之厚施也則欲鑱石刻其名銜而屬予爲之記予謂吾儒言人情者聖王之田而以修禮陳義講學本仁爲得耕耰播殖之諭至於佛說福田亦不過種諸善根而已合而言之其理一也夫方寸之地人皆有之果能竭精進之力以致穠蓂芟欲惡之萌以絕萑葦則信善之生焉可已也充信善之心無施而不可則所以爲利益者廣矣且衆生以愛故入生死由於愛境有逆有順而生喜怒造種種業則所謂情田福田者於此荒蕪矣長轉六趣至千萬劫本所從來惟有一愛更無餘病佛大醫王對病爲藥唯有一捨更無餘藥常以此藥而治此病如水救火應手當滅故當世導師必破人愛欲之萌而起人喜捨之意使之皆知情田福田之說而內自得焉則彼區區在外者何足靳耶況夫檀則能施而越則能度生死是諸檀越充信善之心以捨施則將絕愛境而脫生死矣予故言情田福田之利益而歸之於導師之救病也大觀

二年九月旦日吳郡陸徽之撰

勝法寺轉輪藏記

佛法自漢入中國卽與其言皆來然未嘗若是  
侈也至晉宋周隋之間鳩摩羅什之徒出更相  
傳譯轉相付授于是其書之至者日以廣源流  
既遠往往失其本梁武帝時始有言心法者一  
切以洞然無我爲宗不立文字佛氏之學遂判  
爲禪律兩歧其後更數百年學心法者雖益盛  
然其書未嘗卒廢自隋開皇至唐開元正元以

來凡列于目者曰大乘小乘曰律曰論部分甲  
乙鱗次櫛比雖假託疑似謬妄之辭苟不叛其  
說亦莫不具在其傳至于今不絕昔吾儒者之  
言僅出於中國其道在天下昭然若揭日月而  
一遭秦火雖六經不得爲全書殘編斷簡得於  
屋壁丘墟之餘與一時遺老所誦習雖幸而獲  
存然顛倒錯謬固已不勝其弊其他諸子百家  
各以其藝自名於時者近數十年遠或百年皆  
已堙滅無聞而佛氏去中國數萬里其言率一

譯再譯而後見乃全而有之愈久而益著何也  
豈其言皆足以示後行遠使人欲廢而不可與  
蓋爲之學者皆知信其所習而尊其所聞相與  
謹守嚴奉手傳口誦而不敢慢非有意於借資  
取便階梯所欲嘗探而忽忘之者然也常熟姑  
蘇別邑梅里鎮又在邑之東北海上有寺曰勝  
法故無藏經崇寧二年長老道綱始募衆緣爲  
之綱強力明果學心法者也居勝法二十年與  
始至之日無異工旣成見余雪上曰竝海之民  
不耕而漁其習以多殺爲事而不畏罪與之言  
吾理則惑教以其書則怠惟轉輪藏備極雕刻  
綵繪之觀以致其莊嚴之意可使凡徼福悔過  
者一皆效誠于此吹蠡伐鼓機發軸運象教駭  
於目而清聲接於耳不待發函展卷而其心固  
已有所嚮矣然邑民瘠而艱施歲且多潦有欲  
成吾事者而屈於力其力足以及之者而窘于  
歲蓋竭吾勤而後能成不有記其略無以慰此  
意也固請余文至再三不已夫物之盛衰存亾

固不可皆以力致然未有不存乎人者服儒衣冠者徧天下不能盡有其傳而佛氏獨能持久若此是必有當其責者因推其所以然書以遺之非特嘉綱之勤而已也時政和五年六月十日縉雲葉夢得記并書信安程俱題額

淨慧禪院看經寮記

昔法達禪師誦法華經及三千部而不悟佛知見智通禪師誦楞伽經約千餘遍而不會三身四智又江西志徹南海志道禪師自從出家以來皆覽涅槃經而不曉有常無常之義彼四禪者初未嘗有所開悟持誦既久一見六祖則于言下豁然意解如夢者覺如醉者醒如迷塗失道之人不知所向一旦得出邪徑而由正路大抵經意分明人自迷背況人人性中本有此經諸佛如來因以文字垂示後學雖非卽此以悟入亦非捨此而後有得然則寺院看經寮豈可無哉淨慧禪院在常熟練塘市距鄒氏所居百餘步其初施地創立院宇繼而抄大藏經建藏



殿藏院三門兩廡皆鄒氏先世之力逮愬伯仲造水陸功德堂以續其後紹興初慨然復以大殿頽敝爲慮且先世嘗欲新之未暇迺相與出力斥而大之成於五年七月余頃寓居練塘親覩茲事嘗作文誌其歲月矣然獨未有衆僧看經之所爲闕典憲念諸昆蚤世無與爲力者十年二月己未惻然興懷又獨力爲寮及兩序共二十餘間于藏殿之後明窗斐几煥然一新使其徒朝夕宴處于其間展讀諷誦曠然見性明心他日不下四禪者其爲利益一切豈淺淺哉比者又得信公禪伯來主是刹四方學者聞風奔湊席下凡數百人遂爲一大叢林邦人信嚮設伊蒲塞盛饌無虛日亦一時盛事豈不臧哉嘗聞唐宣宗問弘辯禪師有人持經念佛如何對曰如來種種開讀皆爲最上一乘如百川衆流莫不朝宗于海又問師旣會祖意還禮佛轉經否對曰沙門釋子禮佛轉經蓋是住持常法夫經者經也不可一日無于天下也審矣憲

作斯寮爲沙門釋子之利豈徒爲遮眼計未成之日以書見告旣成併以圖來示丐余文以傳久遠余嘉憲之用心教子姪皆入大學又推其餘以及其鄰僧余衰也久矣廢棄筆硯不復爲文今日披圖喜而爲書其本末以告來者是年九月十五日左朝請郎主管台州崇道觀夏之文記

吳塘接待院莊田記

姑蘇距常熟百五里介于中曰吳塘建炎間有顯師者造浮圖七級不克備而亾歲久且剝蝕乾道初有諸氏發大勇猛裂塵網以爲僧曰懷果因其舊址崇飾塔廟薙草萊以迄于成一椽一瓦皆手自剏慨然念曰吾徒之往來者無所共其困乏始議所以爲接待院以居焉慶元丁巳不幸以歿有嗣正妙以精進心而爲佛事視師有加焉今居像有廬說法有堂合徒有室鳴鍾有樓函經于藏崇啓對峙金碧絢爛寢寢大備矣雖然物之興也有時當果師之造始也無

粒粟以資其徒於是戴氏崇者割膏腴以胚胎之其子宣又以克大先人之志未幾而沈氏華氏復相與助成其美以濟其不逮然則是刹之興起也其機緣幸會豈偶然耶噫人之情夫豈相遠或者休于樹餓于道有饋一漿餉一簞隱然猶不敢沒其德況日莫途遠當風雨霜露百舍重趼之際其至如歸飲食牀第不移而具當是時也何止一壺千金哉宜夫中夜以思以何因緣承彼恩力一至於使如負笈西竺問

津臺山換去柴柵以求曠徹之地是則師之心而戴之志也苟謀之道路某處而飲饌豐美某處而居處便適憧憧往來老死而不悟者吾獨奈何哉是可悲也正妙又將闢其址益增大之而人之有以戴氏爲志捐夫田以續食者則附之左方以傳不朽有宋慶元五年四月初吉都梁周甫記

勝法寺佛像記

去常熟東北兩舍而遠有大蘭若曰勝法正宇

佛像一日不觸自仆寔慶元三年四月也得其  
識迺石晉天福間所造蓋歲久而後隳無足怪  
者時妙喜嫡嗣紹南主其席蔚然有道譽一方  
實宗仰之踵不及門而施者雲集有嗣寶蓮慨  
以自任爲之出力幹蠱會得傑手曰僧淨慧意  
匠風成出相妙好一歲而羸與繪飾之功皆然  
以訖事告矣今觀大雄如來巍處正座迦葉阿  
難拱侍左右普賢文殊以次導旁二大神厲色  
禦侮尊者一十八列坐其次觀大自在湧出後  
堵金珠間錯丹碧輝晃香華浮空幡幢羅樹緇  
侶旋繞梵唄清暢鍾磬時奏殿廡肅然是爲大  
道場甲於南沙于是一邑若少若艾奔走作禮  
起敬起慕嗚呼此豈人力強之哉嘗觀佛之有  
像猶吾學校夫子之設佛者有大營締雖累鉅  
萬指期而集至於其徒甘心服役精苦自厲雖  
至老死亦不叛去是豈宗主其師之教日夜灌  
漬其心挺及吾民之故歟及觀天下郡縣學校  
敞麗嚴邃固不能一如佛者之居春秋祭祀一

切取具臨時以應故事正旦月朔間一會于庭  
旁者唱曰訖儀以就位俯伏而退意鄉之間邈  
弗相屬又非若佛者之於其師懇切深到方且  
從事簿書期會敲朴之末以爲大故及立一事  
出一令而必責其先意以承何哉夫儒之道豈  
不盡善位天地育萬物鳶魚天淵莫不適從況  
民乎使夫如其徒之於其師其效可勝量哉今  
不責之躬反以尤夫人曰是安取諸彼及其欲  
勝之也又將曰夷狄之教以害吾道也如此人  
其人火其書廬其居其說哆然而四出矣豈不  
甚悖矣哉吾因是益有感而歎息於斯故併以  
書之云嘉泰元年正月望都梁周甫記

大慈寺鍾樓記

千鈞之鏞不梁百一之高而奠簏之則停輪息  
苦警昏導迷何所安冀寒山夜半聲到客船非  
衲子明心卽詩人得句昧者往往以爲迂濶不  
切迨不知美教化移風俗王者先務而心華發  
明照十方刹亦豈細事大慈爲福山望刹創梁

天監中長江橫陳五峰擁環古木夾道童童如  
幢寺昔中微木亦就槁及其再振木則重茂大  
鍾橫撞僅在平地厥聲弗鉉不足以發深省文  
遠欲造樓未幾而寂其徒如瑤了此緒續不日  
而成嘉定九年三月旣望也翬飛半天遐眺無  
際寺與樓稱鍾又稱之費幾萬緡始遠欲市田  
爲山家經常計幡然而作曰市田非比丘法則  
又反諸檀施施者不受願聽所欲爲至是舉以  
權輿其事餘出于其父母昆弟走飛來北磻謁

記歲月余語之曰昔昭默大士云身爲比丘不  
導父母于佛法中謂之不孝是役也子以繼先  
志又豁父母昆弟施心一舉而兩得雖然曩見  
子擔簦負笈問天台之旨於諸老之門今復見  
冠冕多衆于古靈山晉進不已至于厭飫心初  
而流通所學以壽佛祖夫如是又豈特孝于其  
父母哉萬緡之樓土木之事耳吾所紀者在彼  
而不在此嘉定九年孟夏旣望潼川北磻居簡  
記

依宋版北澗集  
較舊志稍異

慧日寺修造記

梁僧慧嚮造大寺三在淮南曰慧照在崑山曰  
慧聚在常熟曰慧日環常熟之境他佛廬無慮  
數十所或背岡巒而深穩或面江湖而舒曠其  
得勝槩固宜獨慧日在縣西稍北九十步臺殿  
屹立檜栢葱翠當闐闐中乃有山林瀟灑意鍾  
磬石鼓之音時徹縣齋爲令者藉以少清胸次  
爲不易得也院從昔名重甲諸刹旃檀林率瞻  
二千指非但爲展鉢計頗知相勉叅請或在定  
累日無少懈怠以故主席者必當世龍象然後  
其徒心悅而誠服嘉定丙子夏五比丘子幸以  
少師樞使大丞相魯公之命來住此上始至之  
日旱蝗積逋舍宇就弊緇袍稍稍雲散幸與佛  
爲謀奮空拳而一新之凡所得施利悉以助修  
設毫髮無私焉居無何甑中之塵銷而戶外之  
屨滿矣於是首興造事聞者響答富室至捐百  
金其窶人子亦分錐刀若法堂若庫院若浴堂  
若衆寮若華嚴閣若水陸殿旣次第補葺複製

幡幢二十四首以嚴冥陽之儀荆經函六百餘  
枚以足大藏之數三門兩廡舊爲賈區卜肆喧  
啾冗雜亟聞諸公而盡斥之塗以丹雘輝如也  
繼此來者欵門而容改升堂而意消使人折不  
善之萌者固多謂佛法無益世教不厚誣哉珽  
揭來試邑旣喜與蘭若鄰壁故因其求記而有  
攷焉自天監初院爲十方禪林幾千載于此矣  
中更鬱攸碑碣無有老宿或謂三錫勅額曰壽  
聖曰晏安曰慧日亦口相傳似熟爾乾道間僧  
宜意建佛殿淳熙間僧宗璉建法堂嘉泰間僧  
祖印慧光又建寢堂丈室皆未就去間闕至今  
乃迄于成是必有數存乎其間斷非偶然之故  
也抑嘗誦須菩提經曰菩薩莊嚴佛土不不也  
世尊何以故莊嚴佛土者卽非莊嚴是名莊嚴  
夫靈山六年鵲頂蘆膝佛自處也金碧晃耀十  
二由旬人奉佛也二者竝行初不相碍今慧日  
奉佛之道至矣若夫離相莊嚴則在比丘反求  
而自得之嘉定十二年解夏日宣教郎知平江



府常熟縣主管勸農公事兼兵馬監押龍泉張  
珽記

發頂山路記

常熟縣與海濱而地無大山縣依山之陽是爲

隅山以瀕海之隅也又名虞山以昔人虞仲本一

無神治於此也山北行九里是爲破山以鬪龍

破山而爲澗也又北行九里是爲頂山又北行

六七里是爲小山山之南北相距纔三四十本一

作二十里而名已不一矣又合而名之或曰烏

目山也縣人行還以舟航爲安而視道路無不

勞苦者故自縣至破山卽有興福寺又至頂山

卽有頂山寺其路隨山而山之形勢皆沙石雖

去山稍間而經田之塍又亦堦墘而人跡不頻

則榛卉爲之莽雲雨暴至則泥潦爲之塗人愈

勞之也昔之僧於興福者悼其如此於是出其

身有之財而累輒以發之然自縣之北門以至

興福之寺門而已因仍持久未有以動心者今

頂山中峰庵主懷素大師園於學佛而明朴於

遇人而信願以輒石自破山之雙塔砌而發之  
以抵頂山之寺門迺勤身以先人而訪人以許  
可昔之惡榛莽者果欲芟而夷之昔之病堯堯  
者果欲砥而平之昔之傷塗潦者果欲堅而實  
之其財可謂易求其力可謂易致歲嘗大凶人  
嘗大疫而於此未嘗不悅者其費錢百萬其役  
工數不計兆於熙寧八年之孟春成於元豐二  
年之季夏雖以堅爲之心感易化之人而必更  
五年方卽成功豈徐或疾之銳或挫之皆命于  
天耶若未乂而戚已成而休乃人之情也則天  
又烏能使人齊耶今夫奔車驟馬可以連轅竝  
轡而無復異時之境堯也春遊晚步可以攜歌  
執笑而無復異時之榛莽也輕任重負可以鍾  
行星歸而無復異時之塗潦也是則因其廢興  
而有休戚乘其機會而能變通果在人也古之  
治曰澮上有道川上有路而道路不除又責於  
任事者至於徒杠輿梁又各期以時月之成故  
行旅合散而人不病濟後世亾此而佛老之徒

得於其間遂資以爲功雖州縣之吏時有銳意  
臨之而後或無繼者亦又有其意時不得自任  
以爲責者今懷素非徒能發其路而已又能建  
雙石塔以鎮交衢之衝還以表溝閼也開四石  
橋以濟往來之阻還以表溝閼也是能爲縣官  
之未爲者而以佐縣官之不逮者吾其可以無  
書耶元豐三年三月初一日文林郎試祕書省  
校書郎守縣尉兼管局河塘溝洫陳于記

頂山瑞石庵記

夫生齒蕃息地据要劇水陸之會貨商寶賂之  
所自出必有窮岩絕境龍怪之窟宅以爲一方  
之福遇其人善持事之應誠禱而輒收報者其  
有益于民豈少也哉頂山之巔直上絕險怪篁  
鯁木陰森鬱翠之中有瑞石峭拔不可窮極而  
龍母之冢神龍之池環窟其旁邑民禱禳水旱  
曾不告召而千里畢至明道紀元之初浮圖守  
常者能默誦妙法蓮華經邑民陳氏浩滌相詔  
出泉二百萬屋其下爲庵召常守者持事之自

是禳禱輒應而福在一方守常死庵其下者不  
遇其人則禳祈不效水旱相仍嘉生不降邑民  
以爲甚患迨今治平丙午縣大夫向侯因民之  
願欲命滁陽紫衣僧慧安拯廢起墜益廣其旁  
以廊以軒以垣以甃以飯四方之來者相與講  
解佛事以起民人歲時祈禱之誠信夫窮岩絕  
境龍怪之窟宅足以爲一方之福遇人而興其  
誠信之應效蓋不可誣以神之爲靈嘗陰寂無  
形不可得詰而若依人以爲報其能不逆民之  
心以嚴香火之地以致誠於陰寂不可詰之間  
而爲民取福善之應蓋亦賢於善所用心而欺  
闇以悖人者之爲也丁未春正月甲子承奉郎  
守尚書祠部員外郎充祕閣校理通判秀州軍  
州兼管內堤堰橋道勸農河塘溝洫事騎都尉  
借緋錢藻記

明因寺改禪院記

常熟縣七十里有雙鳳鄉有村支塘而寺其間  
曰明因方中國知有佛僅餘千年而是鄉爲南

徐時嘗曰永昌世俗迫淺畏佛爲高明而毀擯之寺輒廢于乾元至咸通間始復向信而知過去佛在彼又已證真矣見在佛在我不可以不求證也欲證在我又不可以不尊彼于是佛道重光寺亦興焉遂名再昌至皇宋祥符改元始易今額至熙寧六年遂爲禪寺土不變壤人不更聚而名目之不齊者時異事殊實亦尊佛而已佛以一無冒一切有以一真破一切妄一切法是有我何使之無我本自無今安得有一切

法是妄我何使之真我自非真今安得妄一有一妄爲有情故一無一真爲無情故此禪律所由判也東西分祖南北異宗以攝戒名律以見理名禪此禪所由盛也夫律衣漸禪衣頓而爲之徒者以禪受十方以律傳父子因而反戈自伐與俗同污其不見繆於世者無幾蓋律徒之弊也初僧文曉由是與流輩有不平者以自至有司遂攘臂鼓衆二十有一願更律爲禪自今日始縣爲聞府府下僧籍蒐可爲領導者衆薦

今禪師紹瞻而府可之師至其徒有不悅者豫  
空其室以遁而頽垣壞壁蕭然如無人之墟師  
不以介情收拊遺衆繕葺故廬鳴鍾擊鼓晨唱  
夕和欣欣如也規範僅舉徒衆僅安歲輒大凶  
而水且旱百里蕪其八人輒大疫而逋且逃十  
室虛其九嚴不轉之心奉一實之事根無利鈍  
應病用藥其徒以此親施無厚薄示福田相鄉  
人以此敬行八年於今而門之外道長涇以利  
衆至涇之上營石橋以便行堂室龕殿雖未及  
美而小亦備矣常以爲佛之興無棟宇之安無  
朱碧之華或卽山與園或棲林與樹而徒衆羅  
列人天森填不以爲陋者愿得法而已及夫祖  
佛不可見見其相而瞻親之足矣所以侈宮殿  
而非僭道師不可得得其人而皈依之足矣所  
以麗室處而非過際無前後應運者昌法無正  
末叶真者隆居不必壯苟茸苟完以至於美而  
不慊者逢其適故卽大瀉是已徒不必繁或十  
或百以盛於千而不憚者會其緣故卽象骨是

已由故以觀今則寺之興廢可見由今人以觀  
故人則師之操履可知因師請識之而論次如  
此若門未革殿未紺而丈室未壯必有待於他  
日余不得而書也元豐四年五月十五日前蘇  
州常熟縣尉陳于記

破山光明庵記

佛說金光明經是經莫知所始莫究所終杳無  
形聲廣無邊際最尊最上衆經中王類名曰金  
不可沮壞之體也現前日用光明之實相也雖

天地之大萬物之多幽明之異死生之隔皆不  
出是經含洪福覆之無外也廣矣大矣不入二  
乘之論浩然寂然未離三界之中樂著是經則  
入起滅輪趣向是經則示懺悔法由懺悔法故  
能拂樂著之心無樂著心故能達菩薩之本有  
大沙門名曰海素以曩故行願愛樂是經出入  
是經受用是經得是經三昧安樂贊嘆之不已  
又思一切衆生同入道場供養是經行懺悔法  
去一切罪垢與人天四衆得清淨果究竟了義

入無生法忍安住如如復次香火之地不無擇  
焉乃相視此山西南頂有奇峰裂澗可以隔塵  
凡有長松茂竹可以庇經像燕坐屏息歸者悅  
來者遂以熙寧辛亥歲經始訖紹聖丙子年建  
立凡三十餘間得東南之絕境擬化城之髣髴  
背望遼海而鏡空一天前臨尚湖則澄光百里  
於是擊大金鼓出大音聲諸有聞者合手而至  
稱曰某甲等以宿昔緣墜塵色界煩惱障難愿  
盡懺除素公乃爲整威儀良久而大衆恍然有

失瞿然有得悲啼懇切告謝而去往問之則曰  
所失者煩惱妄想向來覺知今已斷滅所得者  
口耳不及使余何言仲殊身隱光明跡涉懺悔  
聞此殊勝書以自警公命勒于石以示四衆云  
耳紹聖四年正月十五日雲遊比丘仲殊記

○神祠

破山龍堂記

禮山林川谷丘陵能出雲爲風雨見怪物皆曰  
神若然春龍亦能爲風雨見怪物則其澤也在



民厚矣神而祀之又宜矣常熟澤國也風雨怪物日作于民在有其地者苟祀之至民被其利祀之不至民受其禍汝南周君爲令之初夏且旱禱其神于破山之潭上果雨以應君曰受其賜徒禱以報不可也於是命工以土木介其象爲寶宮以蔭之著之于典以潔其祀於是風雨時怪物止水旱不爲厲民經大荒連歲以禳其神之澤乎君之祀乎凡雩者春秋之道皆書之勤民之祀也君爲其祠已乞文其事日休佳君之爲也在民故從之咸通十三年二月十九日襄陽皮日休記

頂山白龍祠記

常熟縣之頂山世傳梁天監元年有村姥居其東孕而生白龍失所往三日龍歸若就乳姥怖而死其家卽所居葬之旣七日大雷雨冢遷於山腹一作腰泉池泓演木無棲禽歲之五月龍率來省或見形山間始至必甚雨風旣畱則一境爲之寒邑人以此候之唐貞觀十年龍常鬪黑

龍于海虞山之東山破水泉出其下有破山寺  
今興福寺是也邑人因像事龍母子于寺西澗  
旁水旱禱焉本朝太平興國四年蔣文懌爲縣  
令苦雨祈龍而霽令爲之增埤冢封濬治故池  
旣又卜遷其像歸諸頂山寺是日有白氣竄故  
地而龍見旣至舍其像佛殿西偏而大治其祠  
宇結構之三日龍復見尾冢而首祠經日雲氣  
光色錯雜遠近見之祠成文懌爲之記迄今禱  
請多應其興起年世與變異事跡舊碑實云大  
觀三年五月六日餘杭陸韶之記

煥靈宣惠侯廟記

政和二年漕臺以常熟白龍祠祈禱感應之實  
聞于朝越明年制曰可宜賜煥靈廟爲額邑人  
以煥靈之惠著在一方而爵號未崇無以昭神  
貺後二年縣以狀列于府府言于部刺史遂復  
保奏焉制曰可封宣惠侯於是縣大夫率佐官  
祇奉休命宣于祠下而邑之士雲集將退咸告  
于丞魯詹曰侯之廟宇君與縣大夫謀之侯之

封秩君與縣大夫請之今堂宇將畢而論誥適  
班邑人鼓舞胥慶盍記之以侈其事且俾流于  
遠詹應之曰茲不敢辭惟侯之祠在破山興福  
之澗上父老相傳其誕育之異肇自梁武初我  
宋龍興妙選守令爲民師帥太平興國中蔣侯  
文懌來宰是邑距天監凡五百歲矣時積潦泛  
漲躬禱於侯不移晷雲斂雨霽歲則大穫乃迎  
侯與聖母之像歸于頂山壽聖之西偏是日白  
龍之見盤旋乎冢上彩雲之瑞焜燿乎山間迄  
今凡一百有四十歲矣邑人乃相與作廟于山  
腰龍池之上侯之壟在焉經歷若是之久始克  
有成茲豈偶然哉佳城峩峩方沼灑灑峰巒疊  
秀回抱如翼長江浩蕩沃野曼衍左則福嶺狼  
崑右則虎丘崑玉遙岑寸碧列岫橫翠雲煙之  
祥疑在於仙島氣象之偉實冠於吳中觀侯之  
初以神力遷葬而陰陽家流咸謂勝地今新廟  
奕奕實下瞰焉庸詎知其非侯之意哉政和五  
年十一月庚辰旣望侯之誥下十二月朔廟前

後殿成若門墉廊廡蓋將有待於來者焉纘其事以攷之詹旣書其槩矣復繫之以辭遺邑人歌以祀侯辭曰

白龍之峰岩岩兮白龍之泉潺潺侯之煥靈兮祥發于茲山侯之惠宣兮澤霈乎人寰若歲大旱兮曰雨而雨天作霑潦兮曰暘而暘上恩之厖兮載煥乎龍章民報之篤兮締創乎斯堂淵潛而雲飛兮克相吳天五風而十雨兮賚我豐年千秋萬歲兮擊壤千耦萬箱兮大田文林郎

知縣平江府常熟縣丞魯詹記

修白龍祠記

海虞彌望平疇有山突然自西北走東南左股盤紆前趾直踞崇岡隱起于腹脅間顛有池焉叢木蒼蔚曰龍宅之祠宇久不葺不稱神居金華葉君知機貳烏程有聲諸司能之以其狀聞諸朝移使令海虞旣視事謁祠下儉然若有感於中者自是水旱則禱之曰雨曰暘如響答聲穀用以成民用以寧他邑歲飢而海虞之人不

以瘠告既三年矣君曰神之福我民至矣吾朝夕去邑而神之居若是吾顏覲焉乃鳩工合材易其腐敗而赭堊其故暗廟貌煥然爲之一新惟神基迹於梁赫靈於唐以暨我國家雖以上下天地把握陰陽爲功然非人無愧於神則神何有於人也今神之福吾民如此是殆令君有以契神意哉葺其祠以答神之休也固宜良請書其事於石又爲之詞以附著其後使邑人之祀神歌之以樂神詞曰

雲油油兮靈之升風颯颯兮靈之下雨暘以時兮靈之豐我稼棟撓壁摧兮靈何依葺敝以新兮祈報則宜千秋萬歲兮靈無我違時有宋慶元丙辰四月吉丞昭武傅良記

龍湫亭記

頂山祠宮爲白龍祝嚴所肇於梁天監顯於唐正觀而助順著耀於我宋者也雩禱之應咸通中皮日休述之誕育之異太平興國中蔣文僔記之政和二年始賜廟于煥靈後二年封侯曰

宣惠自是禱水旱則響答制詔封秩累八字矣  
祠之側踰百步有上方院院有湫泓水清可鑑  
旱澇不爲之縮盈舊傳嘗見白鰻于中故俗稱  
白鰻池實龍之棲也吾宗趙君崇志嘉定乙亥  
來爲縣大夫明年丙子蝗繼有自江北蔽空而  
入境者君率僚貳走祠下潔齋禴禳少焉龍見  
于天風雨驟至是夕蝗患隕于江以斃秋告旱  
君卽湫乞水禱焉則辱居浴院下腐渠汙積謂  
神龍窟宅而若此沮洳無乃非耶默與龍約雨  
若應祈當爲龍作亭以蔽湫之上且徹彼浴堂  
前爲軒楹言未旣風色慘變片雲布濩隆隆獵  
獵若有驅導然隨車而雨遂彌百里罔不周飫  
訖成農扈稽事畢迺鳩石工迺命梓人以甍以  
削始創一亭而湫其四周巍然而覆翼之尋闢  
澡垢之地日南至縣大夫相攸築址白龍復見  
蜿如矯如近橫兩山之巔漏下十一二刻而藏  
冬而龍見非時也邑人故以爲異於是士夫民  
庶謂宜假以光靈增其封爵策書申命以詔亾

極乃上其事于郡于部刺史次第聞于朝事下  
禮部大常合議條奏龍侯自靈澤宣惠通濟孚  
應而爲廣利公龍母夫人自靈順慈懿顯祐而  
加普應且易懿以穆詔禮官議是鄉貢進士陶  
元善者克奔走倡厥事會鄉貢在朝路又從而  
候趣之告下神人懽喜于以荅昭眈侈神功也  
惟軒楹未就顧縣帑常在元枵之次是邦有寓  
公獨慨然捐錢以助其費君輔之私財一椽一  
瓦不以調民民抑不知有斯役戊寅秋七月建  
屋三楹榱題美奐如翬斯飛潦以垣墻氣象閎  
敞然前帥周公虎作龍湫二大字爲扁榜題趙  
君詒書求時侃記顛末時侃旣樂道禱祈之孚  
遂復于君曰余嘗讀易而得雲從龍之文及質  
諸韓文公而得其說夫雲者以龍之噓氣而成  
龍乘茫洋之氣薄日月召雲電然後以雲爲靈  
是龍之能使雲非雲之所能使龍也子思氏著  
中庸一經有言水一勺之多及其不測蛟龍生  
焉蓋不測之水自一勺而致孰能謂龍之時潛

不在宮沼間左氏載深山大澤實生龍蛇之語  
亶不爲怪逮夫起陸變化雲霧滃然而從瞬息  
四海茲其所以龍之靈審如是不敬于龍湫可  
乎歐陽文忠公爲乾德令祭五龍之文云百里  
之地一時不雨則民被其灾凡山川能出雲爲  
雨者皆有神以主之以節豐凶而爲民之司命  
余觀趙君龍湫之事其得歐陽公爲令之心歟  
心與龍通雨暘時若以是三載無水旱之患行  
去猶拳拳於軒楹之建封爵之加去如始

至是不可不記也君字安伯登紹熙龍飛第今  
官奉議郎其操心也誠其律已也廉爲政無愧  
于顯幽云嘉定十一年九月朝散大夫主管毫  
州明道宮趙時侃記

福山東嶽廟記

維我宋真宗皇帝東幸太山告功于天大修封  
禪禮泰山之神顯膺袞袞嘉位號崇隆得非衛社  
稷福生靈運功烈於冥冥之際宜有所報稱與  
是故四方萬里不以道塗爲勞往奉祠事有加



無已且復用其至而思所以竭力於神者往往規模岱嶽以營基構立爲別廟多矣然未有盛于姑蘇之福山也福山廟徑於至和之初先時草創類皆陜隘拓地增廣屢見改作知者獻謀巧者效工富者輸財貧者出力爲斧斤爲畚築爲陶旒與夫黝堊丹牖之飾其用不資垂六十年樓殿門廊并其從舍巍然而輪奐時旣久如此其盛猶弗休工而停役資信施于一方未必能爾也然而江淮閩粵水浮陸行各挈其所有以輸歲時未享之誠者上祝天子萬壽且以祈豐年而後保其家凡有求必禱焉率以類至號曰社會簫鼓之音相屬于道曾不知幾千萬人不及之乎泰山則之福山而已非靈貺感召有是乎福山臨江海上巋然蒼鬱岡巒回環殆亦勝地父老云肇祀之日有幅畫乘潮水至乃嶽神像居民得之欽事而加信焉隱顯之情相與符合如此嘗考山之隸於吳域曰覆釜蓋因其形以後易名福山今廟據其上遂爲遠近祈福

之地豈偶然也哉於戲畏禍而悅福人之常情能畏禍鮮有不畏刑爲不善也明則刑及之幽則禍及之且惟福是祈而敢不爲善者几希廟貌嚴飾則人之設心亦可見矣固宜有述以爲來者勸況以祝聖祈年爲先務庸可以不書乎衆謂邦哲寓居之久頗詳其事求文以爲記在位者助之請不得而辭政和七年八月乙亥鄉貢進士崑山魏邦哲記

重修福山嶽廟記

宋有天下垂二百年海寓乂安憲度修舉人繁物庶拓地日滋文恬武熙寘民太平和氣中至老死不聞軍旅之事鼓卧不鳴邊境少弛遠夷欺天犯順乘不測之勢虵豕長驅犬羊無厭雄藩鉅鎮金壁輿區游騎所經略無遺燼平江蓋吳都會而重兵所守也一日姦人欺賣蛻去無戶限之託一夫一婦一絲一粒蕩然爲空常熟距城百里揚鞭可至而夷人逡巡遁去不敢回顧神相之矣何以知其然常熟於縣爲富家潤

屋百貨之所藏平原沃野九谷之所利達官貴  
士遠商大賈樂寓其境殆危時險塗盜賊之所  
垂涎者今舍弗取又地當西北之衝俯瞰長江  
對峙通泰於是大軍勞午悉仰是爲傳舍絡繹  
不斷累年於茲無或間言脫有奸人暴客包藏  
禍心存爲不利旣而彌縫調伏奸宄自銷驩然  
請行莫敢竊發者以故齊民安堵居不告擾耕  
食鑿飲往往滋盛曩時豈盡天幸哉神相之也  
東嶽離宮扃于至和崇大於元符實相斯民而

治于福山福山南去縣四十里北壓江口卽古  
之覆釜唐之金鳳山也一邑之走望在焉老弱  
疾病歲年豐凶以至于旦莫之所經永冀如意  
而蒙福者惟神是依越是以來遠邇加信歲率  
以算春大會四方來者于廟之廷祈者禳者訴  
者謝者獻技能者輸工力者若富若賤若小若  
大咸各有施投簪珥荐琛貝輦貨泉筐布帛庭  
實充塞紹興癸丑知縣事施公剛明清慎至誠  
有格樂與民基福田神施實德于民而報之不

可虛拘宜卽其廟弊者新之圯者更之無者建  
之已經始者成之知政事趙公敏惠簡廉遇事  
輒辦曰惟爾有神質之在旁敢怠斯役因會所  
入披圖創規將侈其觀顧護國西齊王殿營治  
歲久宏麗及是命工度材一新輪奐楹丹桷刻  
耀映日里旣八月請用告備明宮齊廬壇壝之  
屬凡昔所未具與夫故制卑隘不足以揭虔妥  
靈者今悉章章顯設無不盡美歸然神居高明  
靖深洞洞屬屬應如影響以福一方蓋未艾也

西成有祈耆老將率邑之子弟慶于祠下命予  
記其事因爲之歌以侑酒且致所欲禱者詞曰  
妖氛塞路兮乾端坤倪獨保茲土兮初如弗知  
念我福兮惟神其依欲報之德兮曷知其歸用  
宏茲賁兮聊申我私神其昭假兮克大靈威恢  
清宇宙兮太平以基與國咸休兮振古如茲紹  
興三年十月十日福唐三薰撰

重修琴川志卷十四

題詠

破山寺

唐常建

清晨入古寺初日明高林竹涇通幽處禪房花  
木深山光悅鳥性潭影空人心萬籟此都寂但  
餘鐘磬音

遊破山

唐皎然

雙峰百戰後真界滿塵埃蔓草緣空壁悲風起  
古臺野花寒夏發山月暝還來何事池中水東



流獨不回

曉秋破山寺

秋風落葉滿空山古殿殘燈石壁間  
昔日經行人去盡寒雲夜夜自飛還

破山山居八詠

唐僧常

達

身閒依祖寺志僻性多慵  
少室遺真旨層樓起  
算鐘啜茶思好水對月數諸峰  
有問山趣中庭前是古松

晚望立虛庭心心見祖情  
煙開分嶽色雨霽減泉聲  
遠樹猿長嘯層崑日乍明  
更堪論的旨林下筍新生

一室塵埃外翛然祇麼常  
睡來寢帳開鐘動下  
禪床溪漫山光冷  
秋凋木葉黃  
峩提諸祖意  
欵石看斜陽

西來真祖意祇在見聞中  
寒雁一聲過疏林  
幾葉空心閒  
憐水石身老怯  
霜風爲報參元者  
山山月色同

真性寂無機  
塵塵祖佛師  
日明庭砌暖  
霜苦藥

苗衰汲水和烟酌裁松帶雪移好聽元旨處猿  
嘯嶺南枝

古寺凭欄危峯聞舉妙機庭空月色淨夜迴磬  
聲希漏轉寒更急燈殘冷焰微太虛同萬象相  
謂話元微

胡僧論的旨物物唱圜成疏柳春來翠幽牕日  
漸明禪心親石室蜨翅覆花英好聽譚元處喬  
松鶴數聲

祖祖惟心旨春融日漸長霜輕莎草綠風細藥  
苗香月滿真如淨花開覺樹芳谷前鶯囀處豈  
聽圜常話

烏目山五題

祕書丞李堪

余被物役塗污故羈於人務網於吏  
位誠此身為官府有也今四十加六  
季始覺老非欲而已至病不期而自  
來生何常而本空死如歸而共寂由  
是登水木之虛室遇霞月之美夜聞  
經梵之清韻覽香花之寶會則心悅

口 以情動目爽以言發綺靡以文著冰  
釋以意達前月中隨漕挽牒治金穀  
事至常熟縣過烏目山其山左右前  
後僧居佛宇者有五因而成五題皆  
率爾而作非高妙也大中祥符三年  
四月五日序

### 興福寺

雲門十里長殿塔明朝陽半夜風雨至滿山松  
桂香清猿嘯遠壁好鳥鳴虛廊塵土斯可濯胡

爲語滄浪

### 延福院

蘭桂繞禪關半春香滿山風移金磬遠雲伴玉  
龍閑樹暗猿吟外花開僧定間塵心自然洗流  
水日潺潺

### 淨居院

入門松桂深清氣生人心霞影迷窓綺花光照  
地金微風起層閣初月升高林終夜魂自健滿  
堂鐘磬音



永慶寺

岩扉開早涼  
谷鳥紛遠翔  
花氣濕幽徑  
磬聲清上方  
雲生松澗底  
泉落蘚池傍  
我有遺榮意  
移昔坐石牀

龍院

林下金仙坊  
苔門掩夕陽  
花飛殿塔頂  
地昭雲霞光  
松老鶴仍在  
洞枯龍已翔  
中宵動清衆  
一磬發虛堂

破山八詠

元豐元年蘇州府常熟縣沙門思雅  
謁余言曰海虞之勝鍾於破山然林  
泉之勢遊觀之繁無近與遠傳之盛  
矣自倪彬州舍宅爲寺數百年間僧  
人奇士徃徃間出而人知者願有以  
發明之余因請而詠其可道者俾靈  
蹤異宋不捨於山水之勝云元豐五  
年四月旦日宣德郎知蘇州常熟縣  
劉拯序

興福寺

齊彬州刺史倪德光捨舍為寺號大慈院梁大同中改為興福寺

峩峩烏目山曾臨貴侯宅重房昔珠翠峻字換  
金碧泉激晨霞明松搖暮雲白宜爾山中人日  
輪自朝夕

文舉塔

唐高僧常達字文舉通涅槃經莊老書隱跡此山雖王侯詣門莫得而見塔在寺之東南三百步

園旨探雙林卮言發南華萬里歸一空誰云正  
非邪門影搖青松曾迴貴侯車猶遺數層塔岌  
岌凌飛霞

救虎閣

朱梁高僧彦偁嘗一夜有虎中箭投伏寺閣偁閱之下拔箭其虎舐血顧偁而去閣基在三門之東偏

三昧遊深慈結宇依蒼崖猛虎伏巍閣拔箭非  
忘骸窮獸雖覆車危雀猶投懷况我見已忘而  
彼猶其儕

龍鬪澗

唐貞觀中老嫗生白龍與一龍鬪於此而成澗

白龍鬪巍峰長澗落千丈靈泉應奇蹤高連暮  
雲碧寒影凌蒼崖清流動危石八月苗正枯猶  
能變甘澤

體如塔

高僧懷述字體如學湟槃伊字沙門遭武宗沙汰至大中中仍復僧服始終無瑕塔在文舉塔之東北

妙理悟三伊巍巍抗奇節千尺岩下松蕭然獨  
凌雪珠影雖青黃月輪豈圜闕危石揚寒泉至  
今伴清絕

宗敎院

雍熙中高僧晤恩通天台敎持於此在山門之西偏

妙義傳天台迷雲淨如掃初終雖五峯修短自  
三草結隱非此峰獲藏亦真寶秋來月正圓獸  
照松已老

空心潭

常建詩云山光悅鳥性潭影空人心在殿之東北九十步

碧潭發幽石瀟灑無纖塵寒光湛秋月有物難  
比倫離鈞况無魚千尺徒垂綸到此心已空何  
用濯我纓

御賜鐘

唐懿宗咸通六年賜

大聲如洪鐘萬里來彤庭鳥閉棲影重星淡雲  
氣清餘響遶岩壑林葉如迴驚有客發深省塵  
耳非謾傾

破山

尚書莫儔

久聞勝地有蓮宮乘興來遊杖瘦筇庭老樛枝  
翠纓珞池生並蒂玉芙蓉飛仙何意來題柱開  
澗當年想鬪龍歸騎回看樓閣處雲深隱隱度  
疎鐘

同

諡莊李光將爲

招提清絕冠諸方溪繞山圍勝氣藏在池塘  
存舊址依然花木隱禪房風生殿閣元無暑雨  
後松篁自有香日暮不教清興盡更登絕頂瞰  
微茫

同

陳簡齋

不到龍門十載強斷崖依舊掛斜陽金銀佛地  
浮佳氣花木禪房接上方羸馬暫來還竟去流  
鶯多處最難忘老僧不作留人意看水看山白  
髮長多處一  
更巧

破山光明庵

僧仲殊

身是光明幢語是光明經光明聚不散妙有成  
真形示現三界前何勞問丹青坐斷龍鬪山寶  
月孤亭亭

同

吳郡陸 曦

檻外琅玕山外山三峯橫碧有無閒塵埃莫便  
市廛忒斜日秋風更倚闌

虞山登眺

令孫應時

長嘯虞山迴天開風氣清南窺五湖近北覽大  
江橫歷歷三吳地悠悠萬古情雄觀有如此聊  
復記平生

乾元宮

令孫應時

塵囂咫尺愧山林勝日追隨得共臨千里江湖

堪送目一窗松竹更論心清風正爾生秋意小  
酌何妨到夕陰歸路踟躕獨惆悵強須倚卷一  
微吟

望湖亭

僧仲 殊

凝華浮藻五雲間下壓凌虛萬象閑湖水際天  
天欲盡落霞照出洞庭山

極目亭

舊名望湖

令徐次鐸

幾點歸舟破暮煙數行雁字落霞邊世間安得  
王摩詰為寫琴川作輞川

頂山寺

直集賢院  
知蘇州

梅

詢

蚌珠碧樹挿雲立一綫紅泉透石飛童子怕寒  
爭閉戶夜深風雨有龍歸

秋晨至頂山

令孫應時

散目秋郊趁曉涼纖雲不點鏡天長杉松沐露  
連天碧杭稻眠風萬頃黃可惜文書妨勝日又  
還時節近重陽小山叢桂相撩得故故隨人作  
陣香

秋晚有懷頂山

令孫應時

小山搖落故淒涼想像登臨野興長萬里晴空  
初雁入一年好景又橙黃極須痛飲償秋節生  
怕疎鐘報夕陽搔首故園歸未得籬邊黃菊爲  
誰香

留題頂山上方

謚文范仲淹  
蘇州知

平湖數百里隱然一山起中有白龍泉可洗人  
間耳吾師仁智心愛茲山水音結茆三十年不  
道歲月深笑我名未已來問無爲理却指嶺邊  
雲斯焉贈君子

同

雨歇黃梅後秋生麥熟前  
偶同金馬客來訪玉龍泉  
竹葉一樽酒榴花五月天  
不妨扶拄杖行到白雲邊

慶元丙辰中夏獨遊上方

令孫應時

澗水有奇觀山蟬發清歌  
穹林翠光合谷深涼風多  
孤遊轉寂歷佇立久婆娑  
吾生正須此欲太意如何

戊午六月宿山禱晴

鵲爲晚晴喜山如秋夜涼  
蟬聲起竽瑟雲影散牛羊  
神理應難昧民憂敢自康  
平生靜中趣未厭宿僧房

詰旦喜晴

一壑有幽意三年幾獨來  
龍鱗松薜荔翠羽石莓苔  
潤喜朝光動清知嵐氣開  
山前迎父老同作笑顏回

頂山粟

黃籬抱中實紫苞發外彩  
寄蹤蜂窠垂藏頭猗

皮隘詎堪鼯鼠竊，更復猿猱探。心憐使民畏，時  
須徇兒愛。荆山破金璞，驪珠掩微類。鎮密文自  
保，滋味身乃碎。筠籠貢厥珍，不在担梨外。羅邊  
加其儀，顧與菱芡對。易飽屏膏肉，餘功益肝肺。  
懸風當令堅，致濕忍使敗。晉地棗非偶，蜜佳配  
誰知麝香囊，可居天下最。

中峰

令劉拯

躡涇登高亭，天遠不敢局。踈簾捲危簷，百里在  
舉目。江橫縞帶明，山隱螺髻綠。啼鳥破長煙，飛  
泉漱寒玉。雲回猛虎嘯，清風遶岩谷。颼颼入清  
松，古淡琴一曲。倚欄更凝望，斜陽上修竹。欲去  
還遲遲，勝概那可足。

同

林逋

中峰一涇分，盤折上幽雲。夕照全村見，秋濤隔  
嶺聞。長松含古翠，衰葉尚微曛。自愛蘇門嘯，懷  
賢事不羣。

同

僧仲殊

聚遠最高亭，登臨喜倍增。貪陪青眼客，不見白



頭僧閉戶三十載壓雲十萬層龍珠彈落處一點白蓮燈

瑞石菴

修碧竹萬个清甘泉一泓拂石可偶坐攜茶聊自烹林深人跡靜日永山蟬鳴出門不忍去卻立聽溪聲

寶巖寺

平湖鏡淨中背貼清峰巖公郭二十里金碧波瀾是曰寶華境萬象鬱以盤壯哉宰堵波一瞰

天地寬誰懷墮塵鞅幾欲招飛鸞我生眇何能山水情所安扁舟幾來斯不爲開愁端意到自行樂樽酒那追懽何如結青蓮超適心外觀塵迹心兩忘浩然天地間

同

中丞姚愈

浮圖插雲表列嶂環古剎平湖渺澄波萬態天光發我來陟層巔秀氣助毫末扁舟返明月萬頃玻璃滑

同

陸曦

出屋蕭蕭數百竿  
入門襟袖便生寒  
相期更待梅英發

光祿亭杏花

少卿陳揆

西郊見說春事濃  
杏花香發眠東風  
主人未解此花意  
小槽溜溜盃猶空  
勸君斂豔葡萄綠  
好看枝頭紅映肉  
莫令風雨遣花飛  
徒唱人間斷腸曲

勝泐寺

贈網師

謚莊李光

舍南舍北竹千竿  
鏡靜無塵碧玉寒  
中有老人

似清水曉來相對倚闌干

遊勝泐寺兼簡深公

嘉祐三年

尚書郎田陸綰

道旁有古寺巋然聳  
梅林爾來衣褐徒  
包禍歲月深理伏狡  
兔穴嘯聚惡木陰  
安得智慧劍力斬  
姦邪心吾師曹溪流  
所在人依欽郡邑  
兩交疏來發雲雷音  
初如碎瓦礫乃見真  
球琳瞽者破其瞽瘖  
者披其音有若鸞鳳  
巢無復鴟鴞禽嗟予  
困吏役海岸宜投簪  
扁舟扣禪戶清風滿

衣襟高論松桂間爲師揮玉琴

同嘉祐三年

令孫應時

古刹精廬隱茂林  
斷雲疎雨正秋陰  
黃花又是  
一年事  
枯木依然千歲心  
病酒情懷忻獨酌  
懷人無與共清吟  
僧牕夢覺鐘魚靜  
聽徹寒蛩語  
夜深

游智林寺

政和戊戌

諡莊李

光

時爲

扁舟來訪小叢林  
花木通幽院落深  
旋拂胡牀  
成午夢閒持貝葉動  
秋吟竹聲瑟瑟生  
虛籟山

意義峩入素琴  
更喜老網能會事  
手携爐鉞自  
相尋

鳳凰山

郎中温革

慣作山林客  
聊遊戲劇場  
栗花收作燭  
柏子探爲香  
且放高情適  
都無俗事妨  
人間正擾擾  
只得扣空王

題常熟

楊備

遠逼江琅傍  
海壩落帆多是往來船  
縣庭無訟  
鄉閭富歲歲多收常熟田

送常熟錢尉

范仲淹

姑蘇臺下水如藍  
天遣仙鄉奉旨甘  
梅淡柳黃  
春尚淺  
王孫歸思滿江南

送安公歸頂山瑞石庵

侍郎王淇

談空二紀餘  
重此訪閒居  
身是汾陽嗣  
囊惟郭璞書  
公侯倒屣後  
泉石結茆初  
山嶺收榛栗  
經秋信莫疎

送燕明仲歸常熟

李鼐

東南江海郡  
瘴霧腥蛟螭  
土俗異鄉縣  
客子懷

歸思歸思何從返  
遠道傷百危  
干戈久未停  
一分華夷壯士爭  
外強覓爵唾手期  
而我癡絕甚  
尚復事毛錐  
三年行在所  
短褐風霜欺  
生理寄茅棟  
不飽藿與藜  
苦辛攻積憂  
欲語聽者誰  
賴有燕公子  
好事頗見奇  
鄰牆肯相過  
情話肝胆披  
君才駉駉駿  
不受塵埃羈  
驥首志千里  
蹲踏風雲垂  
乃翁名世將  
先朝補邦基  
殊勲鼎彝在  
勁節不少虧  
後昆德澤盛  
哀哀固未衰

贈常熟賀公叔隱士  
錢塘周邦彥

懷珠崖不枯韞玉山有輝隱翳不言濟人自知  
神奇公叔季貞後不爲世網縻浮沉里閭間身  
晦道固肥弓旌搜俊良圭衡略無遺難偕集雍  
鷺寔作曳尾龜慈仁蓋天性惠澤施鰥嫠倒困  
食流冗死葬病有醫人今泣遺愛若見峴首碑  
肯構有材子修德亦庶幾高風自茲顯豈病知  
者希

寄常熟鍾子充隱居

錢厚

倦倚吳門思沈寥懷人清致詩滿瓢池塘芳艸  
夢初斷風雨標梅魂正銷一百五日寒日節二  
十四浦春江潮遙知藥圃曉經劇舍後蘼蕪添  
綠苗

題龍山

高菊磻名九萬

古縣滄浪外精藍縹緲間木枯曾閱世龍老解  
分山鳥道秋迷跡禪房晝掩關詩成遊子去流  
水自潺潺

遊龍山

名山久相望今日爲着屐到寺第一義古松互

蟠屈一一龍蛇形風雷氣蕭瑟纓絡檜兩株皆  
數百年物佛燈耿青熒像設暗金碧空廊極徘徊  
老屋共崒兀僧房小槃礴西原訪泉石於其  
最幽絕似可僂築室回而思古人多有愛山僻  
要之亦何爲一賞事已畢上方不及登尚或俟  
他日無非會心處妙同箭鋒直山靈謂何如移  
文茲不必作詩留山中併可告來轍

破山雙頭白蓮

少卿陳揆

湘南夜水風露清月明耿耿波益平嬋娟有人

步羅襪瓊璫玉佩雙娉婷可憐玉骨埋藏久腸  
斷人間無復有豈知化作蘭若蓮宿未忘猶並  
首想應快意洗塵緣不向謝池爭取妍玻璃槃  
中淨土頰一心稽首西方仙請君以圖獻天子  
當與嘉禾並周史毋令寂寞墮空山泣月悲雲  
清夜殘

詩送張安道僑朝散赴闕

謚清趙抃

君數過予澌水邊從容不覺歲華遷同年契有

二千石郡守最厚釐務官成三百篇安道詩成集

兩縣子庭俱戲綵是行開化應一州僚館競鋪

筵郡彌官餞到應禁闥新秋喜近對威顏咫尺天

安道作詩慶園鎮高退輒依元韻奉和

里人迎候巷居稀未老先休世所奇兩頰朱顏

君退速六君十八方滿頭霜髮已歸遲七十年已優游

豈顧千鍾祿收拾如終一局棊飲食節調資壽

祉願同山下有雷頤色二詩縣人張氏家藏黑

### 重修琴川志卷第十四

### 重修琴川志卷第十五

#### 拾遺

#### 石室

在常熟縣海虞山石室凡十所相傳太公避紂

居之孟子太公避紂居東海之濱常熟太海近

或是載吳郡志

#### 文學橋銘

魯鄒而降道為絕學千五百年起濂續洛寥寥

閩派久幾復絕再起滄州教修日揭無極二五

在人一源故不同地時生聖賢吳通上國公即  
遊魯胡然歷世莫踵公武覩迹亦味吁方肇祠  
是用作記意嚴灑譏嗟予小子世閩產吳敢誦  
所自滄州之徒登橋而思刻銘述記期我同心  
如水洊至能令後學本末易明僞行不作踵公  
自今

重修琴川志卷第十五終


丙戌之春琴東夏淡人補鈔

余有同年友常熟張燮子和目款脩常熟志  
學屬覓盧鎮重修琴川志余轉向書林搜訪  
及覓而子和已入詞垣改農部官遊三四年  
不獲把晤此書遂留以送衍今春子和迎母入  
都便過吳門來訪談及此書之志局不在其  
列雖邑志亦不暇流覽也曷留鄴架乎余惟  
志書多舊本此志間可收貯遂命工去其前  
後部葉之破爛者而重裝之與玉峯吳江諸  
志備吾郡屬邑不負郭者之典實其庶幾  
矣此本係曹彬侯補鈔潤資有契丹國志



在余處爰并誌之

嘉慶丁巳季冬中瀚一日堯圃黃丕烈



*[Faint bleed-through text from the reverse side of the page, including characters like '嘉慶', '堯圃', and '黃丕烈']*

刻閣古汲明 志川琴

一

志川琴

二

志川琴

三

志川琴

四

志川琴

五

志川琴

六